


# **Nambata Janggi Tanggnina Skie-Ra'anirang**




**NANG' SENG-ANIKO AGANPRAKNABE ;  
KAMCHISA DAKMESOKBO.**



# Nambata Janggi Tanggnina Skie-Ra'anirang



DONALD N. SANGMA



NANG' SENG-ANIKO AGANPRAKNABE ;  
KAMCHISA DAKMESOKBO.

**Dedicated to my  
affectionate father  
RANGAM G MOMIN**

***First Edition—1978***

***Copyright Reserved***



# **This book belong to Go JANAPCHENGANI**

Onkala classrango poraigiparangna mangsonge A'chikku-chi segimin poraigni k'atprang da'omangde aditan ong'kataha, indiba school ba collegeni chukala gadango poraina segimin k'itaprangde namon komikuenga. Indaka miksonganiosa ia k'itapko anga seaha. Ia chongipa k'itapko mongsongbate ming gittam ja'pang kattarango pangchake anga seaba :—

1. An'tangtangni gimin u'ie-ra'ani ;
2. Sakgipinrangoniko namako skie-ra'ani ; aro
3. Nama janggi tanggnina an'tangtangko tarisoani.

An'chingni poraibagimin k'itapranggo a'gilsakni dintang dintang kamrangni, manderangni aro biaprangni gimin skie-ra'baaha, indiba ua k'itapranggo jattangni manderangni, a'songtang-chigatangni aro uamangni kamrangni giminde bang'gija janapanisan dongaia ba janapanian dongsrangja.

Changa-sapbatgipa aro skia-man'batgipa gipin a'songrangni aro manderangni kamrangko u'ie-ra'ania uamangni kamrangko ja'rikpana an'chingna dakchaka, indiba an'tangtangni gimin name u'ichengania ua kamrangko chur'sokbate aro mangrakbate ja'rikna an'chingna dakchaka. An'chingni ma'gitcham pagitchamrangni gitcam dakbewal aro niamrangko bang'batakon see rakkirika dongjani gimin uarang da'o ka'sine ka'sine gimaroroangengaha. A'chik jatni daka-rikatang kamrangkon ma'sijani gimin an'ching sakantian kratcha'ana bate duk man'nasa krabata. Uarangkoba poraigni bak dake ra'gatode, an'ching sakantiko gisik ra'attaipilna dakchakasan ong'jawa, indiba uaragoni mitam ba bang'akon an'chingui skia-man'a ia chasongo dintang bimango ra'gate jakkaltogipa ong'atna man'naba dongachim,

Mandeni janggi tanganio uko ong'siatgipa, duk aro sikkim-  
 anio ga'akatgipa ja'pang a'sela uni ong'sia kam-cholon,  
 namgijagipa bewalrang, an'tangko u'linikani, aro aratani  
 ong'a. Ong'siao ba duko ga'akna skang mikrakatsoani ba  
 champengsoani maiba kattarangko mesoke on'anina indaka  
 kamrango ga'akgnioniko mandeko chelchakatsona dakchaka;  
 ong'siao ba duko ga'akmane janggi tangenggipa manderangna  
 naljokatani cholrangko mesoke on'aniba, uandaken, nambata  
 aro krabata janggi tanganiona an'pilbaatna uamangko dak-  
 chaka; pangnajolna changchipgija ba u'ichipgija sichipangana  
 batede tangengmitingo dal'a kratcha'aniko man'emangba  
 manderangoniko je on'tisako skie-ra'anian baditaba chang  
 nambata! Beben, mandeni skie- aro ma'sie-ra'na nanggni  
 kamrang inditan apala aro raka, jotton ka'bebegenchimoba  
 mande uarangko skie- aro ma'sie-ra'tokna amjawachim.

Pa Wilnan A Sangmako uni *Nokma Jaksil Gana* aro  
 angni pagipa, Rangam G Mominko uni *Tangbangani* aro *Maina*  
*Beng'a* ? ingipa, sangrangko ia ki'tapo gatna cholko on'anina  
 mittelbea.

*Shillong, Meghalaya,*  
 June, 1978

DONALD N. SANGMA

# JA'PANG KATTA-BICHONGRANG

			Page
1.	A'chik Ma'gitcham-Pagitchamrang	...	1
2.	Omed—Bak I	...	2
3.	Omed—Bak II	...	12
4.	Ranke—Bak I	...	17
5.	Ranke—Bak II	...	26
6.	Sca-Jotaniko A'chikrangni Man'chengani	..	32
7.	Siju Do'bakkol	...	35
8.	Nokma Jaksil Gana	...	41
9.	Dut Aro Bija Bitchi Jokgipa A'song	...	45
10.	Chapa-Ka'aniko Man'chengani	...	50
11.	Aeroplane	...	53
12.	Hanukkah Aro Krismas—Bak I	...	57
13.	Hanukkah Aro Krismas—Bak II	...	61
14.	Maina Beng'a ?	...	63
15.	An'chingko Sason-Ka'giparang	...	67
16.	An'chingni Songsul-Noksulrang	...	71
17.	Bilko Krae Jakkalani	...	75
18.	Gipinrangni Kamrang An'chingna Namgipa Sakki		79
19.	Kamni Bite	...	84
20.	Tangbangani	...	88
21.	Janggi Tangani Cholrang	...	93
22.	Git Aro Doka-Dam'ani	...	97
23.	An'chingni Kragijagipa Bewalrang	...	101
24.	Namgipa Nokdang	...	107
25.	Kusi Ong'batsranggipa Mande	...	112
26.	Miksonga Gnang Janggi Tangani	...	117
27.	Tikkelani Aro Chu'sokani	...	120



## A·CHIK MA·GITCHAM-PAGITCHAMRANG

Skang chasongrango an'chingni A'chik ma'gitcham-pagitchamrang da'ororo gita janggi tangangjaha. Uamangni janggi tangangani rokom aro bewal an'chingni ia chasongo gita apsan ong'jachim. Mandeni be'en-bimang dal'bata, bil-jak bilakbata aro ka'donga-mangrakaoba skangni chasongrango da'ororona batachim ine u'ina man'ani bang'a sakkirang gnang. Uamangni be'en bimang dal'bata ine u'iani ramrambatgipa sakkiranga uamangni gane sianggipa jaksil ba ugita dakgipa gipin gananirang ong'a. Jakpongo gangipa siltokrangon da'ororoni manderangnade rongrangpilaiaha. Uaranko ganna nampile be'en-bimang dal'gipa A'chikrangon da'ororode dongjaha ine nikna man'a. Uandaken, uamangni bil-jak raka aro bilakani chinko uamangni jakkalanggimin mil'am-seppirangoniko nie u'ina man'a.

An'chingni ma'gitcham-pagitchamrang gipin jatna bamna siggijagipa, ka'ting-ka'grak dakgipa, gipin jat baksa nangrimgrikigijagipa aro mande so'otragkiparang ong'achim. Uamang chonchongipa gittimrangosa tok dake dongachim aro a'kaweni songsul-noksulskarang baksa bobil ong'grikkam-aiachim. Uamangni songdong-a'charam a'dokrangba namen ga'nanggijagipa, misil misil dakpilgipa a'bri buringgripisa ong'achim. Ua biaprangona re'angnaba re'tojachim aro rama grichim. Ua a'dokrangba bobilrangni dongprue chakram kilarang gitasa ong'achim, aro ua a'dokrangni ga'nanggija aro ninangijanian uamangni mamingnaba kengijaniko aro darangnaba bamna siggijaniko mesokani chin ong'achim.

A'brini manderang ine an'tangtango ma'ekatna "A'chik" ba "Mande", aro a'kaweni manderango, mongsongbate Bengalirango, "A'jong" ba "Rori" ine uamang mingachim. A'kaweni manderango indake ma'eke mingania "A'chikrangni

## 2 NAMBATA JANGGI TANGGNINA SKIE-RA'ANIRANG

kosako mamingkoba dakchakna amgijagiparang" ine chonnikna mingani ong'achim.

A'kawe jolrango songdonggipa a'kaweni manderang aro gipin jatni manderang A'chikrangna kenbeachim. Mongoliani ka'namgijagipa manderangko agana gita, pil'ni pil uamang a'kawerangona re'bae ua jolo songdonggipa manderangko gitok sote an'tangtangni songdongram biaprangona re'angpilrongachim. Badita sak mandeni skoko sotna man'a, inditasa uamang rasong chaachim; uni gimin mesokna uamang an'tangtangni sotgimin skorangko rengsi sike pakmarango sitee ringsole donachim.

A'kawerangona re'onange ua bakrangni manderangko sko soteon, ramram kusi ong'aiana ba maiba an'sengani kamnasan indake dake roaiaha ine ramram chanchiatna neng'ani gnan, maina gitok sotani ja'mano A'jongrangwi cha'ue rimbite ba nokkol ita man'e dongenggipa A'chikrangko uamang jokateskaaha aro an'tangtang baksa rimba-pilaha ine agana. Uandake iako dakania uamangko a'jak sokpilna aro mandetangrangko jokatpilna dakanisa ong'batachim ine u'ina man'a.

Serikanirangoniko nikani gitade, changsasan mangmang 1671 bilsio, A'chikrang gipin jat Ahom manderangna chake napdrabaenggipa Mohammedanrangko a'rikatpilna dakgrikpaaha. Una agrede a'kaweni manderangko mitchiani aro bobil dinganio bang'a changon warachakna dakani kamaranga ong'bataha ine nikna man'a. British Sorkarini dongimin badiaba niamranga A'chikrangni jakkalbaenggipa niamrangko perani ba champengani ong'achim, jekai, sko sotani, a'kaweni antidamrangoniko matchu, do'bok, do'o ba uamangni je mikboka bostukoba A'chikrang kole ba sale ra'baaiiani, jekon gitok sotaniko champengani chol ong'gen ine A'jongrang uamangna indin on'ataiachim, ba dakmalgijagipa kamrangko ka'atani, jekai rama-sorok suatani, kam ge'etani, ba mainaba manenga-saiani.

A'chikrang Goalpara aro Mymensinghni a'kawerangona re'angrongbataha. Golmal ka'beengani gimin uororomitingo Councilni Governor General ong'enggipa, Lord Cornwallis, Daccani Commissioner ong'enggipa John Eliotko A'chikrangni

a'dokona re'ange niroroechina watataha. 1807 bilsio bang-gija salrangni gisepon a'kawerangona changbri ong'onange Sorkarini rikgimin nok te'gniko nosto ka'eaha, adita song-rangko wa'al so'e galbaaha, me'a-me'chik sak kolgriksniko gitok sote be'en bimangrarako sko gri gale donbaaha. Uni jasamangni ja'manon Sorkarini dongipa pulis kotokni sim-sakanio dongenggipa, uamangoni mailgnimangmang chel'ao donggipa songoniko ka'saninggija dake me'chik sakbriko gitok sote saksa me'asako an'tangtangni dongramona sike ra'baaha. Ua mandeko ja'mano uamang saknaate roe so'ote galaha. 1852 bilsio Goalparani salgro a'kawe jolona jagit-tamni gisepon changsni napdraange sak sotbri batpile sko soteaha. 1856 bilsioni dipetan a'kawerangona re'angronge mande so'otani bilongroraaha. 1857 bilsini May ja aro 1859 bilsini October jani gisepo Goalparani a'kawerangona changskuna kingking re'onange sak kolgrik manderangko sko soteaha. Golmal bilongrorobaani gimin 1860 bilsio British Sorkari ja sko-sotraggipa aro an'chi-ringraggipa A'chikrangko bamatna ine salgipeng gita dolsa aro salgro gita dolgipin bilakgipa sippairangko watataha. Ka'mik-kenatna aro bamatna dingtang cholrangko Sorkari dakmano-mangba, 1866 bilsini a'bachengachibara Mymensinghni a'kawerangona re'ange mande so'otetaiaha.

Rim'gittanganga man'gipa Bengalarangko mande siani salrango gisepo gitok sote so'chaprongachim. Indake dakani mangsongania, A'chikrangba uamangko sinjete roenggipa manderangko chikchakna aro warachakna bil gnanng ine dakmesokani chin ong'achim. Indaka kamrangko uamang dingtangmanchagipa salrangosa dakachim.

Jakgitele dongenggipa mikmalgijagipa A'chikrang dokkol ka'aniko on'tisaba namnikjae British sippairangko warachak-taitaiaha aro baditaba chang amatpila gita ong'aha, indiba A'chikrang amchakjaha. Bon'kame uamang Rongrenggiri songsepang Matchu-Rong'kreng minggipa songo British sippai kotokko warachakaha. Sorkarini sippairango chel'beonin wa'alchi goatna man'gipa sel'u dongana ine A'chiksangona katta gipangaha. Uamangko dilenggipa chalang matgrikrang, Togan Nengminza aro Gilsang Dalbot, jemangan uamangni

#### 4 NAMBATA JANGGI TANGGNINA SKIE-RA'ANIRANG

gisepo ka'dongbatgipa dilgiparang ong'achim, iako warachakani cholko sandidilaha. Wa'alo so'gitchake wal'chagipa sel'uko te'rik pangmao su'proton wa'al siaia ine uamang nikaha, uandake uan warachakani namgipa chol ong'a ine uamang ukon dakna miksongaha. Bean bebe, warachakna-nasiengipa sakantian uni seppio te'rik re'suko baditaba mitap kadapaha. Kenna nangani a'sel dongjaha ine chanchie ua A'chik matgrikrang pringwalsao Sorkarini sippairangko dingna ine man'adipet sepangona sruksruk maluangaha. Sorkarini sippairang a'a baangao a'tip dake dongengachim. Ua A'chikrang uamangko so'ottokna man'gen ine chanchie bobil dingani ku'rangchi chrik-hohoe chadrapaha, indiba baanggipa biapona soksrappijan slai goani gam'ana uamang jagipue kena napna a'bachengaha. Gnigipa chango slai gotaion uamangko dilgipa aro ka'dongbatgipa sakgnide guli nange a'ao gitilaha. Iako nikon ka'dongani grisrangaha ine-nike, chrik-a'bokbildange an'tangtangni mil'am-seppirangko a'ao galbrake bobil dinganiko watgalaiaha.

1863 bilsiona kingkingde A'chikrang namen ka'ting aro mande so'otrakgiparang ong'ani giminan, bilakbegipa British sippai kotokmangba A'chikrangni a'dokrangona napbana pa'sokjaha. Uamang baditaba chang napbadrae niaha, indiba ia ka'ting-ka'grak dakgipa A'chikrang uamangko bobil dinge warachaksoaha aro napbana cholko on'jaha. Indake dakani giminan, ka'mikkenatachi aro sinjetachide mamingsaloba uamangko bamatna man'chongmotjawa ine ma'sie aro ka'o nangjole, uororomitingo Bengalni Lieutenant-Governor ong'enggipa, Sir William Grey, ia ka'namgi-jagipa aro an'chi-ringrakgipa A'chik jat ingipa gimikkon ma'kimaatna nanggen ine British Sorkario hukumko bi'pilaha. British Sorkariba iani gimin chanchie nibebeaha, indiba iako chu'sokatna kam ka'na skangan gipin nambata cholrang ong'kataha. Ka'mikkenatachi ba sinjetachi ong'gija Isolai ka'saaniko uamangna chinapatna man'aha. Uachisa uamangai ka'ting-ka'grak dakani aro mande so'otrakani gisikko ka'sine ka'sine nom'angatrورونا man'aha.

A'gilsakni dingtang dingtang bakrango donggipa, jekai, Americani jatrang, Red Indian jatrang, Negro jatrang, Spanish Mexican jatrang, ua a'dokrangona re'angmitingo



nikpakanggipa jatrang aro A'chik a'songona re'bamitingo  
 nikpakbagipa pilak jatrangni gisepomangba be'en-bimang  
 mangkimao, ka'ting ka'grak dakao aro dakgrikrakani mik-  
 kang bimango, A'chik a'songni diltugipa biaprango donggipa  
 A'chik manderang gita dakgipa darang jatba dongja ine  
 Rev. Keithni A'chikrangko de'mittle aganani kattako  
 seskaaoniko nikna man'a. Unbaksaba, a'gilsakgimiko ka-  
 ting ka'grak aro ka'namgijagipa kamrangna mingsingbatgipa  
 Mongoliani manderang aro Saliram A'songni dakgrikrak-  
 batgipa Aryan jatni manderang baksa toe A'chikrang an-  
 chi-ringrakgipa aro namatna man'chongmotgijagipa jat ong'a  
 ine Rev. William Carrey agana. Mikkang bimang mangkima  
 aro ka'ting ka'grak dakani chinko A'chik a'songni diltugipa  
 salaram-salgipeng Siju-Rewak song jolo songdongenggipa  
 Atongrang, aro A'chik a'songni badiaba badiaba jolni  
 manderangoniko da'asalona kingkingba nikna man'engpitti.

Da'asalo A'chikrangni jaksrama, gisik nama, sontol ong'a,  
 soka-chakna kusi ong'a aro toromo janggi tangenganiko nie  
 skangni chasongrango an'chingni ma'gitcham-pagitchamrang  
 indakpile ka'ting ka'grak, mande so'otrakgipa aro ka'namgi-  
 jagipa manderang ong'bebeachimma, uarangko chanchie  
 niatpilna da'o aiao inmananisa ong'pilajaha.

---

## OMED—BAK I

1866 bilsio A'chikrangni a'dokona re'baengmitingo Bengalni Lieutenant-Governor ong'enggipa, Sir William Grey, Rev. Stoddardo indakgipa sing'aniko sing'aha : "Stoddard, na'a Assamni A'chikrangona re'angengane?"

Stoddard : "Oe."

Grey : "Na'a A'chikrangni gimin badita u'ia?"

Stoddard : "Bang'e u'ija."

Grey : "Indide anga nang'na indake ku'pattiatna aro mikrakatna. Uamangde an'chi-ringrakgipa, mikmalgijagipa manderangsa ; mangkimaate galako man'nasa kraaia. Ia kamni gimin Sorkari da'o jako ra'enga."

Indakpile mikmalgijagipa A'chikrangni gisepo Omed mikmalchenggipa ong'e, jatangni manderangko mikaoatna aro jatangna namgniko ong'atna Kristian missionaryrangko aro British Sorkariko bilongen dakchakaha.

Omed 1832 bilsijolo A'chik a'songni salgro-salaramo donggipa Dambora songo atchiaha. Uni mahari Wa'tre aro katchi Momin ong'achim. Chonaonin Omed bi'saskarangni gisepo dilgipa, nikgimin kamrangoniko dake nina sikkigipa, aro mikchikkingipa mande ong'achim. Bolgrip-wa'grip dakgipa songo dal'kapbae mikmalgijagipa A'chik ma'gitchampagitchamrangni janggi tangani bewalrang aro daka-rikani kamrangko chonaonin nikbapaaha. Sikdikdik waljatchimitingo matgrikrangni melaprue songoni sruksruk re'ongkatanga aro baonikoba mande sko ringsolsako an'chichripchrip dake ra'e re'bapilako ua nikrongaha. Chonmiting salrangonin Omed miterangna kenbeachim.

Salsniprako cha'gipa a'kaweni antirangona ma'a-pa aro gipinrang baksa gisep gisep re'angpae mande bang'ako aro rokomari bosturangko ua nikaha. Bigil gipok sahebrangni Bengali ku'sikko uamang gitan aganna man'aniko nike aiao inmanbeaha, indiba pilakna bateba mandeni ku'aganenggipa kattarangko maiba dakgipa chonchonbegipa chinrangchi lekka'o joke serikna aro uarangko agana gita baibai porai-

pilna man'aniko nike ua aiao inmanbataha. A'kawerangona re'angronge Omed Assamese aro Bengali ku'sikrangkoba adita ma'sigipa ong'aha.

Poraigipa manderangko Goalpara skulna Sorkari nang-enga, cha'a-ringani, ba'ra-kancha, aro skianiko indin on'gen, uamangko dal'gipa mande ong'atgen ine 1847 bilsini salsao a'kaweni antidamrango aganpraka gnanngchim. Ia kattako kna-ahaon Omed, uni gritang Reban aro sakgni gipin manderang, Ramsing aro Jongrin, Goalpara skulona re'angaha. Omedni bilsni unomiting bilsni 20 batahachim.

Goalpara skulo Hindu, Rabha, aro Mohammedan bi-sarangba poraitokengachim. Uano English, Bengali aro Persianiko skiachim. Ua skulo napna ine skigipako grongeon, gipinrangde napna man'gen, indiba bridugaaha ine Omedko rakkina jechakaha. Omedko rakkijaode gipinrangba dong-rikjawa ine krentokani gimin, bon'kamao ukoba rakkina ga'akaha. Chonkalgipa gipin bi-sarangko nirok-simsakchina ukon donjolaiaha.

Bilsigni batangahaoba maming man'dapaniko nikjae, Omed aro Ramke Lieutenant Agnewni nokona ka'donge re'ange, uamangna skienggipa mandeni jakchi bilsni kolgrikna skianiko man'oba mamingkoba skidape ra'na man'jawa ine nalis ka'eaha. Ua saheb ua skigipako okamate uamangni mikkangon bichal ka'e uni kamko bon'jolataiaha. Gital skigipako bi-sarang namnikbeaha aro de'mittelbeaha.

Bi-sarangni gisikko bariatna ine Sorkarini karoschi Songdu chibimako chododilange Gauhati songjinumako nidileaha. Gauhatio Sorkarini sippai dolsa gnanngchim. Uko nike bi-sarang ka'srokbeaha. Jongrin aro Ronja sippai napna biming on'aha. Omedkoba napchina aganaha, indiba jechakaha. Goalparaona pil'bana ine ring bolsako tik ka'engmit-ingo saksas officer uni bimingko sing'aha. Uni bimingko on'ahani gimin Omedba sippai ong'aha aro ong'na jechakode una dal'a sasti sokbagen ine ua officer una aganaha. An'tangba agrede jechakna sikjoljae Omedba sippaio napna ga'ake Gauhatio dongrikna nangaha.

Attamsao mission compoundni mande grigipa bangala nokko nitimengmitingo, a'ao ga'ake dongenggipa Bengali chapa ka'gipa lekka jakrangko nike Omed uarangko poraie

## 8 NAMBATA JANGGI TANGONINA SKIE-RA'ANIRANG

nina sikaha, indiba uni havildar porajjachina uko bengaha. Attamangahaon itrokgipa mande uaranko itrokeon an'tangchina balpakanggipa mitam lekkarangko Omed srukruk kole rarikaha. Ua lekkara *Apatti Nashak* ingipa, Kristianrangni kosako Hindurangni segipa lekka ong'chim. Uko poraie nie, Hindurangni manienggipa toromba namem bilaka aro altuaede jena amgipa torom ong'ja ine Omed nikaha. Ia lekka uko gisiko nangatbeaha.

Hindu, Mohammedan aro Kristian toromrangni gimin Omed tosusae chanchitaitaie niaha, indiba Kristian toromkon nambate niktelaiha. Omed ia toromni gimin un baksa kam karimksa saksa Bengali sub-overseer, Samuel Lovedayo tale sing'e ra'aha. Salsao gipin toromrangni manderang baksa toromni gimin Samuel Loveday jera ra'susaaha. Unon Kristian toroman nambatgipa torom ong'a ine uan amaha. Ia kam Omedko gisiko nangatbataha, indiba Samuel una bilsio komibatani gimin, Omed an'tangna bilsu batgipa Kandura Babu baksa toromni gimin ning'tue agangrikaha. A'chikrangode dingtangmancha toromba dongja. Mohammedan toromni gimina name a'ija ; Hinduranga jat mania, aro uko ra'genchimode alokgala man'gen, uni gimin Kristian toromko ra'on mamingchiba ja'guani dongjawa ine Omed chanchiaha. Ua somomitingode Kristian toromko ra'gipa manderangba bang'kujachim, indiba gisiko salako man'e ia toromkoan ra'china ine Omed gritang Ramkenaba chittichi seataha aro kutangchiba aganaha.

Kristian toroman nambatgipa torom ine chanchie chol man'chengon Omed napbolna gisiktango rake chanchie dongaha. Ia toromko ra'nasiengaha ine chanchion, an'tangko ua nambate, kam-cholon rongtalbate aro gisiko mangrakbateba nikaha. Rev. Carrey agana, *A'brini manderangni bilgriani mongsonggipa ja'pang a sela churing-chunekani ong'a*. Indiba Rev. Bronsonni kattako changsao knae. A'chik songsarekrangni watna neng'nikbatsranggipa ia chu ringanikoba ua wataha. An'tangni kamrang aro miksonganirangko ua an'tangni ripengskarangna, rorimskarangna aro Ramkena chittirangchi see u'ataha.

Napbolatnasigipa mande Gauhatio ua somoio dongjachim. Uni gimin Nowgonyoniko Rev. Bronsonko okamatna

nangaha. Napbolna skang adita sing'anirangna uni kam changa, uni nama aro kam-cholonni gimin uni Major Saheb Omedni pal agane on'on, ra'chakako man'e, February 8, 1863, Robibar salo, Gauhatini soroksam Songdu chibimani Sukheswar Ghato American Baptist Missionary, Rev. Miles Bronsonni jakchi Omedko napbolataha. Napbolatengmiting so moi tiktako napbolatchakenggipa biaponi on'tisa chikosako donggipa Umananda chichangni mite noko konta dokenggipani gam'a uamangko ra'bienga gita ong'achim. Omed baksa uni gritang Ramke aro gipin sakgittam manderangba ua salo napbolatako man'e, Omed aro Ramke mamasaan A'chikrangni gisepo skanggipa Kristianrang ong'chengaha.

Napbolani ja'manon an'tangni jatska A'chikrangni a-dokona re'ange Isolni Nama Kattako aganprakna missionary grima ine Omed sing'aha. Gnangode un baksa re'ang-pagenchim ine Omedni aganon, Ramkeba mamatang baksa re'pana sikaha. Omed. jattangoniko ong'gija, Kristian ong'gijagipa Epiri minggipa Assamese me'chikko kimachim. Setangni Kristian toromko ra'aniko Epiri namnikchakjaha, indiba kang'kare kae Nama Kattako jatangna aganprakna setangni re'angna miksonganiko ua namnikpana nangaiaha. Uandake, uni miksonga kamtangko ka'china ine 1864 bilsini March jao uni ka'enggipa sippai kamoniko Omedko jakgitel wataha.

Adita salrangni ja'mano, Omed, uni jikgipa aro uamangni dedrang sak gittam, Ramke aro Suban ring bolsao Songduko choonbae Goalparaona May 10 tariko sokeaha. Pilakna skang Omedma'ang ma'drangtangrangna uamangni kam aro miksonganiko parakchengaha. Damrao ge'sa skulko kulie Ramkechi chalaina aro Omed an'tanga wilwilao donggipa songadamrangona songreroroe toromni gimin aganprakaha. Omed antidamo Nama Kattako aganprakchengaha. Uamangni skanggipa miksonganina atchiram songtang. Mat-chokgiri Dambora aro Wa'trepara ong'achim. Gana-china-nirang, mikkang-bimang aro ku'rangrang dingtanganina songtangni manderangan uamangko nitatchengaha. Uamangni re'angani miksonganiko u'jahoon, ma'drang-bakdrangmangba

## 10. NAMBATA JANGGI TANGGNINA SKIE-RA'ANIRANG

namangko noka-chaksona sikbrejaha, indiba Isolo bi'taitaie aro ka'dongbee noksaoni nokgipinona re'roroe, bon'kamao songgimikni manderangko nokpante nokmikkango tom'china aganna man'aha. Songni nokma, songko dilgiparang aro songpanggipa gipin manderang duule asongbel'dake mik-kangtangtango a'ao mil'amtangtango su'prote dontokaha. Omed chadenge aganna a'bachengon pilak tom'bagiparangni mikronrangan uchipaksatokjok. Manderangni gisikko u'isoe Omed uni agananiko indine a'bachengaha :

"Jong-adarang,.....A'chikrangde mite donga ine bebe ra'a, indiba dongja. Isol saksasan bil gnang aro Isol'san nama. An'chingsa namgijagiparang. An'ching pilakan pap ka'aha, aro Isolni bilakgipa bil an'chingni kosako ong'a. An'ching mai dakgnok ? An'chingde mainingkoba dakna amja. Indiba saksu gnang jean an'chingna pilakkon dakaha. Uaba an'ching antangta'ng gitan mandesanchim, indiba Isol gita nameipachim. An'chingko jokatchina uko watataha. An'chingni paprangna sikbee ua antangko on'kangaha, aro bebe ragiparangko kema ka'gen. Siani ja'mano ua chakat-pilaha, aro tangchapile da'ode Isol baksa dongenga. Jedakode namgiparang ong'bana man'gen, una ka'sagiparang baksa ni gisik gnang. Jensalo sia, uamang un baksa ong'papa uona re'anga, jeon duk ong'ani ba saa-ding'ani ba pap gri. Iasa chong'motgipa torom. Chinga, na'simangni jongdrang, uo bebe ra'e katongo katchabeenga. Miterangko maniako watgale Isolona pil'angode pilak A'chikrangba ia kusiko man'gen. Uni giminsa ia Kattako chinga na'sinangna ra'baaha".

Omedni aganpraka matchotarin knatimgipa manderang ka'o nangbee tengtang tengtang inbildangtokaha : "Mai ?? U'aba A'chik, A'chikni de mangmang, A'chik jatgimikna u'abata ine antangko ohanchie nangna bagiparangna ski-prakenzama ? So'otna ba saknaatna miterango bil dongja ine miterangko ohonniko, indake chingna tol'e aganena indake nara isonona re'bana pa'soka ? Nang kattarangko miterang knaaha, da'ode a'jak sokegnok. Nang'na maiba ba'el sokbarana gita gisik rakho. Chinga nang'ko ja'rik-berwe ! Chingade indakpile gokagiparang ong'ja. Sawa nang toromna simsaka aro sawa uko ra'gen ?"

An'tangtangni miterangko chonnikahani gimin uamang gisik sabeaha, ka'o nangbeaha aro Omedke so'otna ku'chingaha. Aganprakmanahaon knatingiparang chonpikbijdange, ong'ae-ong'jae agane katbildangan tokaha. Indio-mangba, uamangoni bang'batan Omedni aganprakgipa kattaranga namade nambebea ine gisiktangtango chanchie re'angaha.

---

## OMED—BAK II

Omed aro uni jikgipa, Rajasimlaona re'sotgipa rama sepang, chiring sepango noktop ge'sako rike uo dongaha. Uni samtangtangchin matcha-mongma aro kengnigipa matburingrangan gapaiachim. Jadokmangni ja'mano Omed Watrepara songona re'ange, man'adipet ru'ute uano saldongkame Nama Kattako aganprakroroaha aro manderangko mol'molaha, indiba manderang ka'dingsteke aro chonnikesa uamangko songoniko rikgalataha. Toromko uamangni ski-prakengmiting salrango salgni salgittamni gisepon mariki sae sakchet manderang siangaha, aro uara Omedma'angni a'selsa ong'a ine manderang chanchiaha. Uamangni saksas degipaba uanon siaha. Uanoni katbapile nok rika matchotkujana kingking uamang antigittamna matcha-mongmagrimo bol ja'pangrango waltuna nangaha.

Bilsisamangni ja'mano Omed an'tangni gital nokapni samtangtango baangdapatroroe mi-misirangko ge'aha. Saksani ja'mano saksas Omedni manderangba uamang baksa dongepaaha. Uamang mite olakkianiko watgale gital toromko skie ra'aha. Indiba ia kam songsarekrangko ka'o nangatbeaha. A'brio songdongenggipa manderangni gama-ge'anirang namrorojana a'bachengaha, chiringrang chonroroangaha, antisa antignina sengoba mikka wajaha, boli on'taitaioaba mikka wajaha. Iarang pilakan Omedma'angni a'sel ong'a ine uamang chanchiaha. Indiba uamangko ka'o nangdapatkuna ingipa gita, mite dongja, mikka waatna miterango bil dongja, uarang pilakan manderangni bebe ra'gramaianisa ine songsarekrangni miterangko ra'bie aro chonnike aganmano, uni aganprakani pilak kattarangko kamchiba dake mesokna Omed mangsongaha.

Rajasimla songni salaramchipak put 2,000-mang chugipa Koasi a'bri gnan. Ua a'brio miterang donga, ua miterangko namnikatna bolirangko on'na nanga ine songsarekrang bebe ra'achim. A'brini sam, bol aro wa'arangko manderang on'a



tisamangba den'tikjachim. Ua a'brio mite donga ine bebe ra'e manderang kenengani gimin, ua miterango bil dongja ine manderangna kamchi mesokna Omed nangnikbeaha. Koasi a'briana Omed sakgni manderangko rimbintangaha. Kosakona sokangon, songsarekrangni rongtalgipa boli on'chakgipa ro'ongrangko ga'ruruaha, bolrangko supeaha, aro sakkina gita adita wa'arangko den'e kasote re'onbaaha. Ong bitipko golmal ka'ata gita, manderang ong'katbildange ka'o nangbeaha aro Omedma'angko mitam so'ote galjolna am'aha, gipinranga gipin cholrangchi nisina ku'chingaha.

Songsarekrang uamangko so'ottoke galnasiani gimin Omed aro un baksa dongpagipa jakchomsa Kristianrang kengija dongaiade ong'jaha. Uamang badiaba chel'a biapona kate chakode jokani cholko dakna mau'naba dongachim, indiba uamang ua biaponi on'tisaba jitjaha. Batesa mingsa aiao inmangni kam ong'aha: Kristian ong'kugijagipa songsarekrangoni mitam Omedma'ang baksa dongrimpanasa re'baaha. Ia kamrangchiba Omedni gisik aro ka'tongko didiatdapaha.

Miterangni dongramko nosto ka'a, chonnika aro kal'steke roani gimin manderang Omedma'angko so'ote galna mangsongahaoba, mande so'otanina Sorkari uamangko rim'skae pasi on'gen ine uamang kentaiaha. Uandake uamang miksongatangko parakna aro bakbak dakna pa'jaha. Mande so'otmano uamangko rim'a man'ode dosi dakgiparangko pasi on'asan ong'jawachim, indiba uamangni nok-jamrangko wa'al so'e gale dintang dintang sastirangko gipinranga man'pagenchim.

Omed uni gritang Ramkeni jakchi Goalparao dongeng-gipa Boro Sahebna ia jakchomsa Kristianrangko songni manderangni so'ote galna melapruengani kattako chittichi see u'iataha. Boro Saheb rang'sanan ia kamko jaktango ra'e Rongjuliona sak 50 sippairangko rime re'baaha. Ia salrang gimiko mandeskarangna kene Omed, uni jik-dedrang, Ramke aro gipinrang walgimikgimik walmikrake walsengesa dongtokna nangaha. Ia salrang gimiko Omed aro Ramke Isolo bi'aniko dondikjaha,

## 14 INAMBATA JANGGI TANGGNINA. SKIE-RA'ANIRANG

Rongjuli antini salo Boro Sahebba uano gnangchim. **Ua** jolrango donggipa songrangni pilak nokmarang aro dilgiparangko okamchimongate bichal-ka'na Boro Sahebni mikkango chadengattokaha. Boro Saheb sing'aha : "Na'-simang ia manderangko so'otnakengane ?" Songni dilgiparang aganchakaha : "Oe."

**B. S. :** "Mai a'selna ?"

**S.D. :** "Maina iamang Kristianrang ong'a aro miterangna kenja."

**B. S. :** "Iara maidakgipa a'sel ? Angaba Kristian. Angkoba so'otgenma ?"

**S.D. :** "Iamang indakgipa bimingko ching a'dokona ra'-baaha. Chingade pangnaba iako knakujachim. Ching-na iako nangja."

**B. S. :** "U'igija dongara namja. Uamang mai maiko agan-enga chanchie nibo. Bisongba A'chikrangan."

**S.D. :** "Chinga chanchijawa. Miterang ka'o nangenga. Miterang uamangko a'jak sokgen."

**B. S. :** "Indaken ong'china. Indide mainasa na'simanga golmal ka'paenga ? Uamang ma'eke dingtangsa dongenga. Uamang ma'eke dongaichina."

**S.D. :** "Iamangan miterangko ka'o nangatgiparang. Uamang re'baani gimin mariki saengaha aro mikkarang wajaengaha. Uamangni iano donga gimik chingasa duk man'na nanggen. Uamang sichongmotna nanga. Miterangan bisongko donjawa."

**B. S. :** "De, indide miterangan uamangko tik ka'china. Omed miterangni niamrangko pe'ahaoba miterang da'onaba uamangna mamingkoba daksakaja ? Indiba gisik rakbo, na'simang iano jakdangdikode, anga na'simangko tik ka'skana nanggen. Na'simangde u'ijaenga. A'gilsakgimikon ia sakgni Kristiansan dongaia ine na'simang chanchia, indiba hajalni hajal gnang. Ia manderangko jakdangdikode na'simangko sasti on'na uamang re'bagen. Mite dongeng dong-jaeng, an'ching mande so'otjawa."

Pilakan jrip dongtoka.

B. S. : "Ma'siahama ?"

S.D. : "Ma'siaha."

B. S. : "Indide gisik ra'bo aro manibo."

Bichal ka'a matchoton songni dilgiparangko re'angna wataha. Rang doktengtengate anti cha'na a'bachengtaijaha. Boro Sahebni kattarangko manderang aganrikrikangaha, knaroroangaha aro chanchigrikroroaha. Gipin a'dokrangonaba uandaken ia katta giproroangaha. Ia A'chikrang uamangni ku'rachakani kattako badita ru'ute rakkigenchim, aganna man'jachim, indiba ua somoimitingchachaon jimbegipa mikka wabaaha. Uamangni bebe ra'gipa miierangan bilgribebesakon ine nitam songsarekrang chanchipilbebeaha.

Adita sak A'chik Kristianrang ong'katahaon, ka'dongsoaha gita, Omedan uamangni skanggipa Pamong ong'aha. Saheb missionaryrang Omedni aiao inmanpilgipa kamrangni gimin agantaitajaha. Omed saksamangmangan andalao dongenggipa aro skia-man'kugijagipa manderangna sak 12 Kristian missionaryrangni dakna man'ana baten changbate aro chursokbate kam'araha ine missionaryrang an'tangtangba sakki on'e aganaha. 1908 bilsimango A'chik Kristian ong'giparang sak 264-na bataha. Omedmarang an'tangtangko Jisuni sippairang ine minge aganrongaha.

Omedan A'chikrangni gisepo skanggipa Kristian ong'e, A'chikrangni a'doko Rajasimla songan skanggipa Kristian song ong'chengaha. 1867 bilsini April jao skanggipa A'chik Baptist Mondoliko Rajasimla songo songaha. Songchengon ua Mondolio me'a aro me'chik gimik gimang sak 27 gnangchim. Omed bils 19-na kingking mamingba neng'nikgija aro jechakgija Isolina dangdike on'aha. Kristian missionaryrang Rajasimlako A'chik a'dokni Jerusalem ine mingkalake rorongaha.

Mondolini kamrangna agreba, songsarni aro nokdangni bidingrango jegrik-nangrika aro gro-a'sel jeani kamrangoba Omedan bichal ka'gipa aro rae on'timgipaba ong'aha. Kristian ong'gijagipa A'chik songsarekrangba iani bidingo Omedko mande ra'beachim aro mittelbeachim.

## 16 NAMBATA JANGGI TANGGNINA SKIE-RA'ANIRANG

A'chik mondolirango nirorona aro A'chikrangna Kristian missionaryrango watatna chol donggenma dongjawa, iarango sandina ine Dr. Bronson A'chikrangni a'dokona re'angaha. Uni re'ango ua adita sak A'chikrangko napbolataha. Ua somoiona kingking Kristian ong'kugijagipa, Omedni jikgipa Epirikoba. uandaken, 1867 bilsini April 14 tariko Rajasimlao napbolataha. Epiri segipana skang siangaha, indiba skangna bate nambata bewalo aro Kristian nokdango siangaha.

Uni bon'kamgipa salrango Omed duk aro ong'siao janggi tangangaha. 1872 bilsioni dipetan ua be'en bilgrina aro saa-ding'aniko man'na a'bachengaha. Indiomangba Isolni kamko ka'na ua mamingsaloba jechakjaha. Malame re'na man'enga dipetan sepangkalgipa songrangona re'ange Isolni Nama Kattako aganprakeaha aro manderangko napbolatekuaha. An'ma-goka gita dakgipa rokomsa sabisiko man'aha aro chu ringna a'bachengtaiaha. Chang gittamna kingking uko Mondoli-a'pal donaha; changgnina kingking uko rimnappilaha. Gittamgipa changna Mondoli-a'pal donako man'on, gisik pil'taigija aro Mondolio ra'napako man'gija ua sichipangna nangaha. Kenaniko kena minggija, ka'tingka'grak, mande so'otrakgipa aro mikmalgijagipa A'chikrangna dondikgija aro neng'nikgija uamangni namgnina aro Isolko u'ichina rakbee kam ka'gipa, A'chik jatni bil'cham, ia Omed, bilsu chi'brina kingking be'enni saa-ding'aniko man'e, bilsu 70 ong'ahao 1902 bilsini April 17 tariko indaka obostao a'gilsakko watangaha.

---

## RAMKE—BAK I

Makmalgijagipa A'chikrangni gisepo mikmalchenggiparang aro mikasalchenggiparang ong'e, Omed aro Ramke A'chik jatni gisepo teng'sugipa askirang ong'a. Da'asalo A'chikrang jedakgipa gadango ong'enga, maidakgipa toromko ra'enga, maidakgipa bidako man'enga, maidakgipa gadango janggi tangenga, —iarang pilaknan Omed aro Ramkena A'chikrang gro nangbegiparang ong'a. Jekai Omedsa A'chikrangna Kristian toromko basedile an'tangan ia kamna Pamong, Procharok. Missionary aro Ukil ong'aha, uandake Ramkeba ianan Pamong, Procharok, Missionary, Skigipa aro Lekka Serakgipa ong'e A'chikrangna toromko aro bidako satangaha.

Obostarangchi draatako man'e, Omed aro Ramke chonaonin dal'rim-rorimbae, uamangni janggi tangbaani aro kamka'anio ekgrikna man'gijagiparang ong'baaha. Omed Ramkena bilsidok ba bilsichetsan batajachim. Ku'monggrikani apsan, miksongani apsan, A'chikrangni itihaso Omedni bimingko janapon Ramkeni bimingkoba watchangna man'ja. Uamang sakgnini kamrango siaona kingkingan ja'dil su-pripkamaha. Saheb missionaryrang Ramkeko Johan gita-chacha toe aganaha.

1836 ba 1838 bilsirangni gisepo Wa'trepara songo Ramke atchiaha. Ua Omedni gritang ong'achim. Chonkuengmiting salrangon uni pagipa uko done siangaha aro ma'gipa sakgipin me'asako kimtaiaha. Uamang wangsa ku'mong-nangrimgrike dongna man'jani gimin, chonaonin Omed Ramkeko nirokna aro una simsakna ga'akaha. Iani a'selan uamang mamasa bi'samitingni salrangonin ekgrikna man'gijagiparang ong'baaha.

Gipin kamrango mamatang Omed gitan apsan ong'e, Ramkeba chonmitingonin sontolgipa, kingkot dakgipa, bebe ra'atango mangrakgipa aro chanchirakbegipa ong'achim.

## 18 NAMBATA JANGGI TANGGNINA SKIE-RA'ANIRANG

Chonmitingni salrangonin uaban songtango aro biaptango A'chik matgrikrangni pilak ka'ra-ka'donga, bilaka aro daka-rikani kamrangko mikrontangchi nikbaaha. Ma'gitcham-pagitchamrangni bebe ra'a, mania, kena-ding'a, dakbewal, ba uandakgiparangni gimin Ramkeba namen talachim aro uandaken uaba uarangko dakbapaaha.

1847 bilsio Captain Jenkinsni A'chikrangna mangsonge Goalparao kuligipa skulo pilak nanga skianirang baksa Kristian toromni gimin skichapanirangkoba on'achim, indiba ia skulko kuliania a'kaweni manderangnasa namgni ong-bataha. Omed aro Ramke, mamasas, iano skianiko man'e gisikni aro u'ianio dingtanganiko man'beaha. Aro ia-mangsan jatangko mikaoatna on'kange kam ka'chongmot-giparang ong'aha.

Ramkeba mamatang Omed baksa Goalpara skulo poraina ine damsan re'angpaachim, indiba antignimangna skang boloni ga'akone jaksamsaon damgni dake greng be'a gnanngni gimin uko skulo rakkijaha. Ga'ake jak aro be'en sakna-beengomangbn Ramke indaka saknaako chakchike, gisiko sikbee Goalparao poraipana che'ele re'angaha. A'ba dangna aro ge'a-gamani kamrangno jaddangdikpana man'jani gimin, jadokmangni ja'mano Rebanni pagipa baksa Goalpara skulko nina Ramke re'angtaiaha. Ua changoba skulo napna ine Ramke mol'moltaibeaha, indiba skul skigipa jechaktaiaha. Uni jak una neng'nikaniko on'engoba, skode namainga, aro uni cha'a-ringanina gipinrang sual-ra'rone on'paaigen, ja'mano Boro Sahchboniko uano dongani hukumko man'on ukoba chu'gimik chatro dakatna man'aigen ine mamatang Omed Ramkeni pal mol'mole aganchakaha.

Nirorodila aro gisikko bariatani gita Goalpara skulni A'chik bi'sarangko Gauhationa rimangon, Ramkeba gipinrang baksa re'angpaaha. Jongrin, Ronja aro Omedde sippai napna Gauhatio ilongrikaha, indiba Ramkede poraidapkuna ine Goalparachinan re'angpilaha. Mamatangko aro gipinrangko Gauhatio wate re'angon, Ramke gisiko aro bilsio dambekuaiengachim. Songdu chibimako Goalparaona cho-onangmitingoba Ramke gisiktango mandeni simano uni janggia maidake bon'a, manderangni janggia miterangni ka'sachakaniosama, indakgipa ning'tubegipa kamrangni gimin rikki-rikkot chanchiangbeaha.

Goalparaona sokeon Ramke gisiko nangbee poraiaha aro skie ra'oba man'ningbegipa on'gani gimin rang'sanan Bengali ku'sikko man'begipa ong'aha. Jak be'a dongani gimin bi'saskarangni kal'grikanirango ua jak on'pajaha, indiba iani a'selan gipinrangni kal'grikengmitingoba saksan chanchina ua cholko man'skaaha. Bang'a changon sikdikdikgipa biap aro ramarango re'e rorongaha, aro rikkit-rikkit chanchianirango saksan chanchie rorongaha. Mande uni janggi tangani krisa simano mande dingtang gadango atchitaia ine Hindurangni bebe ra'ani uni gisikko dongtoatjabeaha. Skia man'gijaba, lekka-pora griba, jatang baksa dongaion miterangnasan kenna nangaiachim; miterangna boli on'ode uamangni ka'o nanganikode namatna man'aiachim ineba uni ka'tongo chanchianiko ong'ataha. Ramke jatangna namen simbrabeachim aro jatangni gimin ning'tubec chanchibeaha. Ia mandeni gisiko so'sojengjeng aro dongtogijani ong'beaha. Indakmiting somoio sani dakchakaniko man'e gisikni tom'tom aro katchaaniko man'gen, ua u'isokjaha. Tangengmitingon nama janggi tanganio tangbajahaode, atchitajon basakobade mandeo atchitaigija wak, matchu, do'o, maiba jo'ong, samsi, bol, ba indakgipa ongipa gadangosa atchitaina nangode, uaba ma'a-patangko u'ipljawaha, ma'a-paba uko u'ijawaha; uandaken uni manderang, uni ma'drang-baksakarang aro ripengskarangni gisepoba u'igrikani chol dongjawaha; gipin jatni manderangde jatang ong'jaode ka'sachakani gisik dongjawa, batesa mikbua, sanala, chonnika aro kal'stekanirangkosa dakgen ine Ramkeni gisiko ma'marikki chanchianirang nabataitaiaha. Jokani maiba gipin chol dongjawahakon ine chanchie uni gisikko duk ong'atbatataha aro dongtojabatataha.

Indake darangniba dakchakani gri apchangket ong'e dongengmitingo, maiba dakchakaniko man'arok ine salgichiko nidoaha. An'tangan maiko dakenga, Ramke aganna man'jaha. Darangni Isolo bi'akoba ua changsaba nikkujachim aro toromni maming ki'tapkoba poraie nia dongkujachim. Indiomangba, Isolde dongchongmota, aro kingkot am'bebeosa uko nikgen ine ua chanchiaha. Sikdikdik dakgipa biaprango aro buring-bolgrimrango saksan re'roromitingoba basakoba basakobade mainaba rang'san kena nape dongnuna

## 20 NAMBATA JANGGI TANGGNINA SKIE-RA'ANIRANG

jotton ka'aha, indiba mai kenani gnang uko ua nikjaha; basakobara an'tango chu'onga gita u'anirang dongpajani gimin ka'siksikeba saksan grappilaha Indiba maiba jokani cholde dongchongmotnaba donga ine uni gisiko chanchiani nabataitaie ka'dimeani aro ka'donganiko man'taitaiaha. Indiba ua somoiona kingking chong'motgipa dakchakanikode ua man'jaha.

Una maiba chinko mesokchina attam gittamna kingking Ramke Isolo bi'beaha. Unon nikronggijagipa, mikchikkim-gipa maiba bimang, uni sepango chadenge, "Nang bi'anirangko knachakaha" ine uni nachikkolo agana gita ua knaaha. Una ong'a obostarangko chanchiate niode, Sadhu Sundar Singhna jekai ong'aha, ua gitachacha unaba ong'aha ine aganna man'a. Ia ong'ani Ramkeni kena aro jajrenganirangko namen ritchengataha aro ka'dongataha.

Ramke an'tangni chanchianirangni gimin maiba sakkiko man'na nangnikbeaha. Goalpara antidam gimikon Hindu-rangni miterangko bimang dake donako nokantio gitan ong'nasipile nikna man'achim. Kali mite me'chikko tarie dongipa mite nok, mitena bibalrangko on'a, montro minga, cha'chat so'a, ganti rengtenga; ku'chokgipa pegittam dakgipa silchonggengko mite nok a'palo songe uno an'chiko toke, so'ottainasienggipa do'bok gisimko; bilsikari somoi soko megapko remreme uni kosako a'ste a'ako on'e miterangni bimangko tariako aro uarango ba'ra ganata, uarangni mikkango Hindu kamalrangni asonge montro minga aro git ring'anirangkoba Ramke nikaha. Uarangna agreba, hol ja'pangrango saksan asonge rongtalgipa ki'taprangko paraie Isolo bi'gipa manderangkoba ua nikaha. Ua manderangni kamrangnasa Ramke gisiko nangbataha. Uamangba Ramkeni gisik sontol aro u'ina tikkelbeenganiko nike, Ramayana, Mahabharata aro Hindurangni indakgipa rongtalgipa ki'taprangko una poraichina on'ataha aro kattarangchiba agan-skie dakchakaha.

Uni poraianirango Vishnuni golpo uko gisiko nangatbeaha. Ramayanaoniko "ua Ramni golpoko su'unikbeaha. Ramni janggi tangani aro uni kamrang Ramkeni janggi tangani aro kamrang gita dakangachim. Skulni ki'taprangko



poraiani ja'mano Ramke Hindurangni rongtalgipa ki'taprangko poraiaha, aro Isolna bateba Ram ba Vishnuan bilakbatgipa aro rongtalbatgipa ong'a ineba ua chanchiaha. Indake chanchien, Brahman skigiparango an'tangni u'ina nangani-rangko sing'e ra'e, uamangkosa mande-ra-beaha aro rongtalnikbeaha. Indiba chong'motgipa toromko uni tikkellbee sandianirangna nambata cholrang una sokbaaha.

Uororomitingo, je mandekon Salaram Bengalni Watataman'gipa ine mingsingpilachim, Baptist missionary, Rev. Ruprecht Bion minggipa Daccao dongengachim. Ua a'dokni wilwilao donggipa biaprangna Nama Kattako skiprakrorona miksonge, dingtang dingtang biaprangona wenroree 1856 bilsio Goalparaonaba salsao ua sokbaaha. Rev. Ruprecht Goalpara antidamo skiprakaha, aro uni skiprakaniko Gauhatio donggipa Samuel Lovedayni pagipa, Ram Jivan Babu minggipa Bengali procharok pe'timskaaha. Uamang sakgni uamangni jaksamgnio chapa-ka'gimin chonchonggipa lekka-rangko ra'bite, skipraka matchoto uarangko manderangna gopriprae sualaha. Ua lekka-rangko man'na manderang chabildangpile krentokaha. Uan ua somoini salrangomanieggipa gipin toromrangni kosako ong'gijanirangko parake seanirang ong'achim. Uamangni aganprakani kattaranga uano dongsogipa toromrangni gimin bebe ra'anirangko ra'biani aro chonnike tosusae aganani kattarang ong'achim. Rev. Ruprechtma'angni aganprakani kattaranga inditan su'ua, ning'tua aro aganmitapa gri parape'ani kattarang ong'ahani gimin, ua kattarangchi bang'a manderangko mikaoataha.

Rev. Bion aro Ram Jivanni re'angani ja'mano uano dongrikigipa manderangsa bildang ong'skaaha. Mitam manderang ua lekka-rangko chitkningaha, mitamkoa ja'achi ga'kninge galaha, galna sikkigigipa mitam manderangni jakoniko Hindu kamalrang ra'sekaha; indioba mitamkode nosto ka'na ba ra'sekna man'jae saniba saniba jakrango ua lekka-rang dongrikaha. Hindu kamalrang skiprakanggipa manderangko aro uamangni lekka-rangko poraigipa manderangko sao on'aha. Indiomangba ia pilak kamrangko mikike bang'a manderangnan dingtang dake gital chanchia-niko naataha. Sualanggimin mitam lekka-rangko manderang poraitaitaiaha aro saggipinrangna on'roroatskaaha; Hindu

## 22 NAMBATA JANGGI TANIGGINNA SKE-RA'ANIRANG

kamalranga golmal ka'dapna pa'sokjaha. Iano Hindu aro Kristian toromni susaaniko manderang nikaha. Uni ja'man-tapan Hindurangni aro Kristianrangni miksongani aro bebe ra'aniranko chapa-ka'gimin bang'a ki'taprang nakatdam-damaha. Ramkeba Apatti Nashak ingipa ki'tapko bree poraie niaha. Hindurangni man'na ka'dongsoenggipa salgiba tol'asa aro uni rongtalnikgipa Ramba uni ka'dongsoa gita ong'jasa ine Ramke nikna man'aha. Uandake iarang Ramkeni gisikko changsatai dongtoattaijaha. Untalan Hindu kamal-rangona re'anganiko aro uamangoniko skie ra'aniko Ramke dontongjolaiaha. Iani on'tisa ja'mano Rongjulio bilsisana skul skigipani kamko ka'eon, kam jakchakjae Ramke an-tangni gisik suk ong'gijaniranko dikdiksana chel'atna man'aha.

Unoni bilsisa matchotahaon Ramke Goalparaona lekka poraina re'angtaiaha. Kusi ong'beani katta salsao una sokbaaha. "Anga Kristian saksako nikaha, aro iani bidingo nang'na aganna nangani bang'bea. Somoj man'chengon na'a Gauhationa bakbak re'babo" ine Omed una chittichi see u'iataha. Chubata gadangni poraianiko on'na Gauhatio ge'sa Normal Skul gnanngchim. Ramke uano napna dorgasto galaton, uni bi'a gita una cholko on'aha. Uandake uni ka'dongsoaha gita mamatang Omedona re'angna cholko man'aha. Ramke Gauhationa re'ange mamatang baksa dongeaha. Uamang mama'sa an'tangtangni rokomari nika-niani, u'iani aro changa-sapani, aro uandakgipa kamrangni gimin ningtue golpo ka'e, bon'kamao Omed gritangna indake aganaha: "An'ching A'chikrangode toroman gri, indiba siani ja'mano nambata gadango ong'pana gita an'ching A'-chikrangnaba maiba toromkode nangchongmota." Dingtang dingtang toromjangko tosusae nimano, bigil-gipokrangni ra'gipa Kristian toroman nambatgipa ong'a ine uamang chanchiaha. Kristian toromni gimin rongtalbate agane on'-china uamang sakgni Kandura Babuona re'angaha. Uororo somoio Kristian toromo bebe ra'gipa manderang bang-tujachim aro ia toromko mingsingjachim. Uandake uamang-na agane on'anioba, uamangko chinapatningna man'jaha.

Gauhatio donga bilsisa ong'srangkujaon Goalparani Boro Sahab, Becket, Ramkeko okamate Nibari antio pusis

toksako rimange uano pulis a'damko songechina aganaha, Ramke iako dakna kusi ong'beaha, indiba Gauhati Skulona gipin bilsisana watattaichina mol'molon uni bi'aniko knachakjani gimin ua duk man'beaha. Ian uni janggi tangao uko duk ong'atbatgipa a'selrangoni mingsa ong'aha. Nibario jabri dongari Jiraona uko bilsj gittamna watattaiaha. Uni ka'dongsogipa Omed baksa toromni bidingo agangrikna manchianiko ua dakna man'jaha. Minggipin a'sela, pulis kamo dongmitingo bang'a namgijagipa kamrangko ka'aha aro pap ka'beaha ine Ramke an'tangan ma'sipilaha.

An'tangni namgijagipa kamrangni gimin ua duk man'beaha, indiba man'na aro u'ina miksongatangko dontongjaha. Ia chango Ramke Kristian toromni ki'taprangko aro Kristianrangni gimin seanirangko poraiskaaha. Uni poraigipa ki'taprangoni kinsara skulo poraimitingo Rebanna on'gipa ki'tapchim. Mingsani ja'mano minggipin seanirangko aro kingsani ja'mano kinggipin ki'taprangko Ramke poraiaha. Skanggipa changna ia seanirang Ramkeko mikaoataha aro nambata janggi tanggni aro kamna do'ga oaha.

Jirao dongani ja'mano Ramkeko uni a'doktangsepang Damraona watattaiaha. Uano adita jarangna kam ka'ani ja'manon, Ramkeko pulis kamoniko wataha. Pulis kam ka'e uano dongengmitingo, Amjongani saksa me'chik Suban minggipa baksa Ramke mikchagrikaha. Ua me'chika be'en bimang chongipa, ka'sachaka gnanggipa, mikterokgipa, namgipa bewal gnanggipa aro ka'singipa ku'rangni me'chik ong'achim. Damra antiko cha'mitingo salsao uamang grongrikchengaha. Ramkeni pulis ganding-chindingko nike Suban uko mikchikkime nikaha; mongsongbate banoba maiba a'sel ong'na nangode, banoba maiba golmal ong'katna nangode, jegrik-giseode, jeoba jaoba Ramkeko nangkamaia ine Suban chanchiaha. A'chikrangni bewal gita, Ramke an'tangde ong'gija Subansa Ramkeko an'tangni segipa ong'na beseaha. Pilakan tik ong'ahao, A'chik songsarekrangni niam gita doke-dam'e, chrok-mesae, aro cha'e-ringe, do'sie uamangko jik aro se ong'ataha.

Jik aro se ong'manahaon, Ramke an'tangni gisiktango ru'utbea salrangna chanchie dongenggipa kattarangko Subanna

## 24 NAMBATA JANGGI TANGGNINA SKIE-RA'ANIRANG

agane on'on, uni jikgipa alao inmanbeaha aro jagipupilaha. Ramke gisiko suk ong'jabeaha. Uni mandetangrang knana nangode, uamangna mai a'sel ong'gen, iako dakna nang-bebegenchimode uamangni ma'drang-bakskarang aro A'-chikskarang uamangni bobil ong'gnok, aro uamangni kosako chakate nisiani kamkrangko ka'gnok ine Subanni gisiko chanchirikkotanirang nabaaha. Uamangni jik-se ong'ani skanggipa jarang indaken badeangaha. Segipani kamrang aro uni namgipa gunrangni gimin Suban chanchitaitaie bate batesa setangko mande ra'oroaha.

Ia salrango Ramke aro Omed chittirangchi segrike dingtang dingtang kamrangni gimin agangrikengachim. Suban mamingkoba sena-jotna ba poraina man'jani gimin, setangna seatgipa chittirango mai kattarangko janape seat-achim, mai kamko ka'na miksongengachim, mamingkoba u'ina man'jaha. Ua somoimitingon uni pulis kamoniko Ramkeko ka'dongsoa gri gitik gitak kam bon'chongdikataha. Setangni gisik suk ong'gijako nike una maiba a'sel ong'na nangaha ine Suban ma'sina man'aha. Uni jonggipaoniko tangka ra'na re'angonga aro man'adipet bakban re'bapilgen ine jiktangko done pringsao Ramke Jirachina re'angaha. Ka'dongbee setangni re'bapilako salsal nisoaha, indiba salrang antirang badeangoba Ramke sokbajaha. Setangko niksosusu dake salantian ramaoba chadenge dongsoaha, indiba niksoteljaha. Ramke Jiraoni Goalparaona re'angaha aro Goalparaoni jahato Gouhatichi re'angahana ine ja'mano koborko man'aha. Uan bebeba ong'achim.

An'tangko saksan done re'angahaoba Suban setangna bate batesa ka'saroroaha. Ramke Kristian toromko ra'aha aro mandetangrangoni ekangaha ingipa kattako songo jang-bingbangaha. Ramkeko watgalchina Subanni ma'a-pa uko draaha, indiba ua knachakjaha. Subanko wate matangaha ine manderang una tol'eba aganaha, indiba Subanko bebe ra'atna man'jaha. Setango uni ka'donga kim'kim aro kakket ong'aiaccim. larangna jrimbatgipa bal salsao Subanna sokbaaha: uamangni dejakra atchiarin siaha. Indiba Suban gisiktango chakchike an'tangko ka'dimeataha aro mangrak-ataha. Bon'kamao, Ramke Gauhatio Boro Sahebni kachario setimgipani kamko man'aha, aro ru'utgijan jiktangkoba

re'angatenga ingipa kattako songo knasoaha. An'tangni neng-nikanirangko dikdiksana guale, kusi ong'bee aro ka'dongbee, uni bebe ra'ani aro chanchisoanirang kakket ong'bebeaha ine Suban setangona bakbakan re'angaha. Uamangni janggi tangani kamrangko ja'man salrango niatpile nioa, ia pilak kamrangan Isolona ukoba rimangani kamsa ong'achim ine Suban u'ina man'aha.

Rongtalgipa Sastroni bakrangko poraie, Bengali sub-overseer Samuel Lovedayni kattarangchi salako man'e aro Kandura Babuni skie on'anirangchi gisiko chinapatako man'e, Ramke gisik dingtangbeaha. Kristian toromko ra'chongmotgnok aro Kristian mande ong'chongmotgnok ine Ramkeni gisiko chanchiani aro miksongani nakataha. Ramkeba uandake, mamatang Omed baksa apsan salo, apsan biapo, aro apsan mandeni jakchi, 1863 bilsini February 8 tarik, Robibar salo, Gauhatini Sukheswar Ghato napbolatako man'aha.

An'tangtangni jatska Achikrangna Isolni Nama Kattako aganprakna Ramkeba mamatang Omed baksa re'pana kusi ong'beha, indiba uamangni jikgiparang bang'a neng'nikani, champengini, engtogijani aro kengnirangko niksoe re'pana sikjaha. Iana skangba, Omdni jikgipa Epiri gita, Subanba Kristian ong'na sikjaha. Uandake setangni Kristian ong'a aro napbolaniko namnikjaen, uaba setangko napbolatako nina re'angjaha.

---

## RAMKE—BAK II

Ramke aro Omed jattang A'chikrangona re'ange Isolni Nama Kattako aganprakena miksongenga ine knaon, Omedni naggipa pulis dolni dal'batgipa, Colonel R. Campbell, aro Colonel Henry Hopkinson, jeni ning'on Ramke setimgipa dake kam ka'engachim, knae kusi ong'beaha. Nambegipa aro kakketgipa kam ka'giparangko uamangni kamoniko watna dukde ong'a, indiba uamangni miksongsoani kamrang dal'bea aro nambea ine namgipa Kristianni chanchiningna krakra dake, uamangni mol'mola gita Ramke aro Omedko kamoni ong'katna on'aha. Mandetangrangona re'angmitingo Goalparani Boro Saheb, Captain Mortonko grongpakange un baksa agangrike re'angchina Ramke aro Omedna uamang ku'pattidapataha.

Ramke Damrao skulko kuligen, mamatang Omeda sepangjol song wilwilaona re'rroe Isolni Nama Kattako aganprakgen ine uamang mamasa manchigrikaha. Skul nokko rika matchotkuja dipet Ramke aro Omed, sakgnian, re'rroe jatangni manderangna aganprakaha. Antangtangni miksongsoaha gita uamang kamrangko ka'na a'bachengaha.

Adita salrangni ja'mano Ramke Damraona re'pilangaha. Ua antangni chonbatgipa jonggipa aro gipin sakgni bi'sirangko antangni kuligipa skulo poraiatna rimangaha. Ramke uamangna Sastroni kattarangko skiaha aro attaman-tian uamang pilakan Isolo bi'na tom'rongaha. Uni inan-gimin lekka-pora, gisik ta'raka, changa-sapa aro toromni gimin badita ning'tue ma'siaha, uarangko ua uamangnaba skiskaaha. Uamangba Isolo bi'na changpaaha, aro antiprako kangkare kae mi okimu chakaha.

Goalpara Skulo Ramke aro Omedni poraiengmitingo Omedni gritang, Ramkeni jong nanga, Rangkuba uano poraipana re'angachim, indiba apsan jolonin ua skulo bang-beaha ine uko rakkina jechakaha. Rangku dikdiksana Ramke aro Omed baksa Goalparao dongpamitingo, maikai

sena nanga, uamang una oikorrangko skiaha. Pring pringo chakaton aro asongon, "Ram, Ram" aro donnasiahaon "Horibol" inbo, unon uko kusi ong'atgen ine Ramke una skiachim; bilsisnini ja'mano Gauhatio gronggriktaion, Hindu torom aro uamangni miterangko skango uni jedake bebe ra'ara ong'gramajanisa, uni gimin Jisu Kristokosa uni Jokatgipa ine ra'chaknasiengaha ine Ramke Rangkuna aganaha.

Pilak Kristian nokdangrangko A'chik songsarekrang mangkimaate galtokna manchienga ingipa kattako Raja-simlaoniko knasoe ua kattako Ramke Dr. Bronsonna chittichi see u'iataha. Ramkeni ehittiko man'soon, re'ange dakchakechongmotna nanggen ine mikchi ong'a gnanng Dr. Bronson Rangkuna ia kattako aganeskaaha. Songsarekrang ukoba so'ote galnaba donga ine jajrengge aganon, Isol una dakchakgen, uni gimin ka'donge re'angaichina Dr. Bronson Rangkuna aganaha. Walkuja ong'ode ua somoichachaon re'ongkatangna man'genchim ine Rangu aganaha. Rangu songsarekrangna kenjachim. So'otskaode uamangoni sakchik-king ba sakchi'gnikode ua saksanan so'otskana man'genchim ineba Rangu aganaha. Maikai pantesan ong'kuaienggipa Daudanba bilakbegipa aro dal'begipa Goliathko uni beng-jurichi sa'otna dakchakaha, uamangko wate re'angna skang ia kattarangko agane Dr. Bronson Rangkuna Isolo bi'chak-ataha aro ku'pattiataha. Isolsan una dakchakgen, aro uni re'angmitingchachaon indagipa kenanirang dongjanaba gnanngaha, indiba re'angade re'angaichina una agandapataha. Walgimik ring sandie, pring seng'na skangan Rangu Songduko chochakatbae, salgni salpaksani ja'mano Goalparaona sokeaha. Ba'ra-kancarangko Goalparao donange ja'achi man'anipet gong'rake re'ange sal napa tiktako Rangu Rajasimlaona sokeaha. Indita nangbemitng aro neng'nik-bemitng somoi tiktako uko niksoe Ramke aro Omed kusi ong'beaha aro ka'dimeataniko man'beaha.

\* Torom aro skulko chalaiani, pilak obosta aro a'sel ong'anirang, namdapatreroani kamrang, kengni-signini kamrang, ba indagipa gipin kamrangni gimin Ramke Goalparani Boro Saheb, Captain Mortonna chittichi tale see u'iataha,

## 28 NAMBATA JANGGI TANGGNINA SKIE-RA'ANIRANG

Boro Saheb ua chittiko poraie nie gisiko nangbeaha, aro Dr. Bronsonnaba ua apsan kattarangko see u'iataskaaha.

Je kamnan Omed aro Ramke 1863 bilsioni dipet ma'ringbeaha, uko chusokatna ine 1867 bilsini April 12 tarik, Sukrobar attamni 5 bajio A'chik Kristianrangna missionaryko watatani bidingo aro toromni dal'roroaniko mikrontangchi nina ine Dr. Bronson mongma manggniko ra'e Damraona sokeaha. Sal ding'bea aro rama bakroani gimin, sokangon Dr. Bronson neng'beaha, indiba Ramke baksa golpo ka'e roe uni kuligipa skul aro uano poraienggipa sak 15 bi'sarangko nike uni pilak nang'anirangko gualtokpilaha. Tusikujana kingking uamang ma'manti kattarangni gimin agangrikaha aro git ring'aha; pring gipino pringwalni re'chakatangtaie, saluango Rajasimlaona uamang sokeaha. Man'adipet manderangko ma'siatna man'na gita Dr. Bronson Assamese ku'sikchi aganaha; aganako ma'sigijagiparangna ma'sigiparang pe'skae on'aha.

Dr. Bronson Rajasimlaoni Damraona re'bapilaha. Kristoni Bimingko ra'na sengsoenggipa manderangko ua uano nikaha. An'tangko napbolatpachina ine uanoni saksu mande, chongipa bi'sa gita dakpile grape Dr. Bronsonko mol'mol-beaha. Inditan napbolna sikani gisik uo dongani gimin ua mande katta aganna changja gita dakpilaha. Uandake 1867 bilsini April 12 tarik, Sombar salo uano sak 10 manderang baksa uko napbolataha. Uano napbolata man'gipa sakchik-kingoni saksade Ramkeni jikgipa Suban ong'achim. Uamangni mitamko Dr. Bronson aro mitamko Omedni jakchi napbolataha.

A'chikrangna skanggipa missionary dake watatako man'e Dr. Stoddard aro uni jikgipa 1867 bilsini October 3 tariko Goalparaona sokeaha. A'chikrangni gisepo maikai Omed aro Ramke lekka-pora aro Kristian toromko a'bachengatna jotton ka'enga, maikai uamang Kristoni sninggiparang ong'bachengaha, Goalparaona sokena skangan Dr. Stoddard knabachengaha.

Goalparaona sokbae dongchakanirang tik ong'kujamit-ingon, chat'gipa biaprangoni A'chikrang uamangko dakchakna re'baaha. Damra Skulo poraigipa chatrorang baksa Ramke



aro Ramku re'angpaaha. Missionaryrangna ku'sik skina Rangku aro saksa sakgni A'chikrang Goalparao dongrikaha; uamang an'tantangba English ku'sikko uamangoniko skie ra'skaaha. Dr. Stoddard uni kamko Goalparao dongchakesa A'chikrangna kam ka'aha.

A'chikrangni a'doko Omed jekai skanggipa Kristian songko Rajasimlao 1864 bilsini October ba November jao kulichengaha, uandake Ramkeba damgipin Kristian songko Nishangramo 1872 bilsini February jao kuliskaaha. Ia songsa Rajasimla aro gipin Kristian songrangna bateba dal'rorobaaha, bilakbatroroaha aro niksengbatrorobaaha. Iarang pilakan Ramkeni Isolo bebe ra'ani aro Uni bilo pangchake kam ka'ani a'sel ong'achim.

Ramkeni rikgipa Kristian songko a'bachengo Kristianpara inesa manderang mingachim, maina uano songdonggipa pilakan Kristianrachim. Indiba Kristian torom giproroahaon gipin a'dokrangoba Kristian songrang ja'mano jelrorogenni gimin, ua songko Nisanni Song ba Nishangram mingbo ine Dr. Bronson Ramkema'angna ku'pattiangaha. Uandakesa ia songni biming ua saloni dipet Nishangram ong'baaha.

Rajasimla mondolio Omedko Pamong songchengaha gita Ramkekoba 1872 bilsini November jao Nishangram Mondolini Pamong songaha. Ua Mondoli niksenggipa Mondolisan ong'ajaha, indiba iasa pilak A'chik Kristian mondolirangni gisepo mongsonggipaba ong'aha. Iarang pilakan Ramkeni rake, kingkot dake aro jotton ka'bee kam ka'ani bite ong'achim. Uni kam ka'anirango uko uni jikgipa dakchakbeaha.

Ramke Tura aro Goalparao kuligipa Normal Skulrango head masterni kamko ka'ana agreba gipin kamrangkoba ka'achim. Uandake bang'a changon Ramke Nishangramo dongna man'piljachim. Saksani ja'mano saksa Ramkeni kam changa aro kim'kim ong'ani kamrangna saheb missionaryrang uko de'mittelbee aganrongaha. Ia salrangmitingon Bengali-A'chikku Dictionaryko Ramke sena a'bachengaha. Jedakode A'chikrangba Bengali ki'taprangko poraipana man'gen, iana miksongesa ua dictionaryko sechina saheb missionaryrang Ramkeko mol'molaha.

### 30 NAMBATA JANGGI TANGGNINA SKIE-RA'ANIRANG

1886 bilsio Nishangram mondolini manderang chu'gimik Pamongni kamko ka'china Ramkeko mol'molaha, indiba mondolio chu'onga gita tangka-paisa dongjani gimin, Ramke an'tangsa an'tangko on'kange kam ka'na ga'akaiaha. Bilsio 23-na kingking uni mondolio kam ka'mano, mondolini kamrangko ka'na gita Ramke sak 270 manderango tarisomanaha.

1881 bilsini July jao uni depante dejakra Dhonsing Turao napbolaha. Ia mande nambegipa, sontolbegipa aro toromibegipa ong'achim. Ia bi'sako poraiatanina uni ma'a-pa mondoli ba missiononiko tangka dakchakaniko bi'jaha. Seramporeo poraion, uni klaso Dhonsingan Benguli man'batgipa ong'achim. Ia mandeni jakchi nama kamrangko A'chik jatna ka'gniko pilakan nisengsoengachim, indiba Serampore collegeoni re'bapilani adita jarangni ja'manon saa man'gitike ua siangaha. Depantetangni sion pagipa duk man'beaha, indiba detangko dakchakanina jakkalgni tangkako, saoba sakgipin Dhonsingni biapo skiprakani kamko ka'china ine Isolna on'aha. Jadokmangan ong'srangkujachim, uni saksakamkam demechikba siangsrangaha. Ua me'chikba mikasalbegipa, gisik-ka'toing nambegipa aro mikkang-bimang daknanggipa ong'achim. Uni sion, Isolko mittelpilani gita, Ramke Dr. Bronsonni jako Gong 60 anna 10 pai 3-ko on'aha. Jagittam somoini gisepon Isolna on'skaani ine Ramkeni on'a tangka gimik Gong 177 anna 10 pai 3 ong'aha.

Dedrangni siani ja'mano Ramke an'tangba ru'ute tangangdapjaha. Sina skangskangsan, an'tangni janggi tangangkuna sikgijani kattarangko ua Dr. Bronsonna aganaha. Uandake 1891 bilsini January 25 tariko, gisik seng'begipa, lekka serakgipa, pamong, procharok, skigipa aro missionary—dondikgija aro neng'takgija Nokgipao kim'kim aro bebe ong'e kam ka'angani ja'mano, Nokgipa Isol Ramkeko An'tangona rimangpilaha. Bilsio 14-na tanganguani ja'mano, uni on'kanggimin, ka'sagimin, uko dakchakpagipa uni jikgipa Subanba, a'gilsakko watangaha. U'ianirang bang'pajaoba, cholrang dongpajaoba, segipani siani ja'mano Subanba setangni kamrangko man'adipet ja'rikpaaha. Wenroroe Isolni Nama Kattako A'chik a'dok'ango aganprakako on'paaha. Uni bon'kame janggi tangaona kingkingan Suban Nishangram songko songtang ine chanaha.

Bilsio 125-na skang A'chikrangni lakka-pora aro skiaman'ani gadangko da'asalni gadang baksa tosusae niatpilode, Ramkeni janggi tangangani aro an'chingni lekka-pora man'anio mamingba nangrimgrikani dongja ine an'chingoni bang'batan ia salo agannaba donga. Indiba Captain Jenkinsni 1847 bilsio Goalparao A'chikrangna mangsonge kuliani ja'mano, Ramkesa 1865 bilsio skanggipa A'chik Skulko Damrao sakgittam A'chik chatrorangchi a'bachengataha. Ia skulosa A'chikni jakchi A'chikrangna skianiko on'chengaha aro ianonisa A'chikrangni gipin skulrang pek-watangchenga gita ong'aha.

Chong'motgipa toromko man'na Ramke jekai bang'bea bobilrangko, saknaa-dukrangko, kal'steka-chonnikako, aro signi-kengnirangko chagrongaha, uko man'manahaoa ua uko sikripaona kingkingba watgaljaha. An'tangko Isolni sippai ine chane Nokgipa Isolo uni bebera'a aro kim'kim ong'aniko uni donanggimin tangkamgipa kattarang an'chingna sakki on'a :

- |  |  |
|--|--|
| 1. Isol Songni sippai ine<br>Seaha bimingko ;<br>Angara bobilna kene<br>Watgenma Kristoko ?      | 2. Dukko man'beoba mande,<br>Re'a salgichina.<br>Rimpajagenma angkode,<br>Salgiko man'atna ?         |
| 3. Angnade grima bobilrang?<br>Warachaka papan ;<br>A'gilsako toromirang,<br>Dakgrikbea pangnan. | 4. Salgiko man'pana sikode,<br>Dakgrikbena nanggen ;<br>Gitelni angna chakode<br>Dakgrikao chegen.   |
| 5. Mandesalde dakgrikao,<br>Sioba amkugen ;<br>Ka'donge nibo, Salgiko,<br>Bakbakan man'egen.     | 6. Chon'kamani Sal sokode,<br>Man'eming gamrangko ;<br>Amgipa sippai kotokrang,<br>Mittelgen Jisuko. |
-

## SEA-JOTANIKO A-CHIKRANGNI MAN-CHENGANI

A'chik a'songo Kristian torom napna skangde lekka-pora aro uni gamchataniko A'chikrang on'timintiba u'ijachim. A'chikrango sea-jotanirang dongjasan ong'jachim, indiba sea-jota aro ki'tapni bimanga maidaka aro uni mangsongania mai ong'a, ukon skangni A'chikrang u'ichengjachim. Mikron kana mandeni dingtang dingtang rongrangko nikna man'jae u'igija gitasan uamangni u'igijania ong'achim ine American missionary, Rev. T.J. Keith minggipa, skia-man-kugijagipa A'chikrangko toe aganaha.

A'chikrangna kam ka'china dingtangmancha watatako man'e 1872 bilsini January 15 tariko Rev. T.J. Keith Goalpara songjinmao dongge kam ka'na a'bachengaka. Uanona re'bae an'tangba Bengali ku'sikkosa skie ra'change, Rev. Keith A'chikrangna Assamese ku'sikchi ong'gija Bengali ku'sikchisa sea-jotaniko dakaha. Uandake, skanggipa ki'tapko 1874 bilsini October 1 tariko Englishoniko Bengaliona pe'e sechengaha. Bengaliona pe'e seskaanio, alamala lekka-pora dongkalgipa Ramke, Rangku aro Gongaram missionaryrangko dakchakpaaha. Kristian missionaryrangna agreba Ramke an'tangba jak 884 donggipa Obidhan minggipa dal'begipa kingsa Dictionary ki'tapko Bengali oikorchi 1877 bilsioni a'bachenge see 1881 bilsio matchotaha; uko 1887 bilsini September jao Rev. M. C. Mason chapa-ka'aha. Da'alona kingkingba skang salrango Bengali oikorchi segimin mitam A'chikku ki'taprangko nikna man'engpitti.

Omed aro Ramke, mamasa, Gauhatini Kristianrang baksa dongrime Assamese ku'sikko jakkalna man'giparang ong'baaha. 1865 bilsio Rangkuba Nowgong Mission Skulni skigipa Dr. I.J. Stoddardni jakchi napbolatako man'e Kristian ong'aha. Uaba Assamese manderang baksa dongrim-rorime uamangni ku'sikko aganna aro sena man'gipa ong'baaha. Torom aro procharni kamrangosa sea-jotaniko A'chik a'dokrango a'bachengahani gimin, 1875 bilsimangona kingkingan Kristian missionaryrangba Assamese ku'sikkosa jakkalaha,

A'chikrangba Mongolian ma'kringni manderang ong'a. Ia ma'kringni manderangde R-ko gam'atna neng'nikana; uandaken Kristian toromko A'chikrangna skiprakchendon, meligipa apsan katta A'chikkuo dongpajae, Assamese katta-kosa *Iswar* ine mingpachina skiaha, indiba ua kattako knachenggipa A'chikrang uko tik ong'e gam'atna changjae *Isol* inesa gam'ataha. Mingattaitaie nioba R-ko L dakesa gam'attaitaiaha. Ia kattako uamangni skie on'a gita tik ong'e gam'atna neng'nikhong'motaniko nikani giminsa Dr. Bronson, Dr. Stoddard aro gipin missionaryrang tik ka'grime *Isol* ine gam'atchina aro jakkalchina da'o an'chingni jakkalenga gitan tik ka'e donaha. Uandakesa da'alona kingking A'chikkuchi pilak sea-jotanirang aro agananirangoba *Isol* ine iako jakkalbaaha.

*Isol* kattako *Iswar* (इश्वर) kattaoniko ra'srona nangaha gitan A'chikkuo dongjae bang'bea gipin kattarangkoba gipin jatrangni ku'sikoniko ra'gatna ga'akaha. Sastroo da'o an'chingni jakkalenggipa *nabhola* kattako English ku'sik *baptize* kattaoniko pe'aha. A'bachengo uko *aua* inesa pe'achim, indiba A'chikrangde chadengeba asongeba auani gimin, iani mangsongani uko pe'a gita tik ong'ja aro ja'man salrango iachi manderangko dilsretatnaba donga ine nikaha. Unbaksaba *baptize* kattamanchaba Greek ku'sik *baptizo* kattaonisa ong'katbaa aro uni ortochong'mota *be'en bimang gimikko pripechio sim'hola* inani ortosa ong'ani gimin, bon'kamao uko da'o an'chingni jakkalenga gita *nabhola* ine pe'aha. Bengali *likha* (লিখা) kattaoni *lekka*, *katha* (কথা) kattaoni *katta*, *bichar* (বিচার) kattaoni *bichal*, Hindi *kitab* (किताब) kattaoni *ki-tap*, *khirki* (खिड़की) kattaoni *kelki*, *girja* (गिरजा) kattaoni *gilja*, *ehitthi* (चिट्ठी) kattaoni *chitti*, aro uandaken, English ku'sikoni *school*, *slate*, *pencil*, *pen*, *glass*. ba uandakgipa kattarang A'chikkuchi sea-jotanirango ong'katbaaha.

Samtangtangchian gita ong'pile Bengalirang A'chik a'dokko duule donga; Bengali oikor aro Bengali ku'sikko A'chikrangna skie on'ode an'chingni songsul-noksulska Bengalirangni poraienggipa ki'taprangko A'chikrangba poraipana man'gen ine saheb missionaryrang a'bachengo chanchiaha.

### 34c NAMBATA JANGGI TANIGGNINA SKIE-RA'ANIRANG

Uai gimin, ia kamna dakchakani ong'gen ine chianchiesa Bengali-A'chikku Dictionaryko Bengali oikorchi sechina Rev. M.C. Mason Ramkeko mol'molaha.

Ja'man salrango Kristian missionaryrang Bengali oikor aro Bengali ku'sikko A'chikrangna jakkalangkuna on'na nangnikjaha. Indake dakna nangnikgijani mongsonggipa ming' 5 a'selranga iarang ong'a :

1. Skangtalonin A'chikrango an'tangtangni jakkalbagimin oikortang dongja ;
2. Ge 26 donggipa an'chingni da'o jakkalenggipa Roman oikorrangan A'chikkuni pilak gam'anirangko setokna "chu'onga ;
3. Ge 51 donggipa setogijagipa dingtang dingtang bimangrangni Bengali oikorrang sena man'dika aro a'bachenge skie-ra'gipa gipin jatni manderangna ja'rikna neng'ani ong'a ;
4. Chapa-ka'ani aro type-ka'ani bidingoba Roman oikorrangan jakkalna altubatgipa ong'a, aro
5. Bengali oikor aro Bengali ku'sikko A'chikrangna skie on'ania Bengalirangni kamrang aro bewalrangko ja'rikpachina skie-on'ani gita ong'a.

Uandake, bilsil kolgrikchetmangna Bengali oikorko A'chikrangni sea-jotanina jakkalani ja'mane, 1902 bilsioni dipet Roman oikorko A'chikku kitaprangko sena aro A'chikkuchi pilak sea-jotanirango jakkalna a'bachengbeaha. Bean bebe, ian jakkaltoobatgipa aro cholibatgipa oikor ong'a ineba nikna man'aha.

---



## SIJU DO·BAKKOL

Garó Hillsni salaram-salgipeng, Baghmara songjolóni Simsang chibimako chodoangode, chibimani jakasichi Siju song, Atongrangni a'doko, on'tisa mittin daka a'bri a'sol-solni ja'pao ge'sa cholguga gita wangwang oe dongenggipa dal'begipa rong'kolko nikna man'a. Ia biap a'ding chuaosa ong'ani gimin, wachikarini chi dal'bemiting somoioba Simsangni chi uanona sokdoangja. A'damona sokarin Do'bakkoloni jokbaenggipa chiring dilsako nikna man'a. A'brini a'a rurongdape Do'bakkolni ku'mang da'o on'tisa nidikaha.

Bimingna krakra daken Sijuni Do'bakkol andalbegipa aro tu'begipa rong'kol onga. Ua kolningo hajalni hajal do'bakkrang ghang. Do'bakkolko nikegipa manderangoni bang'an uko changsaba nikipakugijagipa manderangna bade-pile, banaidapdape ba chanchichipe aganronga, chong'motan ua Do'bakkol ning'o mikron nikipagipa na'tok gipok ghang; andala bilongani gimin andalakon jakchi dangtape nina man'pila; teng'begipa bilchamrangko natoba dislai kattiko so'baka gita, ba biri-sigareto so'bakgipa wa'al gitasan ching'aia; darangba ua kolko da'onaba bon'e nape nikkuja; Do'bakkolni badiaba danok Tura Edenbarijolo najokea; badiaba kol gita napangode balwa balani gam'ako knana man'a; kolni badiaba bakode sal teng'ako mrang-mrang nikata; ba uandakerang. Indako agananirangko knaani gininan changsaba nikipakugijagipa manderang uano nape nina sikbea.

U'ikalgipa aro skia man'kalgipa manderangna agrede, Siju songo songpangkangipa manderangonimangba bang-batan ua kolo napna pa'ja. Ua kolningo mite dongana, namnikjaode aro ka'o nangode napanggipa manderangko do'ga chipchangrikaiana ine uamang agana. Indiomangba, ua kolo da'omangde adita sak manderang nape nimanaha. Nape nigipa manderangoni bang-batan ua kol maidaka, uko ninasa nappataha; ua kol badita tu'a, maidakgipa aro mainai

## 36 NAMBATA JANGGI TANGGNINA SKIE-RA'ANIŔANG

bosturang aro janggi gnanggiparang uano gnang, maidake aro basako ua kol ong'katchengaha, uandakgiparangko sandie ninaba mitama napaha. See rakkiaoniko nika gitade, 1922 bilsio nape nigipa dolan ru'utbate aro ning'tubate uano napaha. Uamangna bilsio sotbonga ba sotdok skang ua apsan ning'tua bakonan gipin dolba sokange sokangani sakkiko mesokna botol te'sako uano donbaaha.

Sijuni Do'bakkol, a'bri a'solsol, pakma ja'dano oe dongenggipa ge'sa cholguga gita ong'a. Sandie nigiparangni nikanio ia kolo skango rong'chun gape dongachim, indiba chimik dilsa jokpretbae, rong'chun jrongroroe ge'sa dal'-begipa rong'kolko ong'ataha. Kolkunangoni adita ning'tua bakona kingkingan ua rong'kol apsan binangnangnango taria gita daka. Toe nion uni gro put 350, gipeng put 28-oni put 35-ona aro chua put 20-oni put 25-ona ong'a ine nikaha. Adita bakona kingkingan ga'chakgipa a'aba chikare kita gita cho'on cho'on dakanga. Ua chikare gita Do'bakkolni chiring jokbaa. A'palona adita bakroe jokbaari ua chiring Simsang chibimao braea. Ning'tukale napanguon chiringni jakaniko dimchang dimchang dakesa nikna man'aiaha; badiaba bakode chi dal'a aro wariba tu'a, badiaba bakode chi gri an'cheng aro rong'krakrarsa dongaia. Ga'nanggipa a'a bakrao joka gita ua chiring kolningo bewal ka'sinesa joka. Ning'tubata bakrangona napangon ua chiringko badiaba bako chonkale, badiaba bakode dal'-kale nika. Badiaba bakode chong'diksa jokari ro'ong mitap loljol jokangkue chiringan gimajolaia. Chi ro'okbemiting salrango bang'bata warirang put 4 mang tu'a. Badiaba warirangde put 6 ba unaba tu'bata ineba nikna man'a. Sandigiparangni sandie nika gitade kolkumangona bateba ning'tubata bakrangosa chiringni chidilba dal'-bata.

Do'bakkol ning'ni badiaga bakode dawangwang dake nokdring dakpile dal'a; badiaba bakode apchona aro gonggongesa napangna nangpila. Badiaba bakode wari dongani gimin wari rikingko malesa re'na nanga. Ia rong'kol dingsasan dakaigipa ong'ja. Badiaba badiaba bakode bipak dakangtaia gnang, indiba aarang bakrobea ong'ja. Bisi balwako ringmanna kene Do'bakkolo nappiparang



chiring jokako ja'rike chiring dingdingsa napa, aro uasa bakrobatgipa aro mongsongbatgipaba ong'a.

Kolkumangoni put 500-mang tu'e napangon sko tong-tongo on'tisa ting'kong dakgipa nokkingo chonchonggipa ma'malni do'bakrangko nikna a'bachenga. Do'bak ba'chakgipa bakko toe nion uni bakroa put 250, apalbatgipa bak put 70 aro chubatgipa bak put 50 ong'a ine nikna man'a. Ru'uta bilsirangna tingtotkame donge rong'chumi ro'ong pil'gimin ong atgimin bimangrangkoba uano nikna man'a. Uarang a'ao pong'chruchru dake nadoe aro nokking aro pakma sambengrango matchok grong gita dake sing-sole ro'ong pil'tokaha.

Do'bakkolo napon bil'cham, torch light, gas lamp ba uandakgiparangko ra'esa napangna nanga. Andalkalgipa bakona sokon chonchonggipa ma'malni do'bakrangko nikna a'bachenga. Jasengani gimin bil'cham gnan napangon na do'bakrang kene bilpripraa. Ning'tubatkalgipa bakona sokeosa bang'bate donggipa do'bak jinmako nika. Wa'al nate nidoode pakma aro nokkingo dingdee dongenggipa do'bakrangni mikronrangko nokking gimikan ching'chippile wal'kiko galpriprae dona gita nikpila. Ning'tukalgipa bakrangona sokangon janapbagimin kolni bakna agreba ru'uta bilsirangna taria gita ro'ong pil'e nokkingo singsöle dongenggipa aro a'ao nadoe dongenggipa rong'chunni nito-begipa ro'onrangko nika. Ning'tusranga bakode uarangko nikna man'tajaha. Englishchi uarangko stalactite aro stalagmite ine minga. Doktine ba gopake ra'na sokgiparangkode bang'batakon Do'bakkolko nape nigipa manderang nosto ka'aha.

Do'bak bang'gipa biapona sokangon changsaba napkugijagipa mande maiba maiba kenanirangko man'na a'bachenga. Hajalni hajal do'bakrang bilpriprae pangnaba knaronggijagipa gam'aniko ong'ata. Rong'gop dakani gimin aro a'palchina gam'a joke katangna man'jani gimin do'bak bilani gam'a rong'kuchako nangchaktaitaia; uandake gam'chipchipe nachil nadip dakpila. A'aoa do'bak ki'i dandaka seenga, gingsikoa balwa ding'a aro seenga, rang'sitoa rang'sisokja gita dakan baksa do'bak bila aro mikoani gam'chipchipe namen dongtoatja. Ua balwako gingsikode bisi

### 38 NAMBATA JANGGI TANGGNINA SKIE-RA'ANIRANG

ong-genma ine jajrenganiko ong'atpila. Kolkumangoni put 3,500 tu'ao Englishchi *Hipposideros Lankadiva* minggipa rokomsa do'bakko nikna man'taia, indiba nikangchenggipa bako gitade iano indita bang'bea ong'ja. Ia do'bakrang skang nikgipa ma'malna dal'dalbata.

Dingtang dingtang somoirango dingtang dingtang dolni manderang Do'bakkol ning'o nape ua kolni gimin sandi-anirangko dakaha. 1881 bilsio Geological Survey of Indiani mande, T.D. La Touche, put 1,500-mang ning'tua bakona napangaha. Uamangni napangmiting somoio chiring aditan dal'kuengachim. Put 350-mang ning'tua bakona sokangon chi tu'beani gimin chiko jrororoesa uamang napangna nangaha. Uamangko Siju songni Bong Lasker re'dilangaha. Gipinrangni chi jroangmitingo uan uamangna bil'cham nattimaha. Uanona napanggipa sakantian chi jrona sap-gipararachim. Do'bakkol ning'oni ong'katbapilmitingo T.D. La Touche maibakai ja'a ga'skete ja'benge re'na man'jaha. Juta oke gipinrangni re'a gita ja'arara re'panaba ja'a saakon man'chakpajachim. Uni gimin Bong Laskersa ba'tome uko chilbaaha. Mande dal'a aro bilakani gimin, Bong ua sahebko altubeen ba'tome re'bana man'aiachim. 1919 bilsio Garo Hillsni Deputy Commissioner, R. Friel, I.C.S., an'tangba Do'bakkolko nape nie kolningo maimai donga sandirikkite niaha. 1922 bilsini January aro February jarangni gisepo, Do'bakkolni chi ro'okbatmiting somoio, Zoological Survey of Indiani Superintendent, Stanley Kemp, Sc. D., aro Assistant Superintendent, B. Chopra, D. Sc., joljol anti gittammangna nape Do'bakkolni put 3,900 ning'tua bakona sokangaha. Darang mandeba put 3,900-na ning'tubate Do'bakkolko da'alona kingkingba napkuja. Uanona sokang-gipa manderangni aganani gitade, uanoni dipetan napangkuani cholan dongjaha. Uni nalsachi koldalangkugenma ba kolan dongangjahama, chanchichipesa donaiaha. 1872 ba 1882 bilsio uamangna skang saksa Army Officerba napna man'adipet bakona napange lekkao maikoba see uko botolo chipe, jokenggipa chiringni a'aoni put 4-mang chua ro'ong a'rikingo gate donbaaha. Ua botolko Stanley Kempma'ang nikipilaha. Botolko ra'e nioa, ru'uta bilsirangna skangan uko saoba uano donangaha ine u'ina man'aha.

Ua b'otolko stekgipa kak botol ning'china napangaha aro botolo moila chi tong'sa gape dongsoaha. Botolo maiba gipin bostuba dongachimma, mamingkoba uamang u'ina man'jaha.

An'chingoni bang'bata manderangni chanchichipani gitan, Sijuni Do'bakkol gita dakgipa tu'begipa aro andalbegipa gipin do'bakkolrang aro rong'kolrang A'chik a'songni dintang dintang bakrango gnan, indiba Sijuni Do'bakkolan tu'batgipa aro dal'batgipa ong'a. Indakarangni gimin u'ibegipa manderangni sandirikkite niani gitade, ia Do'bakkolni gimin an'ching badita tale u'ia aro chanchia, uamangba aiao inmanbatna ga'aka. Europe, Salgro America, Salgipeng Asia, aro Assamkoba man'chape, Burma aro Malay Peninsula a'songrangoba rong'kolrang aro do'bakkolrang b'ing'sranga; uandaken Indiani dintang dintang bakrangoba. Indiomangba Sijuni Do'bakkol gita dal'gipa aro ning'tugipa rong'kolde darang biapoba dongjawakon ine uamangni THE SIJU CAVE, GARO HILLS, ASSAM, PART I ingipa scanio Stanley Kempma'ang janapa.

Do'bakkol ning'o maimai gamchatgipa a'ningni gamrang, janggi gnanngiparang aro gipin bosturang gnan, nape sandiahaoba da'ona kingkingba darangba bon'e sandina man'tokkuja. Ua rong'kolko napangon, kolkumangoni jasenga dipetona donggipa ga'chake re'gipa a'anchengoniko name niode, maiba maiba jo'ong aro matburingrangni jakolrang donga gita nika, indiba uarang ua rong'kol ning'on janggi tangkamengama, ba banoba katesa dongengama, darang mandeba aganna man'ja. Kolningona napangon maming sam-bolko nikna man'ja, indiba ning'tubatsranggipa badiaba bako samcheng-bolcheng gita dakgipa jabolko ning'tue napangiparangoni dolsa nikaha ine agana. Uko banonikobasa man'pakbaahama, banoba danok donge gita gipuangasama, uko nikegiparang u'ina man'jaha. 1919 bilsio Garo Hillsni Deputy Commissioner, R. Friel, uni on'tisa napange sandiano, nikronggijagipa janggi gnanngiparangko Do'bakkol ning'oniko nikna man'aha, Gipin matburingrangna agreba, bimanngi kri ong'ronga gita ong'na nangaoni bikbegriksan ong'e chongipa mikron donggipa chiringni

#### 40. NAMBATA JANGGI TANGGNINA SKIE-RA'ANIRANG

na'tikko, aro scienceo sandie porikka ra'e nianirango pang-  
naba chagrongbakugijagipa ja'a-jak ro'rogipa Reduvid Bug,  
minggipa ma'malsa jo'ongko nikaha. Walni matburingrang  
ong'e wal ong'ahaon Do'bakkolni do'bakrang a'palona  
bilongkattoka ine sandiano u'ina man'aha. Sawa u'ia ?  
Rikki-rikkot sandikue porikka ra'e niode pangnaba nikku-  
gijagipa, pangnaba knakugijagipa bosturang aro janggi-  
gnanggiparangko Sijuni Do'bakkol ning'oniko man'kunaba  
donga.

---

## NOKMA JAKSIL GANA

A'chikrango dingtang dingtang dakbewalrang ba manianirang donga. Ua dakbewalrang ba manianirangko jolni kri ja'rika. Salaram-salgipengo donggipa manderangni pilak manianirang salgro-saliram jolo donggipa manderangni manianirang baksa mitam bewal ba rokomrango dingtang-grika. Salaram-salgipeng jolni manianirang mongsongbate mande siana Mangona, Nokma Jaksil Gana, ba indakgiparang ong'a. Salgro-saliram jolni manianiranga, Rongchu Gala, Den'bilsia, Ahaja ba Jamegapa, aro Wangala—iarang mongsongbatgipa manianirang ong'skaa.

Ia dakbewalrangko ja'rikanio maiba namgni donga ine A'chikrang bebera'a. Indakgipa manianirangko dakon bilsia aro karini kri kraa somoio daka. Badiaba manianirang Pattigipa-Ra'rongipa Mite-Saljongko mittelpilani, badiaba manianiara sabisi-sakonchirangoniko naljokatani, aro mitamara sigimin manderangko gisik ra'e uamangko mande ra'aniko mesokna dakanirang ong'a. Iarangoni mingsa Nokma Jaksil Ganani ong'a.

Nokma Gana ba Nokma Jaksil Gana A'chikrangni dakbewalrangoni mingsa ong'a. Iako A'chik a'songni salaram-salgipeng, Simsang aro Dareng chijolo donggipa manderang dakrongbata. Ia manianiko maikai aro basak chasongoni a'bachengbaaha, serikanirang dongjani gimin tale u'ina man'ja. Jaksil gana ingipako ramram manderang ganma man'ja. Manianiko dakgipa, chong'motan, jaksil gangipa mande, songsulni pilak manderangni gisepo man'e cha'batgipa ong'a. Ua mandeo A'chikrangni pilak gamrangan chur'soka. Ua gamrangoni mongsonggiparanga iarang ong'a:—rang, ripok, seng'ki, kamakka, aro uandaken, gamchatgipa ba'ra-marang, mil'am-seppi aro ugita gipin gamchatgipa bosturang. Indakgipa gamrang baksanaba jila-kaanirang, chong'motan, matchu-matte pilakan uo chu'onge dongna nanggen. Indake man'e cha'gipa mande ong'ahaon uni

## 42 NAMBATA JANGGI TANGGNINA SKIE-RA·ANIRANG

gamrangko chrarang chane-minge nironga. Bilak-wa·sagipa, ku·agankalgipa, mikasalkalgipa chrarang uarangko niktoka-haon Nokma ong·jok, jaksil ganna krajok ine nikahaode una jaksil patna taria. Janapgimin gamrangko man·tokahaoba uni cha·a-ringanina mi-misi dongkujaode uko dakna man·ja.

Nokma ganani miksongani indake ong·a: Man·e-cha·gipa ma·chongni chrarang an·tangtangni ma·kringo indake man·e-cha·gipa mande donpa aro iako dakanichi gamo bil gnanggipa ong·a ine songsarna parakata. Jaksil gangipa mande an·tangni songsulrangni pilak nokmarangna bate mande ra·aniko man·a. Jaksil ganahaon ua uni·gamo pilak nokmaskarangna bata ine mesokengani gimin, manderang una bama aro uko mande ra·a. Ia maniani ba dakbewala dingtangmanchagipa ong·a jekon janggi tanga gimiko chang-sasan dakna man·aia. Sakgipin uni sepangjolo donggipa ua jaksil gangipa mandena man·e cha·batskaa ine nikode uaba uko dakatna man·a, indiba skanggipa jaksil gangipa mandena man·e cha·batgipa ong·skana nanggno.

Manina tarisoanirang: Cha·ani-ringanirangko tarisona nanga. Ua maniaona nanggiparang iarang ong·a: matchu mang 20, wak mang 60, chu dikka te 100. Iaba komibegipa tarisoanisan ong·aiengkua. Uni gimin baditana kingking cha·a-ringanirangko tarisoenggen, u·ina amja. Iarang pilak-kon matchote tarisomano chra dal·batgipa Nokmana jaksil tarie donsoa. Indake cha·a-ringanirangko salgittamna pilak songsulni manderangna chu·onggnok ine nikahaon, jaksil ganani salko chrarang manchiata. Maniani salrangko salgittamna kingking mania. Ua salrangko dingtang dingtang bimingrangchi minga. Skanggipa salko Sokachaka ba Dong-napchenga minga; gnigipa salko Miting ba Mongsonggipa aro gittamgipa salko Busru ba Bon·kamgipa sal ine minga.

Skanggipa ba Sokachaka salo pilak matchu-wakrangko doke tarie dona. Songsulni manderang ba gimalrang ia salon soktoka. Gimalrang an·tangtangba chu song·e olbae matchu moe ra·bae jaksil gannasigipa mandeko mande ra·e mesoka. Pilakan sokbatokahaon, A·kingni Nokmarang gro-katta man·gipa, mikkim-rasong donggipa, mikasalgipa aro bilak-wa·sagipa manderang tom·dake churing-chupeke grike-mesae walko re·ata.

Gnigipa ba Miting sal maniani salrangni gisepo mong-songbatgipa ong'a. Ia salko songni-nokni ku'agankalgipa, mikchikkimkalgipa manderang soka-sokgiparangko cha'dil-ringdilmano jaksil gannasigipa Nokmani dal'batgipa chrarang Nokmani man'gimin gamrang, chong'motan, ripok, seng'ki, rang, kamakka, kadesil aro uandake gamchatgipa pilak ganding-chindingrangko ra'ongkate nokjatchio riting dake donmesoka. Iarangko nirok-sandina, Pattigipa-Ra'rongipa Mite-Saljong baksa agangriknasigipa mande, jekon Kamal minga, uasa pilakkon dakdila. Taric donsogimin jaksilko ia salona chra dal'gipa kamalni jako on'a. Donsogimin somoi ong'ahaon kamal do'o manggniko rasote, Pattigipa-Ra'rongipa Mite-Saljongna katta minge do'chi rongsniko dokpemanu, chra dal'batgipani on'sogipa Jaksilko Nokmana pata. Jaksil patna kamalni chakaton Nokma uko joljol ra'chake ganaija; an'tang bil ama gita ua kreng-badale jechakaniko dakchenga. Aganani gnang: Jaksil gannasigipa mande jechakgija joljol ra'chakaiode Mite-katchi chikpilana. Indakgipa manianioba A'chikrang an'tangtangni bebera'gipa torom ba maniao pangchakesa dakronga. Nokma jaksil ganna jechakbeoba una drae patmano, kamal an'tangan uko salbite chrokdilhenga. Unosa gipin dongpagipa jinmaba apsan chrokpae kusi ong'aniko daka.

Bon'kamgipa ba Busru salo cha'a-ringanirangko matchote manianirangko batatmano, gimalrang songtangtangona re'-chakata. Pilak sokbagiparangni songko watangna skang, jaksil gangipa mande pilak man'e cha'gipa aro rike-dong-gipa nokmarangko okame tom'dak-asongate ku'pattiani gita a'songtang-chigatango ku'mong-nangrimgrike dongani katta-rangko agana. Ia sal intal ua mandeko mande ra'na aro una bamna a'bachenga. Jaksil gana man'gipa mandeba ia sal intal an'tangni gamrangko an'tang jakpongo ganenggipa jaksilchi mesoka. U'i-ma'siao, gamo aro rasongo pilak songsulni nokmarangna bataha ine chanchie ua gisiktango rasong chaenggenchim.

Indakgipa manianirangna agreba A'chikrango gipin rokom manianirangba donga, jerangan mingsing-mingganggipa manianirang ong'ja. Pilak jatragon rokomari manianirang gnang. Uarang jatni kri aro songdong-a'chaa biaprangni

## 44 NAMBATA JANGGI TANGGNINA SKIE-RA'ANIRANG

kri ong'a. Nokma Jaksil Gana ingipaoba A'chikrangni manigipa torom baksa nangrimanide dongja gita nika. Ia manianiko da'ororoni salrango skia man'giparangni chasong baksa nisusae niatode uno maming gamchatani dongja. Jaksil gangipa mandena jaksil ganatani ja'mano mamingba upatti on'ani ba ka'china dintangmancha una kamrangko donsoaba dongja. Batesa songsulrangni pilak manderangko okamchimonge salgittam walgittam aldumittange watataniara chimongpagimin gamrangko ka'sagija rusie bon'ataia gitasa ong'bata. Jeba ong'bo, ian A'chikrangni manianirangni gisepo ong'rongbregijagipa mingsa maniani ong'a. Basakoba changsa indagipa manianiko nikpaode gipin manderangna aiao inmanbeani ong'pila.

---



## DUT ARO BIJA BITCHI JOKGIPA A'SONG

Indiani salgrosalaramo donggipa a'brini a'dokrangni gisepo A'chik a'songba damsang'ong'a. Chengo an'chingni atchu-ambirang re'roroe, dakgrik-dinggrikroroe aro a'dok sandiroroe ianona sokbaaha ine an'ching bebera'a. Songdong-a'chana dongtoa, mi-misi goo sila ba indaka a'selrango a'brini gipin songsul a'dokrang baksa tosusae niate, Isol Jihovani Israelrangna Kanaan a'songko sesoaha ina gita A'chik a'songba A'chikrangni gisik gnange basegimin dut aro bija bitchi jokgipa a'dok ong'a ine bang'a A'chikrangni rasong chae aganani kattarangko skang salrango an'ching knarongachim.

Ia a'dokjolko pangnaba ga'daperonggijagipa aro indakgipa biapjolrangona re'baronggijagipa a'gital manderang rona nambegipa biap, songdong-a'chana dongtogipa aro rochakna ka'singipa a'dok ine A'chikrangni a'dokni gimin aganronga. Nitogipa sam-bolrang, wa'arang, jokenggipa chiringrang aro dal'dalbegipa chibimarang, sokachakna kusi ong'gipa aro jaksramgipa A'chikrang uamangko kusi ong'ata aro katchaata. Africa aro Central America a'songrangni badiaba badiaba a'dokrangosan nikna man'aia ingipa bijuli gnanggipa na'nil, mande matcha pil'gipa, mande-tong'sa matcha tong'sa dakgipa matchadurang, jo'ongrangko gripdape cha'gipa me'mang-koksi, gingmat chagipa mangrobegipa sangkni, ja'pangpil ga'e re'gipa te'teng, uandakgipa matburingrang; sanna-banna jakkalna namgipa sam-bolrang aro sam kal'na changani kamrang; A'chik borang; Bmangiri songjolni sol'na-repna changani kamrang; A'chik chrok-mesaanirang, aro indakgiparang a'gital manderangna aiao inmanbeaniko ong'ata.

Bang'gija bilsirangsan re'angaiengkua, da'ona nitobatgipa sam-bolrangko aro tangsimriribatgipa a'briarangko A'chik a'songni samtangtango, kusi ong'batgipa aro cha'a-ringao chu'ongnikbatgipa A'chikrangko nikna man'achim. Da'asalo

## 46 NAMBATA JANGGI TANGGNINA SKIE-RA'ANIRANG

pilakchikon niwilwalate nibo: porongrong dakangbatenggipa a'bri-rangko, ran'krekroroangenggipa a'kawcrangko, chonro-roangenggipa chibimarangko aro tiproroangenggipa chiring-rangko; gimaroroangenggipa bol-wa'arangko; manderangna akal-karap ong'angbatengako; cha'u-dokpreta, churing-chupeka, toromo bebe-ra'a olgroka, kam-cholono ong'sia aro indaka ong'sibata kamrango barirorobaenganiko nikna man'batenga. Uandaken, an'chingni a'dok-rango jelbra-jelsuagipa matcha-mongma, matchok-balgitchak, aro gipin gamchatgipa do'buring-matburingrangba gimaroroangengaha. Skang salrangode an'chingni a'dok-rangoba do'de aro ugita gamchatgipa gipin do'orang gnanngchimna ine an'chingoni bang-batan mandeskarangni agananirangko knanasan man'aiaha; uandaken gipin do'buring aro matburingrangba ka'sine ka'sine gimaroroangengaha.

Manderanga bate bate jelrrobaenga, cha'u-ringani obostara namjabatrorobaenga, aro janggi tanganina neng'nikaniranga barirorobaenga ine indinarian nikna man'enga. Gama-ge'aniko dake janggi tangnara a'aon a'sal gri; porongaigipa a'ao mi ge'oba namja, kil gooba chaja, maikoba ge'oba silja; gamgipa-sugipa manderangni jajreng indaka kattarangko agananikosa da'ororo an'ching knana man'batenga. Isol Jihovani ku'rachakgimin Kanaan a'songmangba skangtal-ninde dut aro bija bitchi jokaigipa a'songde ong'jachim ine chanchiatna man'a, maina ua a'songni bang-bata bak-rangan a'gisi aro an'chengarigipa a'dok-rangsa ong'a; indiba Israel manderanga kamna bimchipbee aro kingkot dakbee kam ka'gipa manderang ong'a. Uamangni bang-bata a'dok-rangan a'gisini bakrangsa ong'ani gimin, an'tangtangni a'dok-rangko rokomari cholrangchi a'sal gnanngatna, uarango sam-bol ge'na aro chi jokna man'atna uamang jotton ka'enga; uandaken a'gisini bang'a bakrangon me'su-samjak aro sam-bolrangko uamang ge'na man'aba man'engaha. Chang-sao a'sal gnanngbegipa, tangsimririgipa, bol-wa'aarigipa A'chikrangni a'dok-rangde bate batesa a'gisi pil'angskaenga.

An'chingni A'chik manderangde da'asalona kingkingba sam-bolrangko ripingani, uarango ripingna nangani aro uarangni gipin namgnirangkon u'ikuja ingipa gitasa dakaienga. Nokrik-nokdakna aro tebal-chokkirangko tarinasan

bol-wa'arang choliaia ine an'chingni manderang chanchibata gita nika. Gamchatgipa ba gamchatgijagipa je bol-wa'arangkoba an'chingni manderang ka'sagija sikatang superim-rim-den'perimrime roa. Una bateba a'a cha'na ine a'gimik-gimikko baangpile so'prakprake a'dok gimikgimikkon porongrong aro choligija dakata. Jokpaenggipa chimik, chiring aro a'kasine dongpaenggipa a'gimikko porongrong aro bangbang dakate chimik aro chiringrangko tipatsranga. Manderang jelbra-jelsuroroe a'a cha'na namgipa a'dokrang komiroroangenga. Uandake alamala sam-bol dikkalgipa a'dokrangkon bilsisa bilsignini gisepon so'praktaitaie a'a cha'na ga'aka. Ringani aro auani chirang chonroroanga aro tiproroangana agreba, je a'sal gnangpaa a'akoba nosto ka'e ge'a-gamanirang namja, chi man'ja, bol-wa'arang bon'anga aro ding'anirang bariroabaa.

A'sal ruronga, chi tipa, bol-wa'a bon'anga, sal rak-changa ba indakgiparangko champengsona skia-man'begipa gipin a'songrangni dontonggija kam-ka'enganirangko niatodé, an'chingni kamrangde bikpilasa bikipilgriksaenga ine nikna man'gen. Israel ba ugita dakgipa a'songko niate nibo : Skang salrango a'gisiragipa a'aranga a'sal gnanggipa, chi man'gipa a'arang ong'baroroenga ; skang salrango a'sal gnangbegipa, sambolarigipa, a'mitim dakbegipa an'chingni a'dokrangni a'aranga, bikipilskae, an'chengarigipa, porongronggipa, gamna-ge'na choligijagipa aro chi grigipa a'dokrang ong'baskaenga.

Sam-bolrangko ripinganichi a'sal aro chiko maikai tangatna man'a, uarangchi mai mai namnamgipa gipin kamrangko ong'atna man'a, an'chingoni bang'bata manderangan ning'tukale chanchirongja aro indake ong'atna ama ine ma'sija. A'gilsakgimiko gisik seng'batsranggipa jat-rangoni jatsa ong'e, Israel a'songni manderang a'songtango sam-bolrangko ge'aniko a'songni aro jatni niam ine ra-gataha. Uamangni a'songo a'gisini a'aan mongsongbatgipa ong'ani gimin ringna aro gipin kamrangna chi chu-ongja aro maming gama-ge'anirangko dakna namja. Ia neng'nikanirangko amna man'na gita a'songo bol ge'anirangko 1908 bilsioni dipetan a'bachengaha. Ua bilsio, jekon 'Israelko Rikgipa' ine uamang minga, Theodor Herzlko

## 48 NAMBATA JANGGI TANGGUNA SKIE-RA'ANIRANG

gisik ra'na pang 12,000 bolrangko ge'aha. 1973 bilsio Israel a'songona songreanggipa manderang pang 31,222 bolrangko ge'aha. Mande jakchi ge'gimin bolrang da'o Israel a'songgimiko pang 110,000,000, ba million 110-mang dongaha. Ia kamichi chi aro a'salko tangatpiltaina man'ana agreba, a'songo ge'gimin bolrangko nokrik-nokdakna, doktani kamrangna jakkalna, aro gipin a'songrang baksa bading-chiwalna man'enga. Bolrangko ge'on namnambatgipa aro gamchatbatgipa bolrangkosa uamang ge'aha, aro indinba man'aigenchimoba uko dakgija, bol bi'sa bipangni gamchatanina batpilen bol bipangrangkoba dam rake breesa ge'aha. Bol bipangrangko palani tangkarangko a'songo gipin bolrangko ge'daprорona aro bol ge'aniko namdapatna jakkal-roroskaaha. Jedakode manderang bol ge'na gisik nangbatna man'gen manderangko gisik ra'na sakprakna bol pangprakko uamang ge'aha. United Statesni President John Fitzgerald Kennedyni sioba uko gisik ra'na Israelo bolko ge'aha. Ka'sagimin detangni sion, ma'a-pa detangko gisik ra'na bolrangko ge'aha. Ua bolrangkoba detangni bimingchin mingaha. Bilsiantian ua bolrangko nirokna re'angronge, tangenggipa detangna gita ua bolko sigimin detangni bimingchi okame, gipake, detangna ka'saani kattarangko mikchi ong'e agane uarangko ge'gipa manderang grapronga ine agana.

Bolko gamchatbate jakkalani aro bang'bata bipangrangko ge'na nanganini gimin an'chingni a'songoba dintangmancha kamrangko ka'enga. Pilak dolni manderangan iako krae aro gamchate dakna man'na gita Vanamahotsava ba bol ge'ani anti ingipako 1950 bilsio intalan India a'bachengaha. Bolrang a'salko skongata, mikka waata, cha'aniko ongkatata aro bang'bea namgnirangko ong'atani gimin, gamna-ge'na namgijagipa a'rongrong, dare, rongkrekarigipa, a'kongkep, ba indakgipa biaprango bolrangko ge'china India Sorkari didiaha. Bol ge'ani antiko bilsiantian dakbarongengoba, ge'mano uarangna dintangmancha simsak-aniko on'jani gimin, da'odipet iako dakachi miksonganirangko chu'sokatna man'kujaenga ine an'ching nikna man'enga. Uni gimin bol ge'a aro ripinganiko nambate dakna gita rokomari cholrangkoba bikotenga.

An'ching A'chikrangba Israelrangni bang'bea nama kamrangoniko skie-ra'pana man'genchim. Indake dakna man'bebeode, an'chingni ma'gitcham-pagitchamrangni dakgrik-dinggriktaitaie, kam-a'sel bon'taitaie, janggi-jama galpile aro neng'skimbee basegimin ia A'chik a'songko dut aro bija bitchi jokgipa a'song ong'piltaina man'chongnotgenchim.

---

## CHAPA-KA-ANIKO MAN-CHENGANI

Lekkao chapa-ka'na tarigimin oikorrangko nangchenga. Chapa-ka'nasion bolpleng, sil ba ugita bostuo konggimin ba nadogipa oikorrango kaliko nongchenga. Unikosa kali nonggimin oikorrangni kosako lekkako pa'dape uko sinjet-dapa. Indake dakon ua oikorrang lekkao chike seaniko ong'ata. Indake seaniko ong'atanikon chapa-ka'a minga.

Sea-jotani badia bilsio ong'atchengaha uko darangba u'ina man'jaha. Uandaken basak chasongo sawa chapa-ka'ani kolko bikotchengaha, ukoba u'ina man'jaha. 700 A.D.-mango Japanese manderang bolplengrango oikorrangko konge, uarango kali nongdape chapa-ka'ani rokomko a'bachengaha. 869 bilsini May 11 tariko Wang Chieh ming-gipa saksa Chinese mandeba ma'a-patangko gisik ra'na kingsa ki'tapko seaha. Pi Sheng minggipa Chinese mandesa teka-oka dakna man'gipa dingtang dingtang oikorrangko 1041 aro 1049 bilsirangni gisepo indakgipa rokomo chapa-ka'aniko bikotchengaha. Indiba Chinese oikorantikon nok-sani chinchisa seani gimin uarangko altue aro ta'rake banai-damdamna man'jachim. Oikor ge'antikon neng'beesa tarina nangani gimin uamangni ku'siko chapa-ka'aniko namdapatani aro bariroroatani ka'sinbeesa dal'roroaha.

Europe a'songomangba 1400 bilsiona kingkingan teka-oka dakna man'gipa oikorrang gnanngipa chapa-ka'ani kol dongkujachim. Germany a'songni Mainz minggipa biapo 1454-1455 bilsio Johann Gutenberg minggipa manile chapa-ka'ani kolko a'bachengaha. Una skangde setimgiparangni jakchisa mikot mikot sekuaiengachim. Gipinrang changpana kene Gutenberg an'tangba ia gital rokomo chapa-ka'aniko donnuesa sruksruk dakaha, indiba indake dakna man'aniko Italyni Venice songjinmaonaba man'angaha. Chapa-ka'gipa manderang mandeskarangni bikotgimin oikorrangko dingtang dingtang cholrangchi namdapatna aro taridapna chol san-dirikkitaha. Uandake Venice songjinmani Nicolas Jenson

minggipa chongipa oikorrangko bikotaha. Una skangde Roman oikorchi seon pilak seanirangkon dal'gipa oikorrarachisa seaiachim. Adita bilsirangni ja'mano Aldus Manutius Romanus minggipa gitchinge segipa oikorko bikotaha; ukon Italic oikor ine mingaha.

1400 bilsini bon'na skangan France aro Switzerland a'songrangoba kolchi chapa-ka'aniko a'bachengaha. England a'songonaba 1476 bilsio William Caxton minggipa chapa-ka'ani kolko ra'baaha. Chapa-ka'aniko Caxton Germany a'songni Cologne minggipa songjinmao skie ra'aha. Janggi tanganiko dakna ian nambcgipa chol mingsa ong'gen ine u'ie Caxton uko a'songtang Englando dakna mangsongaha. 1491 bilsio ua siaha, indiba uni kamo uko dakchakgipa Winkin de Worde minggipa ua kamko ra'rikskaaha.

Chapa-ka'aniko rang'sanan a'gilsak gimikon changpa-tokaha. Giovanni Paoli minggipa saksa Italian Mexico songjinmao 1500 bilsio chapa-ka'na a'bachengaha; 1638 bilsio Rev. Jesse Glover Americachi re'ange Cambridge Massachusetts songjinmao Stephen Day aro uni bilsio 18 ong'kuaienggipa depante Matthew baksa chapa-ka'ani kolko kulichengaha.

A'gilsakni pilak bakrangon da'ode chapa-ka'ani kolrang dongaha. Mandeni changa-sapa aro u'ianirang bariroroe, bijulini bilko jakkale, jakchi jakdangdikna nangpiljaha gita ong'pile, altubcgipa cholrangchi hajalni hajal lekka jakrangko dikdikprak somoini gisepon chapa-ka'na man'aiaha. Indiomangba manderang namdapatani cholrangko am'rikkitengpitti.

Sea-jota aro chapa-ka'a, iarang nangrimgrikgipa aro ge'sa ge'gipinko nanggrikgipa ong'a. Chapa-ka'ani aro sea-jotani da'asalo ramram gitasa ong'pilajaha. Jedakode manderangko gisik-nangbatatna aro mikrontangchi nike talbatatna man'gen, noksarangkoba da'ode altubeen chapa-ka'na man'aiaha. Salantion mai mai dakgipa a'selrang aro obostarang ong'katenga, uarangko salantini songbadrango chapa-ka'e manderangna poraiani cholko on'na man'enga.

## 52 NAMBA1A JANGGI TANGGNINA SKIE-RA'ANIRANG

An'chingni India a'songoba 1974 bilsini bon'achibara a-songtangna aro gipin a'songrangona mongsonggipa songbad setimgiparang sak 380 aro songbadrango gatna photo-ka-timgiparang sak 102 ong'achim. Skang chasongrango gisim kalichisan chapa-ka'aiachim. Da'ororode dingtang dingtang rongrangchi chapa-ka'ana agreba rong gnanggipa noksa-rangkoba nitobee chapa-ka'jolna man'aiaha.

---



## AEROPLANE

Greece a'songni aganritingbaanio indakgipa mingsa aganani gnanɡ : Badiaba chasongo ka'namgijagipa Minos minggipa saksa raja gnanɡchim. Uni ka'sanninggija sinjet-aoni joke katna ine Daedalus aro uni depante Icarus juktangtango attachi do'grangrangko tapaha. Uamang bilna man'bebeaha, indiba sagal kosak gita bilangmitingo Icarus agre chudugae bilaha. Unon uni jako tapgipa atta sal ding'ana jronge sagalona ga'akonbae chi sripe siaha.

Grang gnanɡode mande bilna man'bebegenchimma ? Do'orang maidake bilna man'a ? Bilna man'ani maiba chol mandena dongama ?.....Skanɡtalonin manderang rikki-rikkot chanchina a'bachenge kamchiba dake nibebeaha. Dakgimin kamrangoniko sakgipinrang dakdaproskaaha.

Dakna man'jasusu nikgipa rakgipa kamrangkoba man'-jawa ine manderang kosakgilgil chanchimangmange don-chipaijaha. Uandake France a'songni Annonay minggipa biapo Montgolfier ma'chongni adasa ma'drang 1700 bilsini bon'achibara belunko bikotaha. Uamango lekka dakani kol gnanɡchim. Lekka dakram koloni wal'ku jokdoanganiko ua adasa nie rorongachim. Wal'kuchin maiba kamko ong'katatna man'naba donga ine uamang chanchiaha. Wal'-kuko maiba bostuo chipe ra'rikna man'ode aro ua bostuko dal'e tarie kokkimao wal'kutimatna mande asongna man'-pilode, ua bostuko bilatna man'naba donga ine uamang chanchiaha. Belunrangko salgichi tang'doatangna dakchak-gipa bostua wal'ku ong'ja indiba ding'gipa balwasa ine uamang u'ijachim.

An'tangtangni chanchianiko kamchi dake nina uamang silkni dokrako banaiaha. Dake nion uko put 70 chue salgichi baldoaha, indiba manderang gisik nangtokjachim. Changgipinode put 6,000 chue baldoaha, indiba karikgipa buduchi uko a'aona salonbapilaha.

## 54 NAMBATA JANGGI TANGGNINA SKIE-RA'ANTRANG

1782 bilsio mande gatna man·pilgipa dal·gipa belunko tariaha. Mande gnang bilataniko uamang Franceni dal·gipa kachari nokmikkango jinmana dakmesokna mangsongaha. Uamangni dakmesokaniko nietokchina pilaknan aganprakataha. Uororomiting somoio ong·enggipa France a·songni raja Louiskoba uamang okamataha. Uano sako watchapatgen? Watchapatgipa mande maibakai sina nangode ?.. Darangba biming on·na pa·jaha aro sakgipinko minge on·naba u·ijaha. Uhi' gimin, dos gnangana rim'e donenggipa koedi sakgniko uano watdoatchapode namgen, maina indakeba indakeba uamang sinara nangaigen ine raja chanchigitike aganaha. Sina nangaigenchim ong·oba sakona bildoangchengna man·ania miandeni rasongsa ong·a ine Pilatier de Crozier minggipade rajani chanchidila gita dakna namnikpajaha. An·tangkon ua kang·kare kae ra·aha. Uandake Pilatier de Crozieran pilak manderangni gisepo a·aoni sakona bildoangchenggipa mande ong·aha.

Ua somoiona kingking belunrangko waton budu karik-esa watkuaiengachim. Budu kagija watgipa belunko ja·mano banaiaha, indiba unomangba wal·kuko chipesa bilenga ine chanchie manderang belunni kokkimao wa·alko so·grue ku·mang gita wal·kuko napdoataha. Iani ru·utgija somolni ja·manon Marquis d'Arlande minggipa mail 5 chel'e Paris songjinmako bilsotaha. Indake biltaimitingo salsao D'Arlande belun ku·mangko wa·al cha·bakataha, indiba an·tangni chola-kotchi uko kimitna man·e ua changode jokkuaha. Changgipinoba wa·al cha·bakattaijaaha, indiba ua otangode wa·alko kimite galna man·jae kamchipe sina nangaha. Sako bilchenggipa manderangni gisepo, uandake janggitangko ia kamna on·chakchenggipa mande D'Arlandean ong·aha.

Nambata rokomo bilataniko dakna jotton ka·aniko manderang dontongjaha. 1784 bilsio Englandni manderang, Blanchard aro Jeffries, English Channnelko beluno bilsotchengaha. Ua apsan bilsion Madame Thible minggipa me·chikba sakona bildoe a·aona name ong·onbapilna man·aha. Uandake uan me·chikrangni gisepo sako bilchenggipa ong·aha. Manderang dingtang dingtang bimang aro rokomo bilatani

cholrangko bikote asokni bimang gita dakgipa Zepplin minggipakoba bikotaha.

Bilsu sotbongana an'tangni rikki-rikkot dake nigimino pangchake, 1857 bilsio George Cayley minggipa, grang, engine aro bangbango rakrikatna man'gipa bilgipako bikotaha. Ua mande gitan Germany a'songni Otto Lilienthalba do'orangni grang badale bilako nie pangnan ning'tubee chanchie rorongachim. Pilakko hisap-ka'e dake niani ja'mano 1891 bilsio glider minggipa bilgipako ua bikotaha. An'tangan uko bilattaitaieba niaha, indiba da'nang ! 1898 bilsini August 12 tariko an'tangni tarigimin glidero bilmitingo ga'akone siaha.

America a'songoba ia do'o-mandeni siako songbado gataoniko Orville Wright aro Willbur Wright minggipa adasa gisik nangbee poraitaitaie niaha. Skangtalin an'tangtangba indaka kamrangna gisik nangbegiparang ong'ani gimin, ua siani kobor kenatani pal uamangko gisiksa nangatbataha. Ua adasaba do'orangni bilaniko nie do'orang gita bilna man'pana sikbeachim. Bilsu bongana dontonggija bimchipbee kingkot aro rake kam ka'ani ja'mano 1900 bilsio glider ge'sako uamang tariaha. 1902 bilsio petrolchi chalaigipa engine gnanggipa, sakni chakgipako bikotaha. 1903 bilsini December 17 tarikni pringo uamangni bilgipako North Carolinani Kitty Hawk minggipa chisam an'chengo manderangna bilate mesokgen ine uamang parakataha. Ua pringa sin'begipa pring ong'achim. Gisik nangtokja aro bebe ra'tokjani gimin ua pringo dal'gimin mande sakbri aro me'a bi'sa saksa mangmangsan a'gilsako bilat'chenggipa aeroplaneke nina re'angaha.

Ka'dongsoaha gitan uamangni tarigipa aeroplane a'aoni bilchakate chue aro chel'e bilaha. Indiomangba manderang gisik nanggija mesokaiaha. Chu'sokgipa dakmesokani kamko manderangna seachi parakatchina Orville aro Willbur songbad segiparangna an'tangtangan ku'siktangchi agane on'aha, indiba songbad segiparangba beberajae songbadtangtango gatjaha. 1905 bilsio ua adasa mail 25 chel'aona bilangaha ; 1908 bilsiode sippairangni dilgiparangna mail 51-mang chel'aona bile mesokaha. Uni ja'manon gipin manderangba

## 56 NAMBATA JANGGI TANGGNINA SKIE-RA'ANIRANG

dake nipae English Channelko bilsotaha ; unikode Atlantic sagalko, unikode Pacific sagalko, unikode, Wiley Post minggipa, a'gilsakgimikko salchetni somoio bilwilwilaha. Un ja'mano Byrd minggipa North Pole aro South Poleonaba bilangaha. Gam'ani secondprako put 1,100-na ta'rake rc'a, indiba da'ode manderang kontaprako mail 1,500-naba ta'rakbate bilna man'gipa aeroplanerangko tariaha. Mandeni changa-sapa aro ka'donge dake nidraanirang indiomangba matchotja !

---

## HANUKKAH ARO KRISMAS—BAK I

Bang'a bi'sarang aro dal'giminrangnaba bilsini gisepo kusi ong'batsranggipa aro an'saobatsranggipa sal Krismasni sal ong'a. Ia somoimitingode ong'rongana batpile sakantian kusi ong'a. Ia somoio bang'bata manderangan, mongsongbate skia man'gipa nokdongrangni chonchonkalgipa bi'sarang, maiba rokomni boksirangko man'na ka'dongronga.

Krismas salko kusi ong'bee Kristianrangni maniengmiting somoinangnango Jihudirangba uamangni dal'begipa *Hanukkah* minggipa salko maniskaa. Ian uamangni On'kange Ale Cha'ani Sal ong'a. Diwalini salo Hindurangni daka gita ia salo Jihudirang mombati aro chakkirangko so'e kusi ong'e mania.

Hanukkah aro Krismas apsan biapo aro apsan manderangonin a'bachengbaaha. Ia minggni manianirang rokomo aro mangsonganio ge'sa ge'gipin baksa nangrimgrika. Uni giminan Kristianrangni Krismas salko manianiko name ma'sina Ibrirangni Hanukkahko u'ichengna nanga.

Jihudirang Hanukkah salko uamangi *Kislev* jani 25-gipa tarikoni a'bachenge *Tebet* jani 3-gipa tarikona, salchetna kingking, boksirangko on'grike, mombatirangko so'e aro namnamgipa ring'mittelani gitrangko ring'e mania.

Skia man'begipa aro toromni bidingo u'ibegipa bang'a manderang Jisu Kristoni atchiani sal December 25-gipa tariko ong'ja ine jee agana, maina Israel a'songni itihaso ga'chateba bebera'na amgijani bang'a sakkirang gnanng. Israelni Geographyko poraie nioba ua a'songjolo October jaoni a'bachenge April jaona kingking wachikarini somoi ong'a; unbaksaba December, January aro February jagittam, mikka wabatsranggipa jarang ong'a. Indide December jani 25-gipa walo mikka wabemiting somoio a'pal bakrao manderang mes jakrangko nirikna man'bebejawachim. Indio-mangba, manirongbaongaoniko nika gita Jisu Kristoni atchiani salko December jani 25-gipa tariko a'gilsakni bang'a

bakon Kristianrang manibaaha. Hanukkahko *Kislev* jani 25-gipa salo manichengmiting somoio Kristianrangni manigipa calendaroba December jani 25-gipa sal ga'akachim. Jensalo Saliramni a'songrang salni sal-ja chananiko (solar month) ja'rikbaaha aro Salaramni a'songrang jajongni sal-ja chananiko (lunar month) ja'rikbaaha, unoni dipetsa Jihudirangni *Kislev* jani 25-gipa sal aro Kristianrangni December jani 25-gipa sal chel'grikangna a'bachgaha. Indjiba Krismasna kusi ong'e ale cha'ani aro Jisu Kristoni atchiani salko a'gilsakgimikon gita ong'pile December jani 25-gipa salo manibaaha. Da'asalona kingkingba badiaba badiaba a'songrangode December jani 25-gipa tariko Jisu atchija ine ua salko manijaenga.

Jihudirangni torom nokna minggittam dal'gipa a'sel ong'aniranko gisik ra'na Hanukkahko mania.

Torom nokna skanggipa a'sel ong'aniko manianiara Jakgitel Ong'atani ong'a. Bilsil ritchasana baten Judea a'songna Egypt aro Syria a'songrang krenggrikengachim, aro 198 B.C.-ona kingking Egypt a'songan uamangko sason ka'gipa ine uamangnasa Jihudirang bamaha. Ia somoimitingo Egyptni raja Ptolemy Philapator, Jihudirangni rongtal'gipa torom nokko marang nangataha. Jensalo Ptolemy Philapator rajako ja'chongrik'gipa Ptolemy Epiphanes rajani sippai dolrangko Mount Paneas minggipa biapo Syriani raja Antiochusni sippairang amataha, uamangan jokatnasi-gipa ine kusi ong'e Jihudirang uamangko imchaksoaha. Syriani rajasa uamangko sason ka'gipa ine intaltal Jihudirang uamangna bamskaaha, aro Syriaranga uamangko ka'sae jakkalskaaha.

Syrian rajani chonbatgipa depante Antiochus Epiphanes 175 B.C. intal raja ong'skaaha. 170 B.C. bilsio Alexandriako rim'gopaoni re'mikkangbae Jerusalem songjinmao ua napeaha. Antiochus rajani ka'ting aro ka'sagija jakkalanina salgittamnade songjinmani manderang una bamaha. Uni sippai kotokni dil'gipa Menelausni jakchi rongtal'gipa torom nokko ra'sekdraataha. Basingni basing sonarangko aro silni tangkarangko ra'ongkataha, aro a'ningo dape dongipa sona tong hajalsa ritchachetkoba cha'uaha. Rikrak rikrak dakpile tarigimin torom nokni boli on'chakramo wak bima

mangsako boli on'chakaha ; uni mitam be'enkode rate, uko rite, uni me'chiko torom nokgimiko rurotrotaha. Boli on'jajan ong'ja aro be'enkode cha'srangja, wakchi boli on'aniana Jihudirangni toromko namen kal'steke aro chonnike roani ong'achim.

168 B.C. bilsio Apollonius aro uni kotok tom'tome Jerusalem songjinmao napeaha. Golmal ong'gniko darangba niksamsojaha. Unon ua uni sippairangko watjojoe pilak dal'gimin me'asarangko so'otataha, me'chikrang aro bi-sarangko nokkol itaha. Kila pakmarangkoba nosto ka'aha. Songjinmani sorok aro nok sararagon an'chirarasaha. Unikode Syrian sippairangsa torom nokni cholguga aro ramarango dongchang dongchange gital niamrangko on'e ge'etaha.

Jihudirang uamangni on'rongenggipa bolirangko on'na man'jaha, aro ua apsan bilsion salanti boli on'barongenggipa bon'tongaiaha. Jerusalem songjinmao mande gri gita ong'pilaha aro pilak manderangan kene katbildangtokaha.

Ia somoijolon Antiochus Epiphanes indakgipa gital niamrangko manderangna aganprakataha :

1. Zeus Olympius miteko mande-ra'e gisik ra'na Jihudirangni torom nokko rikpile uni rikrak rikrak dakpilgipa boli on'chakram biapo Zeus Olympiusni bimangko dake donna nanga ;
2. Song'sarekrangni miterangko gisik ra'na wakko boli on'na nanga ;
3. Torom giri churing-chupekgipa aro uamangni kragijagipa bewalrangkoba niam ine ra'gatna nanga ;
4. Moseni Niamko jakkalaniko dal'batsranggipa dosi dakanine channa nanga ;
5. Rongtalgipa Sastro kingantikon so'e galna nanga, aro
6. Bigil-rasotani niamko jakkalgipa sakantian siani sastiko man'na nanga.

Ian toromo kakketgipa manderangko a'rikani ong'chim. Indake kal'steke roani bilsigittamna kingking, chong'motan 165 B.C.-ni 9-gipa ja *Kislev* ona kingking, ong'aha.

## 60 NAMBATA JANGGI TANGGNINA SKIE-RA'ANIRANG

Ia niamko giproroatna Antiochusni Niam On'gipa Off-  
cerrangoni saksu Jerusalemni salgrochipak mail 3 chel'gipa  
**Modin** minggipa songjinmaona re'baaha. Wakko boli on-  
china uanona tom'bagipa Jihudirangko ua ge'etaha. Kamal  
ma'chongoni aro Isolna kengipa, Mattathias minggipa saksu  
Jihudi, ua ge'etgimin niamko manichenggipa Jihudiko so-  
otaha. Ua saloni dipetan Jihudi manderang Syrian man-  
derangni kosako chakatna a'bachengaha.

---



## HANUKKAH ARO RISMAS - BAK II

Mattathias siahaon uni depante Judas Maccabeus ka-rakgipa Jihudirangko chimonge Syrianrangni kosako jak de'dilaha. Uamang Judeani a'bri aro a'kawerango Syrianrang baksa bilonge dakgrikaha. Bon'kamao uamang Syrianrangko aro uamangna chakpagipa Jihudirangko Jerusalem songjinmaoniko a'rikattokaha. Ia jakgitel ong'aniko Jihudirang 165 B.C.-ni *Kislev* jani 25-gipa salo maniaha. Ia sal torom grigipa manderangni namgijagipa kamrangoni jakgitel ong'aniko gisik ra'ani sal ong'a. Ian Jihudirangni olakkiani torom nokko jakgitelatani salba ong'a.

Torom nokna dal'begipa gnigipa gisik ra'na a'sel ong'aniko Hanukkahni salo maniania Gital Daktaiani ong'a. Syrianrangko a'rikatna ine Jerusalem songjinmao Judas Maccabeusni napeon napram cholgugarangko nosto-ka'a, kamalrangni dongram nokdringrangko be'knigata, sararango samsi chapripa aro olakkiram nokba pakmarang gri bang-bangsa ong'aniko nikna man'aha. Bakbakan uko gital daktaina a'bachengjolaiaha. Torom nokko rongtalataha aro Zeus Olympiusna boli on'chakramko ra'ongkate un biapo gital boli on'chakaniko tariskaaha.

Skangni salrango boli on'chakramo donggipa ro'ongrang, jerangan uamangna rongtalgipa ong'achim indiba jerangkon Syrianrang marang nangataha aro jerangon boli on'chakna krajaha, uarangko mai dakgnok, Jihudirang u'ijaha. Uni gimin uamang ua ro'ongrangko torom nokni ki'tiksao dandake done uarangko mai dakna nanga agane-mesoke on'china Elijah katchinikgipa, ong'jaoba Messiah re'bakujana kingking senge dongna chanchiaha.

Torom nokna gittamgipa dal'gipa a'sel ong'aniko maniania On'kangani ong'a. Hanukkahkon On'kange Ale Cha'ani Sal ineba minga. Torom nokko gital daktaiang-mitingo torom nokni badiaba noksik samsao donnue dongimin tochriko chongipa todilio te'sa man'aha. Skang

## 62 NAMBATA JANGGI TANGGNINA SKIE-RA'ANIRANG

salrangode ua tokon torom nokko teng'suatna so'na jakkal-achim. Torom nok aro uoni pilak bosturangko nostoka'mano ua tomangmansan marang nanggija dongaiengachim. Ua toara walsanade chu'ongen dongkuachim. Indiba Jihudirangni aganritingbaani gita, aiao inmangipa minga a'sel uamangna ong'aha. Gital toko rudapna tarikujana aro rongtalatkujana kingking ua bang'gija toan salchetna kingking ching'e dongchaaha.

Torom nokko on'kanganina manianiko gisik ra'na Jihudi nok te'antion mombatirangko salchetna kingking so'na nanga ine niamko donaha. Ia somoio ge'sku mombatirangko gasa ge'sao dingtangmancha so'a. 'U' gita dakgipa bimango tarigimin pekcheto ua mombatirangko done pekbriprakni jatchio ge'sako niksengatna chubate done so'a. Iarang ge'prakprakan Hanukkahni salchetko mangsonga, aro uarangni jatchio chubate dongipako Shammash minga, jeni orto Nokkol ong'a. Shammash mombatiko so'chenga, unikosa Hanukkahni mombatirangko ua mombatichi salprak ge'prak so'roroanga.

Hanukkahko Sastroo Johan 10:22-23 bako changsamangmang janapaniko an'ching nikna man'a.



Krismas salko Kristianrang Jisu Kristoni a'gilsako mande pil'e atchianiko gisik ra'na mania. A'gilsak gimikon ia salo namnamgipa ring'mittelani gitrangko ring'e aro ale cha'anirangko dake Jisu Kristoni atchianiko mania. A'chikrangba ia somoimitingo kusi ong'bea aro katchabea. Bilsi bon'ao ge'a-gamanirang matchoto, mi-misirangko akmano, ge'a-gama kamrangoni neng'take ia salko manina chol ong'ani gimin ia somoio manderang dingtangmancha kusi ong'bea. Krismasni salko a'gilsakgimiko kusi ong'bee maniengmitingo namgipa Kristianrang a'gilsakni je biapoba gisik nangbee aro gisik name olakkie Gitelna ring'mittelanirangko daka.

---

## MAINA BENG·A ?

Maina—an'senganiko nisiatgipa chu ringna beng·aniko a'song chu'sokatna jotton-ka'na nanga ine Indian Constitutionni Article 47-o jatna daksoaniko donsomanaha.

Mahatma Gandhi, Jatni Pagipa, indine agana, "A'songko sikatang sason-ka'na angna kontasa mangmangnaba bilko on'oba, kontasani gisepon gimaanina maming on'pilani gri; a'songo donggipa chu dokanrangko gimaatanian angni skanggipa dakni kam ong'genchim. Chu ringani cha'uani aro noti-dakaninaba namjabatgipa ong'a."

Chu gisikko brangata aro ka'sine ka'sine an'senganiko nisiata.

Chu mandeni dal'batsranggipa bobil ong'a.

Ong'siatako man'gipa me'chikrangoni 32.5% aro Ameri-caoni 61.5% pagiparang chu ringrakgiparang ong'a ine jatni see rakkianio mesoka.

Chu ringani bewal mande sakantiko, nokdangko aro jatko ong'siata.

Darang toromba chu ringaniko nama ine ra'chakja.

Chuni bisi mandeko siaona dilanga.

**Chu Ringani Be'enna Namgniko On'ama ?**

On'ja, on'jasrang, batesa ua namjabegipa kamko daka aro ka'sine ka'sine an'senganiko gimaata. Chu bikako ka'kitata aro *cirrhosis* minggipa bikani namjabegipa sabisiko ong'ata.

**Chu Sam Gita Saako Namatgipa Ong'ama ?**

Ong'ja. Scientistrang aro doctorrang agana, ua sam gita dakja, batesa u'isogijao ua bisisa ong'a.

**U'igiparangni Chanchiania Mai ?**

Nehru Governmentni songgimin Teckchand Committee, sandie nimano aro scientific doctorrangming chanchigrikmano,

## 64 NAMBATA JANGGI TANGGNINA SKIE-RA'ANIRANG

an'tangni chanchianiko indine parakaha, "Chu sam gita dakja. Ua mitam sam bitchiko sogija rakkina dakchakgip-asa ong'aia."

### Indide Manderang Mainasa Chuko Ringa ?

Manderang dikdiksa kusi ong'nikanina aro cha'aniko jrongatani ine aro ripeng dakna chuko ringa, aro ua ka'sine ka'sine dakbewal ong'baa aro ja'mano uamang uko watna neng'nika.

### Beng'ani A'songna Man'ani Kajanaka Komiatjama ?

Oe, ua ong'naba donga. Indiba, mande sakantiko, nokdangko aro jinmako ong'siatgipa, a'sel nanganiko bang-batatgipa, tangka-paisako bon'atgipa, namgijagipa bewalko dakatgipa aro bilding-bilding ong'atgipa bisichi aro kragijagipa cholchi kajanako man'atani gisik gnangani aro ku'pattina kraani ong'ama ? Nanggijana tangkako indin bon'ataniko aro mahamaha dakanina nanggijagipa korosko gelanichi aro indakgipa bang'a krae dakani aro kragipa cholrangchi ia kajanako gimaaniko gapatna man'gen. Kajanako chimongramo kajanani indita gimaani dengnaba gnang indiba gipin cholrangchi manderangna aro jinmana namen namgniko on'gen. Gandhiji indine agana, "An'chingni giscpo hajalni hajal chupekgiparang dongani pal kangalbegipa obostao donggipa Indiakon anga man'na sikbatgenchim."

### An'chingni Be'enni Bakrangna Chua Maiko Daka ?

Chu ringani bak ja'manon, dikdikšana gisikni katchaani-ko on'a, ja'dilrang an'saoatako man'a, be'enni ding'ako ong'katata, ka'tongni cha'suko ta'rakbatata, indake an'chini jokruraaniko ta'rakbatata, mikkang aro mikronrang git-chakbaa, agananiko ta'rakbatata aro indake chu mandeko bel'belgipa dakata. Aditani ja'mano mandeni u'iani gimaanga aro maming orto gri agan-betbetna a'bachenga. Til'ekna sikaniko ong'katata, aro ka'sine ka'sine ua bilgribaa aro namgijagipa cholon ong'baa. Agre chu ringani be'enni ja'dilrangni bilgriani, tusina man'atgijani aro indakgiparangko ong'katata. Iarang gimikan chuko bang'e ba bang'gija

ringanio pangchaka. Chu ringrakanichi bakroe tanganiko kan'dikata.

**Indide Mainasa Manderanga Chu Ringani Bewalko Watgalja ?**

Maina chu ringania dakbewal ong'baa, aro chu ringna sikani bate bate batroroa. Chu ringjaode gisikni sinjetako man'nika, bilgrinika, aro name tusina man'nikja. Namgija-gipa ripengrangming rorimanichi chu ringani, ta'makku ringani aro pekatgiparangko cha'aniba ringani bewalko dakata aro ja'mano ua bewalko watna neng'nikani ong'a.

**Chuchi Mai Mai Gipin Gimaanirangko Ong'ata ?**

(a) An'chingni a'songo chu ringanichi krorni krör tangkarangko gimaatenga. Chu ringrakgipa basakobade changsanon botolsana gong ritchasa ba una baten koros-ka'a. Ramram kam ka'gipa mande salo gong'gittam ba gong'brikosan man'a. Indiba ua chuna tangka kapsako aro ta'makkuna kolgrikbonga paisako salprako koros-ka'ode, dong-spachi ua maikai nokgimikni manderangko aldumittangna man'gen ? Ua kangal ong'anini nokkol ong'jawama ? Chu ringgipa mandena tangka paisani bidingo indake namjabatrorogipa ong'a.

(b) Chuko dakna an'chingni a'songo mi mon lakchik-kingmangko bilsio bon'ata. An'chingni neng'nikani ia sal-rango indita bang'a miko bon'atna kraani ong'ama ?

(c) Aroba chuko dakna bang'a mittairangko jakkala. Mittai aro chiniko man'na neng'ani ong'engon mittaini dam maikai rakbatjawa ?

(d) Bang'a nokni manderangni kangal-ong'ani aro gimaani obostao ong'ani chuni a'selan ong'bata.

(e) Bang'a jik-se galgrikani chuni a'selan ong'a. Re-anggipa bilsil kolgrikni gisepo Americao lakgni jak-se galgrikani ong'aha, aro uamangoni 45 % chuni a'sel ong'aha. An'chingni a'songoba chuni a'sel jik-se galgrikani ramraman ong'enga.

(f) Bang'bata motorrangni a'sel-nangani, mokordomaka'ani, sorkarina dosiko dakani, noti-dakani, bi'ame cha'ani, mitchignigipa kamrangko dakani, joa-kal'ani, dokprete ra'sekani, simsakgijani, kamna choligijani, cholono namgijani, indakgiparang chuni a'sel ong'a.

## 66 NAMBATA JANGGI TANGGNINA SKIE-RA'ANIRANG

**An'chingni A'songode Beng'aniko Den'galna Nanga Ine Bang'a Skia-man'gipa Manderang Mainasa Aganenga ?**

Indine chanchigipa manderang, ritchaprakni gimin chanchiode, bang'jasrang. An'tangtangni giminsan chanchigipa skia-man'gipa manderang, ba chuko badinggiparang ba chu ringrakgiparang an'tangtangni namgnina manderangni ka'tongo namgija chanchianirangko nakatatna jotton-ka'enga. A'songni Prime Minister, Morarji Desai, indine agana, "Beng'aniko jegipa indakgipa skia-man'gipa manderang 10%-mangsan ong'aia. An'chingni a'songni manderangni 90%-mangde beng'aniko namnikpagiparang ong'a."

**Indide Maikaisa Beng'aniko Chu'sokgipa Ong'atna Man'gen ? Indakgipa Papko Jinmaoniko Maikai Ipakgalna Man'gen ?**

(a) Chuni namgijagipa a'selrangko ong'atanini gimia krenge aro dondikgija aganprakaniko dakna nanggen.

(b) Sorkari, me'chikrangni kam-ka'gipa dol, jinmani namgnina kam-ka'gipa dol, chatro-chatrirangni melaanirang, jinmaoniko ia papko ipakgalna jotton-ka'na nanggen.

(c) Dal'dalgipa kamrango chu ringgipa mandeko rakkianiko didiatna nangjawa.

(d) Jinmani biaprango chuni gimin aganprakaniko matnangna aro champengna nanga.

(e) Nomilrang chu ringgipa mandeko kimna jechakna nanga.

(f) Excise Act-ko dingtangible chu ringna on'ani hukumko bon'atna jotton-ka'na nanga.

(g) Chuni pal maiba ding'gipa ba ka'singipa ringaniko on'skana jotton-ka'na nanga.

(h) Niam gri chu palgiparangna, badinggiparangna aro chuko dakgiparangna gipin dake tangka man'ani cholko dake on'na jotton-ka'na nanga.

Namgijagipa chuko ipakgalbo,

Nang'na aro gimiknan kusi ong'aniko ra'babo.

## AN·CHINGKO SASON-KA·GIPARANG

Tangka-cha·boka, togia, kakket ong·ja, mikkang nia ina kattarangni gimin an·chingni samtangtongan ona gadango janggi tangenggipa manderangoniko aro chua gadango janggi tangenggipa manderangonikoba agananiko pil'ni pil an·ching knaronga. Songsaro janggi tangenggipa ramram manderang aro songko-nokko dilkalenggipa manderangni gimin agana-nioba indaka kattarangni gimin agananiko knana man·ronga. Maiba chona-remama kamna dorgasto galpaoba tangka-cha·bokrika, cholipajana ge'a-gamaniko dakpana ba maikoba dakpana Sorkarioniko biame bang·gija tangka-paisa man·paaonikoba officeo kam ka·giparangan saloprikaia, jako tangka dongpajaen chona-remama kamna dorgasto galnaba cholan dongpaja, sanaba mikkang nia, sakoba kal'ake roa ina kattarangnoba an·ching knana man·ronga. Chongiparang ona gadangni kri chone tangka-cha'a, dal'giparanga chua gadangni kri dal'e tangka-cha'a.....

Indaka ong'sianirangko gimaate cholgrigipa manderangna nambate janggi tangna dakchake on·dilpachina inen sason-ka·giparangko an·ching seoka. An·chingni seokgimin manderangni jakchi pilak duk-jajrengarang, ong'sianirang aro an·chingni ja·manchakenganiko gimaate nambata aro dongtobata janggi tanganiko man·pana ka·dongen uamangni jako sasonni bilko ga·akatna sika. Indiba sasonni bilko jako ra·giparang janapgimin ong'sianirangko aro dukrangko chel'atna ambebeama ?

A·songko sason-ka·gipa mandeo namgipa minggittam gunrang dongna nanga ine J.C. Hill agana :

1. Gisik seng'ani ;
2. Kakket ong'ani ; aro
3. Sakgipinrangni neng'nikanirango  
dakchake on'na sikani.

Ia minggittam gunrangoni badiaba mingsamangmang donggijanian sasonko jako ra·gipa mandeko chu'sokgijagipa

ong'ata. Gisik seng'mangmangari kakket ong'janaba donga; kakket ong'mangmangari kam cholijanaba donga. Gisik seng-gijagipa mande uni u'isokgijanichi mandeskarangni neng-nikanirangko chel'atna cholnikja; uni kakket ong-gijanichi manderangna dakchake on'ani pal uamangonikosa cha'bok-ra'sckgipa ong'skaa; sakgipinrangna dakchake on'na sikkigijagipa mande antangni namgnirangni giminsa chanchibata, uandake antangna man'ni bak dongjaode sakgipinrangna dakchake on'na sikani gisikan uo dongjanaba donga.

Changa-sapa, ka'donga, gisik seng'a, sakgipinko dakchakna amani bil, ba indakgipa namnamgipa gunrang uo gnang ine sasonni bilko jako ra'nasigipa mandeni gimin aganprakchengronga. Pilakan dakchakgrime uko uamangni dilgipa ong'atna man'ode, manderangni pilak neng-nikanirang, duk-jajrenganirang aro ja'manchakenganiko chel'attoke altubatgipa janggi tangani chol, kusi ong'atani chol aro jatko de'doataniko dake on'skana man'gen ineba aganprakanirangko an'ching knachengronga. Sason-ka'giparangko lekka pu'onanichi seokna skang, chakatnasienggipa manderang maidakgipa manderang, uamangni jakchi mai maiko dakna miksongsosani gnang, manderang maina uamangko seokna nanga, indakgipa kamrangni gimin talatanirang aro aganprakaniko knana man'chenga. Lekka pu'onanichi sason-ka'gipa manderangko seokmane uamangni kamrangko manderang nikna man'aha. Ua manderangni gunrang, changa-sapa, ka'donga, gisik seng'a, sakgipinrangko dakchakna sikani ba man'ani uamango badita gnang aro uamangni ku'rachaksogipa kamrangko chu'sokata ba chu'sokatgijani kamrangkoba manderang nikna man'aha.

Kam choliya, simsakja, nirok-sandija ine matnang-jachae aganani kattarangko ua salrangoba knana man'taia. Chu'sokna mangijani ja'pang a'selrangko sandion, songsarni manderangan uamang baksa ku'mong-nanggrimja, dakchakdangdike on'na sika; songsaro janggi tangenggipa manderangan namgija bewalo janggi tangangani gimin nama dakchakaniko on'na man'ja ine dilgiparangoni mitamni agananiko knana man'a. "Namgijachi amako man'nabe, indiba namgijako namachi ambo" ingipa kattakode kattanasa manderang aganaia, darang mandeba iako kamchi dake nibebenade man'ja ine mitam manderang agana. Namgijako



namachi amna jotton-ka'e nigipa manderangba dongahama, jotton-ka'e nioba chu'sokjahasama, indakgipa kamrangni gimin chanchie nina an'chingna gisiko naata.

Sasonni kamko jako ra'gipa mandede toromo janggi tangna man'ja; uanilaken, toromo janggi tanggipa mandeba sasonni kamko jako ra'na kraja ineba manderang chanchia. Sasonni kamko jako ra'gipa mande maina toromo janggi tangna man'jawa aro toromo janggi tanggipa mande maina sasonni kamko jako ra'na kraja ? Ona gadango donggipa manderang baksa kam ka'rimna, ku'mongrimaniko mesokna aro uamangko salna, aro dal'gipa manderang baksa meligrike kam ka'na ringrim-pekrimpana nanga aro uamangni daka kamrangko dakpana draani gimin toronni kamko ka'na kraja ine manderang agangenchimoba, ona aro chua gadango janggi tangenggipa manderangba pilakande ringsimsim-peksimsim dake janggi tangengade ba tangna nangengade ong'ja. Uni gimin toromo dongenggipa manderangde sasonni kamko jako ra'na nangja, ba sasonni kamko jako ra'enggiparande toromo dongna nangja inde ong'na nangjachim.

Ja'rikgiparang bang'a kamnan dilgiparango pangchaka, ong'jaode dilgiparangkong nangjawachim. Draachi ja'rikpana nanggipa manderangba uamangni nama-namgija pilak kamrangko nikpae de'mittelpaa, ong'jaoba matnanga. An'chingni dilgiparang uamangni kamo cholijaengode, manderangni nikanio uamang kakket ong'jaengode, aro mandeskarangna dakchakjaengode, uamangkosan an'ching tongtong matnangnade kraja, maina an'chingan indakgipa *chologijagipa* aro *simsakgijagipa* dilgiparangko seokaha, ong'jaoba nambata manderangko scokna gita an'chingan jotton-ka'jaha. Uandake an'chingba chona ba dal'a doskon ru'pana ga'aka. Sason-ka'enggipa manderangnasan a'songko-jatko silrornamroroatna kam ka'china an'chingba nichake dongaina nangja, indiba a'songo songpanggipa, an'ching sakantiba, man'a kamrangode uamangna dakchake on'pana nangchongmota. Nama kamrangchi dakchake on'asan ong'ja, ia kamranga an'ching sakantini dakna nanggni kaman ong'a ine chanchinaba nanga. Iarangko dakna an'ching sakantini dai ong'a ine ma'sianichisa namgijagipa kamrangkoba namatna man'gen, nama kamrangkoba nambatna man'gen,

## 70 NAMBATA JANGGI TANGGNINA SKIE-RA'ANIRANG

Sasonni bilko ra'namangmang krengaigipa mandede gita  
sason-ka'gipa manderangko seoktaina lekka-pu'onani somoio-  
nasan chanchisoa ; a'songna ka'sachong-motgipa mandenade  
somoini arian dongja, maina uade an'tangni chasongni  
nalsaona kingkingan namako dakna chanchisoa. Skanggipa  
dolni mandede doltangni chu'sokgni aro baigninasan sim-  
sakbata ; gnigipa dolni mandea a'songgimikni chu'sokgni-  
nasa. Skanggipa dolni mande doltangni niamo a songko  
chalaina nangnika ; gnigipa dolni mandea a'songgimikni  
manderangni namnika aro nangnika gitasa.

Sasonni kamko jako ra'giparangni gisik senga, kakket  
ong'a aro sakgipinrangni gimin chanchiningani kamrangchi  
chu'sokgipa sasonko ong'atna man'a ine an'ching nikaha,  
indiba iarangko mangrakbatatna nama kam-cholon, kraa  
bewal, toromo janggi-tanga aro mandeskana ka'saaniko  
nangkua. A'songo songpanggipa manderangoni bang'batan  
a'songtangko sason-ka'anina toromo pangchakode, aro  
gisikni seng'anio pangchake pilakni namgnina kam ka'ode,  
bang'batgipa kotokni jakchi sason-ka'ani bon'kamao bai-  
kamgipa, namgipa aro chu'sokgipa sasonko ong'atna man'a.

---

## AN·CHINGNI SONGSUL-NOKSULRANG

A·gilsakni pilak janggi gnanngiparangni gisepo Isol mandeko gisik seng·bate tariaha. Changa-sapa, gisik seng·a aro pilak u·janirangkon Isol mandenasa bang·bate pattiaha. On·gimin gisik seng·a aro changa-sapaniko mandesa nama ba namgija kamrangna jakkalaha. Isolni pattigimin bil aro gisikko man·manen mitam manderang da·asalo Isolkon kal·steke ropilna pa·enga.

Skangni chasongrangode manderang sakgipinrang baksa ku·mong-nangrime janggi tangna sikjachim. Sakgipinrangna ka·sachaka aro dakchake on·na sikani gisik dongjani gimin an·tangtangni janggi tanganikoba uamang namdapatna man·jachim.

U·iani, skia-man·ani, aro gisikni apalani bariroroe mandeni kamrang dintangrorobaaha. Bang·bata manderangan mai kam nama, mai kam namja, uko u·iaha ; uandaken maioni gelna aro maiko dakna nanga, uarangkoba basena man·aha. Uarangoni bang·batakon a·selrangchi draatanichi ba skie ra·e ba nikskae indake ong·na man·aha.

An·ching A·chik a·songko njate nibo. An·chingni samtangtangchian dintang dintang jatrangni manderang gnan. Uamango rokom rokom dakbewalrang aro bebera·anirang gnan. Salgrochi Assamese jatni manderang, salgipengchi Bangladesh a·songni Bengalirang, salaramchi Khasi jatni manderang aro saliramchi Bengali jatni manderang an·chingko duule donga. Ia dintang dintang jatrangni manderang dintang dintang dakbewal aro toromko ja·rika aro mania, aro ganding-chindingko gana-china ; uandaken uamang dintang dintang ku·sikrangko agana. Uamangni dakbewalrang aro bebera·e manianirang an·chingni dakanirang aro bebera·e manianirang baksa bang·aon apsan ong·ja ba melija.

Da·asalo a·gilsakgimikni pilak jatni manderangan apsan ma·kringni jong-adarang ong·a ; jatsa jatgipinni manderangna mitchigrikani dongna nangja ; sakantian jong-adaskarang

## 72 NAMBATA JANGGI TANGGNINA SKIE-RA'ANIRANG

ong'a ine ma'sie saksa sakgipinna ka'sagrikna aro dak-chakgrikna nanga ine a'gilsakni gisik gnanbatgipa manderang indine aganenga. Sastrooba indake agana : *Na'a an'tang songsulna an'tangna gitan ka'sabo. Iarangna bate dal'bagipa minggipin ge'eta gri.* Ia kattarangko kamchiba chu'sokatna man'bebegenchimode ian mairongpile namgipa kam ong'genchim ! Indiba a'gilsakni jatrang badita changasapa aro gisikni u'ianirango barirorobaenga, inditasa mandeskako so'otna aro nisigrikna nambata cholrangko sandienga gita ong'baenga.

Ja'dil su'pripkama gita ong'pile bang'a bilsirangna bobil ong'grikkame dongenggipa bang'a songsul-noksulrang gnang. Gipin jatrang baksa bobil ong'grikengana bate an'tangtangni be'ensan-an'chisan nangrimgipa jong-adaskarang baksasa da'ororo bobil ong'grikbatenga ine nikna man'enga. Israel aro Arab a'songrang, India aro Pakistan a'songrang, Salaram Germany aro Saliram Germany a'songrang, Salgro Korea aro Salgipeng Korca a'songrang, Formosa aro China a'songrang an'chingna nambatgipa sakkirang ong'a. Uamang an'chisan-be'ensanni manderang ong'a, indiba jong-adaskakon nisigrikna jak de'grikenga. Skia man'gipa ia chasongo indakgipa kamrang ong'engania kragijani aro aiao inmananisan ong'ja, indiba mitchigni aro dakmalgijani kamba ong'chongmota.

Mandeskako mitchiania mese mangsako gimaatna ine noktangko wa'al so'chipe gala gita apsan ong'a ine Harry Emerson Fosdict agana. A'jak sokna noksultangni nokko wa'al so'on ua apsan wa'alan noktangkoba kamani chol gnang. Noktangko wa'aloni jokate noksultangni nokko nisie galna man'genchimoba, mikkangchi tom'tome aro kusi ong'e janggi tangangna man'na ua mandena ka'dongani dongja. Uni noksul maiba mingsasik cholchide uko a'jak sokskagen. Uan uni gisiko dongtogijani aro so'sojengjeng ong'aniko ong'atgen. Achak manggnini chikgrikengmitingo uarangoni mangsako ro'ongchi gotate roode, manggipinsa uko chikatenga ine chanchie mangsagipaba ka'o nangbatroroa. Gisik grigipa manderangni kamrangha ia manggni achakrangni kam gita apsan ong'aia. An'chingni songsul an'chingna maiba namgija kamko ong'atode, a'jak sokna

ine uamangna an'ching maiba namjabata kamko daka. Uana ka'o nange uamang bilongbate jakbikpilatskaa. Uandake jakbikpilani skanggipa changna changgipino bilongbatrorobaa.

Sakgipinko nisina jotton-ka'ani mandeni gisiko dong-kamaiani gimin, so'otgrikani cholrangko manderang sandi-rikkita. Da'asalo jatrangni jatska baksa bobil ong'grike nanggriksimsima kamrangna gisik gnangbegipa manderang namen jajrengchakenga. Mandeskako nisina scientistrang rokomari silchidarerangko aro bilakbegipa bomarangko bikotaha. Uarangoni mitam bomarangde inditan bilakbegipa ong'ani gimin uarangko jakkale ninamangba manderang pa'sokpiljaenga. Bil gnangbegipa aro bilakbegipa a'songrang a'songsa a'songgipinko nisigrikna uarangko jakkalna nanggenchimode, dikediksi gisepon a'gilsak gimikan tappra changpile mandeni jatba uanon gimachapgenchim! A'gilsakni bang'a bakrangon hajalni hajal manderang okkri-cha'asie aro sae-ding'e salantian sichimchimenga, indiba bilakbegipa aro gam gnangbegipa a'songrangmangba iarangko champengna maikoba dakchengani pal a'songgipinko nisina aro a'songtangko warachakna bilonggipa silchidarerangnasa bangbata tangkarangko koros-ka'e tariskaenga. Ua tangkachi okkrie cha'asienggipa manderangko dakchakna, sabisirangko champengna aro a'songtangko nambat-silbatatna man'genchim.

Dakgrik-dinggrikani aro bilni bilakanio America aro Soviet Russia a'songrangko da'asalo a'gilsak gimiko niksengbatenga. Nambatsranggipa silchidare aro dakgrikani ostrorangko banaianioba ua a'songrang gesa ge'gipinna batna susagrikenga. 1961 bilsio Jatrangni Tom'bimonganio manderangko mikrakatna Americani gitcam President, John Fitzgerald Kennedy, New York songjinmao indake aganprakhaha: *Manderangan dakgrik-dinggrikaniko gimaatna nanggen, ong'jaode dakgrik-dinggrikanion mandeni jutko hon'atskanplok.* Uandaken, mingsinebegipa scientist, Dr. Albert Einsteinba indake aganaha: *Scienceni bilchi aiao inmanpile bilakgipa silchidarerangko mande hikotaha, iridiba bil'k'cripa scienceni bilchimangba uko warachakna clolan dongpiljaha. Gisik*

## 74 NAMBATA JANGGI TANGGNINA SKIE-RA'ANIRANG

*seng'anichin scienceni bilko mande bikotaha, scienceni bilchian piluk gisik seng'anirangko gimaatpilgen. Mandeni skia-man-rorobaani aro gisik seng'rorobaanichi songsul-noksulskarang baksa jong-ada chane ka'sagrike aro meligrike donganiko mangrakroataniko ong'atna man'genchimode ia an'chingni a'gilsak mairongpile nambegipa, tom'tombegipa, dongtobegipa aro an'sengbegipa a'gilsak ong'genchim !*

---

## BILKO KRAE JAKKALANI

Janggi tangangman'gimin aro janggi tangkuenggipa bilakbegipa aro bilgribegipa manderangni janggi tangangani aro tangenganio ong'anggimin aro ong'enggipa kamrang an'chingna dingtang dingtang dakmesokaniko on'a. Bang-bea kamrangko ka'na bilko mandena nangchongmota. Saoba saoba manderang bilo bilakaniko, mitama kraa gitasan bil gnanganiko nangnika, indiba darang mandeba bilgrinade sikchongmotja.

Matburingrangna gisik seng'batgipa ong'e mande uni bilko nama ba namgija kamrangna jakkalna man'a. Nam-gijagipa mitam manderang an'tangtangni bilakanichi sakgipinrangko sinjetna, saknaatna, onia ka'na ba duko ga'akatna uamangni bilko jakkala, indiba namgipa aro gisik gnanggipa manderangde uamangni bilakanichi an'tangtangni nambata janggi tanganina rake kam ka'a, sakgipinrangni namgnina uni bilchi dangdike on'a; uandake jat aro a'song gimikba uni kamrangchi bang-bea namgnirangko man'a.

Skang chasongrangode mande bilakgipa ong'ode Isolan una bilakchina bilko bang'e pattiaha, indiba bilgrigipa ong'ode Isol una sao on'asa inc manderang bebera'achim. Saoba bilakgipa mande bilakpagijagipa badiaba mandeni a'a-china mikbokode, uko sekdrae rara'achim, ong'jaode ua a'ao dongsogipa mande baksa bilchi-jakchi dakgrikna nangachim. Indake dakgrikanio je mandean chegipa ong'aha, uasa uni bilakani kri ua a'ani nokgipa ong'na man'achim. Isol an'tangba ua mandenasa chakaha aro unasa ua a'ako sesoaha inc bebera'e ama man'gipa mandeba an'tangni a'a-chiko una wate on'na nangachim. Uandake ua somoirango bilakgipa manderangsang nambate janggi tangani cholrangko man'achim, indiba bilgrigipa manderangde onia ong'ao, sinjetao, saknaao aro kenanio janggi tangkamna ga'akachim.

## 76 NAMBATA JANGGI TANGGNINA SKIE-RA'ANIRANG

Gisikni u'ianirang barirobaahaon manderangni chan-  
chianirang aro kamrangba dintangrorobaaha. Skia-man'a  
chasongo mande mandeskana ka'sana, dakehakna aro bilni  
bilakaniko a'songni aro jatni namgninasa jakkalna nanga  
ine bebero'skaaha. Mande sakantian an'tangko darangnuba  
bilakbatgipa ong'a ine chanchie mandeskako dakgrikna  
ra'bichekchekaiode, a'gilsik gimikan mairongpile so'sojeng-  
jeng aro bilding bildangsa ong'na nanggenchim. Mandeskana  
bamani, mandeskana ka'suani aro dakehakgrikna sikani  
gisik mandeo dongjawachim.

Changa-sapanirang badita burirobaa, inditasa mande  
uni gisik aro be'enni bilakaniko nama kamrangna jakkalna  
nanganiko u'iroroba. Unbaksaba mandeni bilari uko bilak-  
atna man'ade ong'ja. Mande aro matburingrangni bilko  
tosusaode, matburingrangan mandena baditaba chang bilak-  
bata. Bilakbegipa nongma ba matcha an'tangna bil batani  
giminde mandena bama ba kena ong'ja, indiba mande uni  
changa-sapa, gisik senga aro budiko jakkale bilakbegipa  
matburingrangko so'otna chol gnang. Bilakbegipa mongma  
ba matchara uni bilingtingchisan mandeko dakgrikna  
nanggenchim. Bilni bilakanio bilakbegipa Goliath darang-  
naba kenjachim. Israel gimik una dil'dilgokgok dakpile  
kenachim. Chong'krengkreng dakaigipa Daud, dambe pan-  
tesan ong'kuaiengoba, uni changa-sapuchi aro Isolo ka-  
dongachi Goliathko so'otaha, indiba ua cheanina Daud  
an'tangni bilo rasong chajaha. Uni bilingtingchiba Daud  
bilakbegipa singho bidom mangsako doke siataha. Daud  
uni bilo bilaka aro budi donganiko sakgipin manderangko  
nisina aro saknaatna on'tisaba jakkaljaha. Batesa an'tangko  
so'otna a'doksaoni a'dokgipinona rikjoenggipa Saul raja-  
komangba so'otna man'gnioniko so'otgija kema ka'aha.  
A'gilsako bilakbatsranggipa Samsonmangba uni bilakbegipa  
bilko namgija kamrangna jakkalna man'genchim, indiba  
Isolna bame, Isolko chonnikgipa Philistirangni kosako a'jak  
soknusa biltangko jakkalaha. Be'en bimango mangrakgipa  
aro bilo bilakgipa sakgipin manderangni giminba an'ching  
knarongja, indiba bilo bilakani gimin aro ka'ao ka'arakani  
gimin indakgipa manderangoniba mandeskako saknaata aro  
knajeta inako an'ching knarongja.



An'chingni chasongoba be'eno aro gisiko bilakbegipa manderang bang'a. Gisik gnanggipa aro seng'gipa manderangna be'en aro gisikni bilakani uamangna rasong aro gun ong'a maina uachi uamang an'tangtangna nambata janggitangani cholrangko dakna man'a. Gisik grigipa manderangde gaora de'skae biltangko manderangna mesokna sikanichi name aro kusi ong'e janggi tanggni cholrangkon gimaatskaa. Bil-jak mesoksimsima dakaigipa mandeko mandeskarang mande-ra'ja aro uo namgipa ripengrang dongja. Agre bilaka ine an'tangko mesokna siggipa mandeko mandeskarang mikbubea. Uni gimin uni janggi tanganio una ma'manti rokomni kenanirang sokbaa. Mande dagranga aro gaora dakachi mandeskarangko onia ka'e janggi tangnasa miksongode, badiaba salo una bilakbatgipa sakgipin mandeni jako una ong'sibatgipa aro kratcha·batgnigipa sal sokbachong·motgen. Bilo bilakbegipa mande gisiko bilgri ong'naba donga, indiba be'eno bilgribegipa mandeba gisiko bilakbegipa ong'skana man'a. Be'enni bilmangmango bilake gisiko bilgrigipa bang'bata manderang biltangko krae jakkalna changjae an'tangtangkon so'otaona sokata.

Gisik gnanggipa bilakbegipa manderang an'tangtangna saoba dongkua ine u'ia. Uni gimin uni bilakgipa bilko jakkalsretanina badiaba salsaode namgijagipa maiba sastiko man'skagen ine ua kensoa. Mandeni bilchisan ong'aigija, a'songrangni bilko mesoke gipin a'songskarangko ra'sekna aro dokkol-ka'na jotton-ka'anirangkoba an'ching nika. Indake dakachi uamang rasong chana man'ani pal ru'utgijan kratcha·beani aro chonnikanikosa chagrongaiaha. Adolf Hitler an'tangko a'gilsakgimiko bilakbatsranggipa aro seng'batsranggipa mande ine chanchie a'gilsakgimikko amna jotton-ka'aha, indiba indake dakna man'ani pal an'tang janggiko gimaatesa German jatgimikko kratcha·ataha. England a'songba changsao a'gilsakni bang'a dingtang dingtang a'songrangni kosako sason-ka'roroangna man'ani pal, Englandni sasono donggipa a'songrang ka'sine ka'sine ma'eke katangpilaha. Uamangni bilakani aro rasong chaani uandake gupilaiaha.

Gun gnang bilakgipa mande changa-sapani, nama kamrangna miksongani, ka'saani, dangdike on'na sikani aro

## 78 NAMBATA JANGGI TANGGNINA SKIE-RA'ANIRANG

namgijagipa kamrangoni gelna bilko man'na krenga, indiba gisik grigipa mande sakgipinrangko sinjete rona, dokkol-ka'na aro sakgipinrangko saknaatna chol man'na bilko nangnikskaa. Gisik gri be'enni bilakmangmangajanichi an'tangko aro sakgipinrangkoba mangrakatja ; uandaken gisiko aro be'eno bilgri ong'anichiba. Be'eno bilgriebe gisiko seng'begipa manderangba gnang. Uamang be'eno bilakbegipa manderangkoba duko aro saknaataniona sokbaatna ama. Bilko krae jakkalanichisa mande an'tangko aro sakgipinrangko bilakbatatna man'a. Bilni bilakaniko kragija jakkalani mingantinan maiba rokomo a'jak sokani ba sasti mandena sokbapila.

---

## GIPINRANGNI KAMRANG AN·CHINGNA NAMGIPA SAKKI

Badiaba saksa mandeo dongtobegipa nok, apalbegipa a'ba, namgipa nokdang, ka'sagipa jik-dedrang, bang'bea chakkol-nokkolrang, bang'bea matchu-matterang, aro chim-onggimin gamrang gnan. Uni pilak nanganirang uni bil aro jakon ong'a ; uni pilak kusi ong'anirang aro rasong uni dedrangan ong'a ; uni pilak rasongranga uni chur'sokani ong'a ; uni mikkim uni namgipa kam-cholon ong'a. Uni nokdango kusian gapa ; uni namgipa kamrang sakgipin manderangna dakmesokani ong'a. Uni bario nitogipa aro similgipa pulni bibalrang bala ; uni a'bao mi-misirang sila aro namgipa biterang nanga.

Sakgipin mandeo chonbegipa busruni noktop gnan. Uko noktop ineba mingsrangna man'ja indiba rong'koline mingskanaba man'ja. Uni nokking rurongangaha aro kol-gipurarasaha ; uni pakmarangko a'kin cha'aha aro simsaka grie kingwenge a'ao ga'aknasiengaha. Uo jik-dedrang gnan, indiba uamango katchaani aro kusi ong'ani gri. Uamangni gisepo agangrikanirang komibea, kusi ong'rima aro ka'-dinggrikanirang dongja. Nokni ma'dot aro dedrang ua nokdangni pagipako bang'e mikkang nikrongja aro mikkang nikna nangani a'selba bang'ja. Uamango matchu-matte dongja aro chakkol-nokkolrang dongja. Gisepo je re'bapagipa manderanga churing-chupekgiparang aro namgijagipa rokomni manderangsa ong'a. Uamango chongipa bari damsangnan, indiba uano nitogipa pul ba similgipa bibalrang gri. Chongipa a'ba damsangnan uamango gnan, indiba uanoba mimi'si chaani pal samsi, bu'surang aro budurangsa dikpripksaa. Uamangni noktopba ia chongipa bari aro a'bani samsigrimo galprugipa noktop gita ong'a.



Gam gnannggipa, chol gnannggipa, gisik seng'gipa, kam bimchipgipa aro gun gnannggipa mandena kam ka'na jakko,

## 80 NAMBATA JANGGI TANGGNINA SKIE-RA'ANIRANG

re'na ja'ako, nikna mikronko, knana nachilko, chanchina taningko aro uandake be'enni pilak nanga bakrangko Isol una pattiaha. Alsiagipa, kam choligijagipa, kangalgipa, cholgrigipa, denggu dakgipa aro ong'sigipa mandenade Isol larangko pattijahama? Saniba jak arate dongchina indiba saniba jaksan kam gong'china, saoba kam bimchipchina indiba saobade tusimsime dongaichina Isol mamingsaloba mangsongchong'motjaha. Pattigimin jak samgnini jaksi chong 10-mangmangchin mande aiao inmanbegipa kamrangko ka'na man'a, kamrangko ong'atna man'a aro bosturangko banaina man'a. Ia skia-man'a an'chingni chasongode kanarangba nikna, sena-jotna aro poraina man'aiaha, nagokrangba knana man'aiaha, bobarangba ku'aganna man'aiaha. Indibe be-en-bimang namgipa, gisik seng'gipa, ja'a-jak, mikron aro nachil name dongaienggipa manderangde baditan nambata kamrangko ka'na man'genchim!

Alsiagipa manderang bimchipbegipa aro kam gong'begipa manderangni kamrangna aiao inmanbea; uandaken bimchipgipa aro kam gong'begipa manderangba alsiagipa manderangni kamrangna aiao inmanskaa. Aratani aro kamna nisiani mandeko ong'siao aro duko ga'akata, indiba bimchipania mandeko nambata gadangona tang'doata ine an'ching poraibamanaha. Indiba, nambata gadango janggi tangatani aro ong'siaona mandeko salonani minganti a'selba gnang.

Alsia aro aratanichisan mandena duk sokbaa, iade ong'ja. Joa-kal'gipa, churing-chupeksimaigipa, aro cha'u-dokpretgipa manderangba duko ga'aka. Joa-kal'ania je chimongpagimin aro dongpaenggipa gamko rusiata; uandaken churing-chupekaniba nokdangna kajia-golmal aro so-sojengjeng ong'aniko ra'baa. Chua gadangko rakkina aro gisik seng'aniko churing-chupekosan ma'sina ambebeama? Iako ma'sina churing-chupekpana nangbebeama? Ong'jasrang! Basik sak indakgipa manderangko an'chingni samtangtangan ramramari nikna man'aienga, Indakgipa manderangni agana gita, nama-namgijako tale ma'sichong'motnade namgijagipa kamrangkoba jakdangdikpana nanga. INDIBA namgijaoni namaona an'pilbana man'chipjaosai? Iako namatpilani cholrangde uamango gri, aro namatpilna nangani a'selba

## GIPINRANGNI KAMRANG AN'CHINGNA NAMGIPA 81

dongja, maina indaka kamrangkon nama ine uamang chanchia.

Uni siaoni da'o bilsu ritchagittam sotdokmang batang-pilaha, indiba darang mandeba William Shakespeare gita lekka serakgipa a'gilsako atchitaikuja ine agana. Lekka-ki-tap sechina Isol Shakespearenasan gisikko pattiaiahama ? Boltongrangchi rikaigipa chonbegipa noktopo atchigipa, kangalbegipa nokdangoni Abraham Lincoln mandeni mandeskako nokkol-itaniko nie dongna man'jae mandeni jakgit-elna dakgrikaha aro ua kamnan an'tangni janggiko gimaat-aha. Abraham Lincolnsan mandeskana ka'sachakchina aro mandeko nokkol-itaniko gimaatdilchina Isol ukosan a'gilsako atchiahama ? Crimea Dakgrikao mata-bura aro saknaa-tengtoa man'e janggi tangangkuna ka'donggijagipa manderangna naljokani, ka'dimeani aro ka'sae sananiko Florence Nightingalekosan Isol sesoahama ? Gisik ta'raka aro lekka-bida man'ana Bengalni de Iswar Chandrana Vidyasagar ine aiao inmanpilgipa bidako unasan donsoahama ? Kana, boba aro knagijagipa manderangba nikna, aganna aro knana man'a ine aganprakachi, sakgipinrangni kattarangko knaachi aro ki-taprangko seachi Helen Keeler a'gilsakna namgipa sakkirangko on'angaha. Helen Keelernasan ia gunko Isol pattiaiahama ? Ma'gri-pagri bi'sarang, cheligijagipa buchuma-budeparang, aro galchipa man'e dongenggipa manderangna dal'bea ka'dongatani aro ka'dimeataniko Mother Teresa on'aha. Indakgipa simsakani aro nirokaniko indakgipa manderangna on'china Mother Teresakosan Isol mingsoahama ? Jatni Pagipa ine a'song aro jatni namgnina ku-mong-nangrimchina, yakni kamko chonnikjachina aro a'songna dangdike on'china Mahatma Gandhi kattachi aro kamchi an'tangan dake mesokangaha. Isol uamangna bang'bata taningko, ja'a-jakko, mikron, nachil aro ku'sikko pattiaiahama ? Indiba da'nang ! an'ching, ramram manderangde, uamang gita dakna ampajaha aro cholipajaha.

Aratgipa manderang bimchipbegipa aro kam gong'begipa manderangni kamrangna mikboka, indiba an'tangtangni jakko on'tisamangba snilatna aro kam ka'atna sikja. Bang'a changon ia kamchin uamangko cha'u-ra'sekaniona aro namgijagipa kamrangona dilanga. Ia gitachachan, bimchipgipa

## 82 NAMBATA JANGGI TANGGNINA SKIE-RA'ANIRANG

aro kam sapgipa manderangni kamko alsigipa aro aratgipa manderang mikbua. Indiba mande kamko skie ra'gija basak-oba je kamkoba changna amama ? Sakgipinrangni chue lekka-poraie, nama kamrangko ka'anga, aro nama gadango janggi tangangani an'chingna namgipa dakmesokani ong'a. Indiba chue lekka poraipana aro nama kamrangko uamang gita changpana aro ka'pana an'ching an'tangtanganon tikkelan dongjaode, maikai an'chinga ua gadangona sokena man-pagen ? Gam gnangbegipa mandeba uni bang'begipa gamko ka'sine ka'sinesa chimongroraaha. Uandaken rakbegipa aro amjasusu dakpilgipa dal'begipa kamkoba jot-ton-ka'beachi, chakchikachi aro chur'sokna miksonge kam-ka'anichisa amna man'a. Apalbatsranggipa sagalkoba mande chowilwile niman-aha ; apalbatsranggipa a'gisikoba mande re-wilwile niman-aha ; tu'batsranggipa sagalni bakkoba mande toe nimanaha ; a'gilsakni chubatsranggipa a'kuchotkoba mande maldoe nimanaha.

Minganti rakgipa ba neng'gipa kamo mandeni chur'sokna amania uni rake aro kingkot dake kam ka'ani a'selsa ong'a. Uandake mandeni minganti ong'sia ba duko ga'akanja uni aratani, simsakgijani aro jot-ton-ka'na sigkijani a'sel ong'a. Indakgipa pilak gipin manderangni kamranga an'chingna namgipa sakk ong'a ; iarangoniko an'ching bang'bea nama skianirangko an'tangtanga basee ra'na man'a.

Dongchakna nokko mandena nanga, indiba mande nokko rikchengjaode baoni nok an'tangari una ong'katbagen ? Tangna mande cha'na nanga, indiba cha'na gita una cha'aniko nangchenga. Gamgija ba kam ka'gija mande cha'aniko ong'katatna amama ? Ganna-chinna chola-ba'rako mandena nanga, indiba tangkachisa uko brena nanga ba ba'rako dokna nanga. Tangka-paisa man'ani cholko dakna mande an'tangan kam ka'jaode baoni tangka-paisa ba ba'ra-chola uona indin re'bagen ? Mande kusi ong'e janggi tangna man'na gita nokdangni pilak duk aro jajrenganirangko chel'attokna nanga, indiba ua duk aro jajrenganirangko chel'atna mande an rake kam ka'jaode, maikai uarang an'tangari indaken gimaanggan ? Uni pilak nanganirangna mande an'tangan kam ka'jaode, uarang salgisakoni indin ga'akonbajawa. Sukeba dukeba mande janggi tangbo, man'e

cha'gipa ba kangalba ong'bo, bimchipgipa ba aratbegipaba ong'bo, manderangni pilak duk-suk ong'a, nokma-kangal ong'a, bimchipa-aratania uamangni kamni a'sel ong'a ine an'chingna bang'bea sakkirang gnang.

Indake aganani gnang : Changa-sapanikode mandena inditana kingking nangja, indiba kam-ka'na uni miksong-chongmotanikosa. Minggipin dake aganskaode, mandeni chu'sokania chu'sokani bil uo dongani giminde ong'ja, indiba kam-ka'na uo gisikni sikani aro tikkelani giminsa.

---

## KAMNI BITE

An'chingni gisepo rokom rokom manderang gnang. Ia rokomari manderangni gisepoba gisik seng'tingaigipa, goka-begipa, an'tangko u'inigipa, an'tang changpa-sappajae sakgipinrangni changa-sapa kamrangoniko skie-ra'na sikgipa, mamingnaba simsakgijagipa, mamingnaba chologijagipa, sika-tang dakaigipa, ba indakgipa rokomni manderang gnang. Ia dintang dintang rokomni dolrangko ra'gimiktaie bak gittam dake sua'na man'taia : skanggipa dol, Gisik seng'chongmotgiparang ; gnigipa dol, Gisik seng'a churongpajae senggipagipin manderangoniko skie-ra'skagiparang ; aro gittamgipa dol, Antangtangba seng'a churongja, indiba sakgipinrangonikoba skie-ra'na sikgijagiparang.

Bang'a manderang an'tangtangni dakna man'a kamna baten u'ia ine an'tangtangko chanchironga. Indake chanchigipa manderangoni bang'an an'tangtangni u'inikaniko kamchi dake nina sikrongja aro dakna man'aba ong'ja. Jerangan kamchi dake nia, uamangde ua kama badita raka ba altua, dakna amgni kam ong'ama ba dakna amgijagipa kamsama, uarangni gimin tale ma'sia.

Otto Lilienthal badine agana ? — *Bilgipa bostuko dake nigija tarina chanchinamangmangde mamingba neng'ani gri. Chanchigiminko bimango dake ninade adita rakgipa kam ong'a. Tarigimin bimango bilatanisa pilaknaba rakbatsranggipa kam ong'a.* Da'ororo ramramarian nikna man'enggipa aeroplanerangni gimin an'ching aiao inmanjaha gita ong'pilaiaha. Indita dal'begipa aro jrimbegipa bostuko mande sako bilatna amgen ine sawa u'isoachim ? Sako bilna man'bebeahaoa uarangni bilanina aiao inmanna nangani a'selkon nikjaha gita ong'pilaiaha. Sako bilgipa bostuko dakna skang bang'a manderang gisik neng'bee, chonnika man'e, saka'a aro mata-bu'a man'e, aro janggitangtangko on'kangna nangpile kam ka'na nangaha. A'gilsako bilche'ggipa aeroplaneni kattako songbado gatatchina aganon,



ong'na amgijagipa kamsa ine bebera'jac, songbad segiparang ua kattako songbadtangtango gatatna nangnikjaha.

Wal'ku jokdoangako niari, uni kamko ning'tubee chanchie belunko ong'ataha; belunni bangbango balbona man'ao pangchake aro do'orangni grang badale sako an'sengriri merac roako nie aiao inmanpilgipa aeroplanerangko ong'ataha; chi gitua bibani kettilko gripgipako childona man'ani bilko nike bibani bilchi jahat aro rel garirangko ong'ataha. Chanchirikkotgipa manderangni bil aro gisik neng'e, change aro jotton-kar'bee ongratani jamano, da'asalo an'chingoni bang'batan belun maidake bangbango gitchoenga, aeroplane maidake salgjo bilen'a, jahat aro rel garirangni kolrangko maini bilchi chalaienga, iarangni gimin ning'tukale chanchiate ninan sko sanikbeaha. Ia mingprak kamnan rakbee, duk chakbee aro ning'tubee mikot mikot chanchichengesa, chanchigimino pangchake ia kamrangko mande ong'atna maraha.

An'chingni samtangtango salanti nikrongenggipa kamrangko an'ching altuabce nika aro chanchia. Chonbea kamonisa a'bachengdobae dal'bea kamrangko ong'atna man'a inearang mandean u'ia, indiba chona kamrangko chonnike aro michepe, rang'sanan dal'a aro raka kamrangko dakna sikani an'chingni gisiko gnang.

Gisik gnange atchigipa manderang an'tangtangni daka-rika kamrangoniko an'tangtangna namako skie-ra'a. Uamang gisik gnanggipa aro gisik senggipa dolni manderang ong'a. Mitam manderang an'tangtangni changa-sapa aro u'ia chu'ongpajae an'tangtangna u'ibatgipa manderangoniko skie-ra'skaa. Jotton-ka'na aro skie-ra'na sikani gisik dongani gimin, uamang ua kamrangko skie ja'rikpana man'a. Uamang-ba duko ga'akgipa dolni manderangde ong'ja. Indakgipa rokomni manderangba gnang, jerangan an'tangtangni je on'tisa changa-sapa kamrangonikoba an'tangtangna nama kamrangko skie ra'na man'genchim, indiba skie ra'ja, aro sakgipinrangni changa-sapa kamrangonikoba skie ra'na man'genchim, ukoba dakja. Uandakgipa manderangde goka-rangni dolni manderangsa ong'chongmota.

Kam gri an'tangko u'irikgipa mande an'tangni dakna man'ana batan an'tangko u'irikengani gimin, ua mande

gaora de'gipa aro rasong dakgipa ong'a. Jekoba dakna man'aja aro jekoba u'iaia ine ua an'tangko chanchia. Chanchiatangkoba kamchi dake nijasan ong'ja, indiba sakgipinrangni nama kam aro changa-sapaonikoba skie ra'na sikkipa mandeba ong'ja. An'tangko u'inika dakgipa mande janggi tangani gadangtangko skie ra'na sikkipa, kam bimchipgipa aro an'tangtangko nambata gadangona de'doatna kam ka'gipa gipin manderangni gadangrang baksa tosusae niatode, uamangna namen onbata gadangosa dongenga ine nikna man'gen. Iani bidingo mingsa indake aganani katta gnanng : *Nung seng'aniko aganpraknabe; kamchisa dakmesokbo*. A'gilsakni pilak nama-namja kamrang, gisikni ning'tuanirang aro a'gilsakni pilak seng'aniko skie ra'mane lekka-pora aro bida-budi dongmanoba, maiba chonbea mingsa kammangmangkon ka'na changjaode, nang'ni choligijagipa kamna sakgipin manderang nang'na kratcha'chakna aro nidikchakna skangan na'a an'tangan kamtangna kratcha'chengna nang-jawachimma ? Skia-man'gijagipa, lekka-pora donggijagipa, gadango nang'na onbatgipa manderang nang'ni indaka kamna maiko agangenchim ?

Saoba mande lekka-porani chubea bida gnannggipa ong'a, indiba ua jakni kamko on'tisaba changja : saoba mande mistrini kamko ka'na changbegipa ong'a, indiba rongtal-an'talani namgnini gimin u'ija ; saoba mande gisik sengbegipa ong'a, indiba mandeskana ba nokdangna dakchakna sikkijagipa ong'a ; saoba mande man'e-cha'begipa ong'a, indiba namen alaksigipa ong'a ; saoba mande mikkangbimang daknangbegipa ong'a, indiba kam-cholono olgrokbegipa ong'a. Mingsa kammangmango changa-sapa ba namari minggipin bakode bangbang. Mandeni u'ie aro skie ra'na nangni kamranga inditan apala, bang'a aro raka, uarang pilakko skie ra'tokna jotton ka'genchimoba mande uarangko daktokna amjawachim. Chonbea aro dakna man'atang kamoni a'bachengesa mande uni u'ianio u'idaproroa aro kamrango changdaproroa, aro indake dakna jotton-ka'anichisa nambata gadangona uko tang'doatangchong'mota. Sakgipinrangna dakchake on'na sikani aro dakchakna kusi ong'anichiba mande an'tangna bang'bea skie ra'anirangko man'na ama. An'ching chonbea kamrangkoba skie ra'na kratcha'na nangja aro sakgipinrangni ka'akoba champengna

ba chonnikna nangja, batesa ku'sikchi didie aro kamchiba ka'e dakchake on'na nanga. An'tangtangko u'inika aro changnika dake chonbea kammangmangkoba dakna chang-chippigija janggi tanga gimiko choligija sichipangaiana batede mandeskarangni mikkango chakna ampilgija kratcha'a aro chonnikako man'emangba an'tangna changbatgipa aro u'ibat-gipa manderangoniko je on'tisa chona kanirangkoba skie-ra'e nambata aro dongtobata janggi tangani cholko dakna man'anian baditaba chang nambata aro gamchatbata. Mitam manderang tekkiachi skiako man'a; mitam manderangde aratani nokkolsa ong'e cha'a-ringa gri nokdang-ba'ku dakanio ong'sia, mandeskarangni galchipako man'a aro chonnikgrim-ako man'e sichipangna ga'aka. Uamangni indaka kamranga an'chingna namgipa skiani ong'jama ?

---

## TANGBANGANI

Chengo an'chingni pagitcham aro ma'gitcham Adam aro Hobako Isol dakchenge Edenni bario donon, *Ua barini jatchio boljanggikoba aro nama-namgijako u'iani bolkoba chaataha* (A'ba. 2:9). *Indiba ua nama-namgijako u'inni bolni biteko cha'na nangja, maina uni biteko cha'ani salon na'a sichong-motgen* (A'ba. 2:17) ine Isol Adam aro Hobako beng'aha. Ua nama-namgijako u'iani bolni biteko cha'jahaode Adam aro Hoba sijawachimma, an'ching u'ina man'ja..... *Da'o ua jak snile boljanggini bitekoba ake cha'e jringjrot tangnoba donga* (A'ba. 3:22). Iani gimin chanchiode Adam aro Hoba aro uamangni deritchu-su'ritchu, an'ching, sijawachim ine chanchichipna man'a. Adam aro Hoba nama-namgijako u'iani bolni biteko cha'ahani giminsa siaha aro an'chingba sina nangenga ineba an'ching chanchichipna man'a.

Sichina Isolan an'chingko donsoahani gimin an'ching sinade nanggenan. Indiba sawa, basako aro maikai sina nanga, uko Isol donsojaha ine an'ching nikna man'gen. Uni gimin mande sakantini siani salko donsoaniko bebe-ra'na neng'ani ong'a. Bebe-ra'na neng'ani a'sel ian: Europeo aro skia-man'gipa gipin gipin a'songrango atchigitalrang, maiba maiba gelna man'gijagipa a'selrangni gisepo, Assamo, aro Indiaoba sak 100 atchiani gisepo sak 30 ba 40 sia. Garo Hillso, Assamo aro India gimikoba manderangni tangbangani, nigimike, bilsa 40 ba 50-san. Europe aro gipin skia-man'gipa a'songrango tangbangani, nigimike, bilsa 60 ba 70-ni gisepo ong'a. Indake Assamode aro A'chikrangni gisepode atchigitalgipa ritchaparako sak 30 ba 40 sichina, aro dal'giminrangni gisepoba India, Assamo, aro Garo Hillsode, nigimike, bilsa 50 ba 60 ong'on sichina Isola donsoahama? Indake Europeni aro gipin gipin skia-man'gipa a'songrangni manderangko Isol mikkang-nia ine an'ching chanchina man'genma? Tangbangani niamrangko an'ching manina changjani a'selsa aro uarangko manina sikoba cholrang dongpajani a'selsa an'ching salsokgija sienga ine an'ching chanchina man'a.

## Cha'a-ringani Simsakani

An'ching janggi tange dongna cha'na nanga. Indiba aganani gnang: *Tangnasa cha'bo, indiba cha'na tangnabe.*

Pilak cha'ani-ringani-rangan be'enna namgniko on'gipa ong'ja. Mitamko tonikani giminsan aro mitamko cha'e ranta ong'ahani giminsan an'ching cha'ronga. Uarangoni mitam an'chingni be'enna namgniko on'ani pal namgijakosa on'a. Uarang an'chingko ok-saata, ok-re'ata, aro gipin gipin sabisirangko ong'katata. Jeko cha'ode an'chingni be'enna ba okna namja uko an'ching gelna nanga. Nanganina bate cha'ode an'chingni mi aro bijakanba bisi ong'a. Maming cha'aniko cha'on ba ringaniko ringon cha'kuna ba ringkuna sikengachim ino dipetan dontongbo.

Man'a dipet cha'ani somoiko donsobo, aro ua apsan somojosa cha'rongode nama. Cha'mano maming gipinko bange cha'dapni nangja. Me'diko song'na merongko sikon minbaengmitingon gipin merongko sigipa merongba minja. Indaken an'chingni cha'dapdapgipa cha'ani jrongna man'ja. Cha'anirangko pangnan nom'e song'rongna nanga. Mongsong budepa-buchuma ong'giparang aro ong'baenggiparang name mingimin cha'anikosa ka'sine cha'na nanga. Iako gisik-ra'bo: Rakgipa cha'aniko binekatna an'chingni okningo turi dongja, natani ro'ongba dongja; jrongatani bitchisan dongja. Bewal gitade an'chingni cha'gimin mi jrongna kontasa nanga, be'en-bitinrang jrongna kontagni ba kontagittam nanga.

Donsogimin someiosan cha'aniko cha'rongbo ine kosako semanaha. Uni gimin maiba namgipa aro togipa cha'aniko mi cha'mano nang'na ra'bae on'ode, cha'apo cha'na ine uko tarie donbo.

Chu-ringani, ta'makku-ringani, gue-cha'ani aro indakgiparang be'enko nisiatgiparang ong'anina agre maming namgniko on'giparang ong'ja. Gue-panming chunko bange cha'e ku'siko pari dakata. Bilakgipa chuko ringe okningni bibik-bikarangko kamata. Indake okningo pari-dakata. Unon *cancer* parirangko ong'katata. Sigaret aro chuko ringronggiparang *cancer* pariko man'rongbata ine da'ororoni doctorang aganenga.

## 90 NAMBATA JANGGI TANGGNINA SKIE-RA'ANIRANG

Namgipa sigaretni dam komibatgipa depprako Gg. 1.50 ong'a. Sigaretko ringrakgiparang salo depgnina komigija ringronga. Indake sigaretna salo Gg. 3-ko ba jao Gg. 90-ko koros-ka'enga. Namgipa aro bilakgipa chuni dam botolo Gg. 100-mang ong'a. Indakgipa chuko salo botolsa ringaioba indake jao Gg. 3,000-ko koros ka'enga. Chuni dam da'ororo badita ong'a uko hisap-ka'e nie chu ringgipa mande chuna jao baditako koros-ka'enga an'tangan jagokman'gen. Maming namgni grina indita tangkarangko koros-ka'ania gisik grini kam ong'a ine aganode saoba uko jegenma? Ua tangka ba tangkarangchi jatna, nokdangna aro dedrangna koros-ka'ode baditan namgniko man'genchim.

### Be'enko Ranta-ka'ani

An'chingni jakkalenggipa kolrang aro atte-gitchirangko jakkalgija ru'ute donode maram cha'a aro ru'utani ja'mano uarang mamingnaba choligijagiparang ong'a. Mahamaha tanggiparang, an'tangtangko on'tisaba neng'atna-sikgija tom'tom dongaigipa manderang, chong'motan, be'enko ranta ka'gijagipa manderang saanirangko man'ningbata aro sining-bata. "Dignity of labour", chong'motan, yakni kamko ka'anio rasongko man'ani ong'a ingipa skianiko bang'a manderangan, mongsong da'ororoni skia-man'gipa manderang namnikja. Maming kamkoba jaktangchi dangdikna sikja. Indakgipako an'ching aratgipa mande ine chana. Maming kamkoba ka'gija dongaigipa aratgipa mande dukko man'ninga, saninga aro sininga.

Bilakatna be'enko ranta-ka'ani adita niamrang gnan. Noktango, a'batango ba songtango jaktangchi mamingkoba dakgijagipa mande ia ranta-ka'na donsogimin ranta-ka'ani-rangko dakskaode nama. Indiba yakni kamrangko ka'rong-gipa manderangna ia ranta-ka'anirangko nangrongja. Yakni kamko ka'na uni be'eno maiba bilgriani gnanode pringanti ba attamanti re'roroaniko dake an'tangni be'enko bilukatna aro an'sengatna man'a. Agre dakgija neng'atani aro gram-chi ong'katatani an'senganina namen dakchakgipa ong'a.

## Tusiani

An'ching salgimik kam ka'e ba chel'e re'e neng'ode an'chingni be'enni mitam bakrang cham'anga. Ua cham'anggipa be'enni bakrangko tusianichisa kolgapatpila. Uni giminan maiba nangbeani a'sel dongjaskal walmikrakna nangja. Dal'gimin mande walo kontasnina komigija tusina nanga ine doctorrang agana. Budepa ba buchuma ong'gimin mande walo chu'onge tusina man'rongja. Kontabri ba kontabonga tusiman'on mikrake tusitaina man'ja. Unon an'sengjana a'bachenga. Uni gimin saloba mepringko cha'mano adita tusina man'ode an'senganiko man'batna ama.

## Dongchakani Nok

An'senge dongna aro tangbangna an'chingna nanggipa nokko nanga. Rang'sitna an'chingna rongtalgipa *Oxygen* balwako nangani gimin an'chingni dongchakani nok bal-jokgipa ong'na nanga. Balwa name jokrurana man'na gita nok kraa gita chuna nanga, aro kelkirang chu'onge dongna nanga. Walo tusimitingo kelkirangko oe donna nanga. Bobilrangna kenani gaungode kelkirango silni ritchokrangko tekode nama. Walo kelkirangko oe tuna nangani giminan nok chuode nana ine semanaha.

An'chinga efficeo ba maiba kam-ka'ramo salgimiko kontabri ba kontabongasan dongaia. Indiba noktangtango salsa walsani gisepo konta 18 ba konta 19 dongna nanga. Uni gimin dongkamani nokko rikna skangan kragipa nokko rikna man'ngigipa nokapko man'adipet name basena nanga. An'senganina aro tangbanganina nanggipa gipin gipin niamrangko manina man'ode songadamo donggipa A'chikrangni nokde an'sengatgipa aro tangbangatgipa ong'na nanga, maina gipin gipin namnamgipa aro dal'dalgipa nokrangko gita A'chikrangni nokni pakmarangko reppiminikjani gimin namgipa balwa jokrurana man'a.

Songjinmarango donggipa manderang an'senggiparang aro tangbanggiparang ong'rongja, maina daka-rikanirangni wal'kurang aro noksam-nokgilni moilani seengarang balwako

## 92 NAMBATA JANGGI TANGGNINA SKIE-RA'ANIRANG

ong'siata aro ong'sigimin aro moilagipa balwako rang'sitmane sana aro ma'maanti rog-rogirangko man'na nangaia.

Rongtalgipa balwakosan rang'sitna nangani giminan ba'ra pingripe tusina nangja, indakode an'chingni rang'sitgitalgimin balwa *nitrogen* ko an'ching rang'sittaimana. Tangsekgipa bolrang aro samrang *nitrogen* balwako rang'sita. Uni giminan tangsekgipa bolrang aro samrangko noksamrango bang'e ge'na nangja.

---



## JANGGI TANGANI CHOLRANG

Isol mande sakantinan uni nanggipa be'enni pilak bakrangko uua pattiaha : nikna mikronko, chanchina taningko, rim'na jakko, re'na ja'ako, knana nachilko, cha'na aro aganna ku'sikko, gingsikna gingtingko, aro uandaken gipin nanga be'enni pilak bakrangkoba pattiaha. Da'nang ! basee galako man'a gita mitam manderangsa rasong dongpajae nagok ong'e, mitama kana ong'e, mitama ku'ma ong'e, mitama ja'korae, mitama jakkorae atchiaha, indiomangba sko tik-ong'gijagipa, gisik tik-ong'gijagipa, ba indakgipa manderangna agre, uamangoni bang'an janggi tangani dingtang dingtang cholrangko an'tangtangna dakna man'enga. Indaka ong'siao atchigipa manderangan an'tangtangna janggi tangani namgipa cholrangko dakna man'engode, ja'a-jak namgipa, mikron nikgipa, nachil knagipa aro be'en-gisik namgipa manderangde uamangnaba baditaba nambata cholrangko dakna man'chongmotgen.

Bang'gija bilsirangsan ong'kuaienga, an'chingni a'dok-rango A'chikrangni bi'ame cha'ako nikna man'srangja gita ong'pilachim. Nikchengmiting sal-somoirango indake bi'amna re'rorogipa A'chikrangni kamko nike kranikjabeachim. *A'chikrangde mamingsaloha indake bi'ame cha'malja, indake bi'ame cha'ara ma'drang-bakdrang grima ?* ine uamangko manangani kattarangko knana man'rongachim. Da'ororode samtangtangan A'chikba A'jongba bi'ame cha'gipaan gapai-aha. Haida, indake bang'dugaani gimin uamangko maneng-giparangba dongpiljahakon. Chol dongchongmotjae aro choli-chong-motjae bi'amjojoe cha'na nangbebeosa uamangna ka-sachakna krabebeenchim, indiba ja'a-jak aro mikron namaienggipa aro be'en-bimang mangrakkuaienggipa mande-rangni bi'ame cha'ani kamrangko da'ororo nikanian kraani aro nitoani ong'bebeja.

Mande badita skia-man'rorobaa, kolrangchi badita altue kam ka'na cholrangko man'a, inditan jakni kamrangko,

mongsongbate wata-chenga, sika-koa ba uandakgipa kamrangko ka'sine ka'sine watgalangroroenga ine nikna man'enga. Skia-man'drobaenggipa manderangoni bang'an wa'ding chita, kokkreng-ruan wata, chokki-mora koa, ba uandakgipa kamrangko changangrorojaengaha ine nikna man'enga. Iaranko dakna changjaode janggi tangna gipin chol griginokma ine saoba manderang agannaba donga; indiba da'ororoni sal-somoirango mikka tik ong'e waja, basakobara agre chi dal'dugaa, mi jo'ong cha'a, ba niksamsogijagipa indakgipa karapni salrang sokenga ine nikna man'enga. Indaka salrangode man'e-cha'gipa ong'bo ba kangal ong'bo, gisik seng'gipa ong'bo ba gisik grigipa ong'bo, ia *sao*arang mandekoba mikkang niteja. Game-ge'e cha'giparang, mongsongbate a'a-chi gnanngiparang, sal-kari nammitingo kusi ong'aniko man'a, indiba sal-karirang namjamiting somoiode uamangsa duk man'batskaa. Wata-chenga ba sika-koani kamrangko changode uandakgipa kamrangchi tangka-paisa bikotani cholrangko dakna man'skagenchim. Mi pattisa-pattignini pal ta'buringrangko neng'e cho'kolamani palde, jako tangka kapsa-kapgni dongpaode namkala cha'a-ringani bosturangko breeba nambatkala gadango janggi tangna man'pagenchim ine bang'an sinteronga.

A'chik a'songni bang'a bakrangon chu'onga gita bol-wa'a, re, aro ugita gipin nanga bosturang gnang. Indakgipa bosturang donggijagipa biaprangonaba sepangkalgipa biaprangoniko uarangko ra'angna man'gen, ong'jaoba an'tangtangni bari-bagano bol-wa'arangko ge'na man'gen. Dokta rate chokki-tebil tarina jakkalna namgipa bolrangko ge'ana agreba, bite nanggipa cha'na namgipa sam-bolrangkoba ge'na man'gen. Ge'a-gamanio nama biterangko man'na amjaode, jakni kam ba bading-chiwalani kamrangko, do'odo'bok ba matchu-wakrangko jile ba na'tok jile tangka man'ani cholrangko dakna man'skagen. An'chingni a'dokrangobijakolrang bang'bea. Ka'sanenggija wa'alchi uarangko so-prakprake nisie galana bate ukoba jile bija bitchiko pale tangka man'na amgen. Da'ororoni sal-somoirango an'chingni cholgri-apgri ong'enganirangna Central aro State Sorkarirangba tangka-paisa ba bosturangchi dingtang dingtang rokomo jaksrame dakchakanirangko manderangna on'enga.

A'songo mi-misiko chu'onga gita man'na amjaengode, gipin cha'ani bosturangko, jekai ta'a, alu, ta'milang, ta'bolchu, ba indakgipa bosturangko mini pal cha'na ranta-ka'skana nanga. Gama-ge'a, jila-kaa, ba indakgipa kamrangchiba janggi tangani cholko dakna man'jaode, skia-man'kalgipa aro u'ikalgipa manderang mistrini kam, ba'ra-sikani kam, juta koani kam, dokan dakani, ba indakgiparangko skie-ra'skana nanga. Skia man'sranggiparangba ki'tap sea, maiba kolko kulia, maiba karkanako bikota, sabon daka, lekka daka, ba indakgipa kamrangko dakna a'bachengna nanga. Tarang mingantina gitan ong'pile tangka-paisa aro bosturangchi manderangna Sorkari nama dakchakanirangko on'enga.

Ja'a-jak aro mikron-nachil name bilakkuaienggipa manderangni bi'ame cha'aniko pilak cholchin champengna aro gimaatna jotton-ka'na nanga. Tangka-paisachi dakchakaniko uamangna on'na man'jaoba, maiba chona kamrangko am'kolame janggi tangani cholrangko dakchina uamangna didina nanga. Nanga ong'ode uamangko manenge-saieba skie-on'na nanga, maina bi'ame cha'anikon altubatgipa janggi tangani chol ine uamang chanchinaba donga. Ja'a-jak choli-chong-motgijagipa, mikron nirkijagipa, nachil knagijagipa, be'eno-bimango ong'sie atchie bilgrigiparangna aro ma'gri-pagri bi'sarangna Sorkariba dingtang dingtang simsakani-rangko aro dakchakanirangko kuligimin kang'kare kagipa dolrangni bimingo ba an'tangtangari cholichina dakchakaniko on'enga.

Cholgrigipa aro galchipa man'gipa manderang, ka'donga-ni gri duko ga'akenggipa manderang, brange dongenggipa manderang, sabisi-sakonchiko man'e nirok-sandia gri galchipa man'enggipa manderang, buchuma-budepa ong'e bilgri-jakgri sinasigipa manderang aro ma'gri-pagri brange dongenggipa bi'sarangna janggi tangna man'na gita cholrangko bikotgipa ka'saningbegipa, chanchiningbegipa aro dakchakna sikbegipa manderang aro manderangni dolrang ia a'gilsako gnang. Indaka kamrangni bidingo Mother Teresani nam-begipa mandeskana ka'saani kamrangko dingtangmancha an'ching gisik ra'na krabea. Buchumabeahaoba, an'tangba a'gilsakni bang'a biaprangona re'roroe kangal-cholgrirangna,

## 96 NAMBATA JANGGI TANGGNINA SKIE-RA'ANIRANG

galchipa man'giparangna, ma'gri-pagri bi'sarangna, buchuma-budeparangna dongchakram, sanchakram aro sichakram nokrangko rikaha. Uni re'angkugijagipa biaprangomangba uni bimbingo indagipa namgipa nokrangko Sorkarirang aro sakgipin manderang riksaaha. Ua nokranga dongchakram aro sanchakram nokrangsan ong'aaja, indiba uano dongchakgipa manderangnaba dingtang dingtang kamrangko kulie on'aha, jedakode uamang an'tangtangna janggi tangani cholrangko dakna man'gen. Indake sandi-nirokanirangko dake on'engani gimin, an'ching indagipa dakchakanirangna agrepile nichakna nangja maina cholikuaienggipa manderangba indagipa altugipa cholrangchi janggi tangpana namniknaba donga.

Kana, nagok aro bobarangmangba nikani, knaani, aganani, poraiani aro seani chol gnang ine manderangni angijako Helen Keller minggipa an'tangan dake mesokangaha. An'tangba kana aro boba, ia mingsingbegipa American me'chik a'gilsakni dingtang dingtang bakrangona songreangaha, hajalni hajal manderangna ka'dongatani, ka'dimeatani aro naljokatani kattarangko aganprakaha, aro mingsingbegipa ki'taprangko seaha. Ua agana, *Channa amsokpilgija chonchongipa hosturang an'chingni jakona sokbaa uandaken salantian Isol an'chirgna chonchongipa cholrangkoba oe on'a jedakode uarangko jakgitele jakbale an'chingni janggi tangani cholrangko an'ching jakna man'gen.*"

Tangka-paisa chimongani, nanggija kamrangna koros-ka'anirangko dontongani, koros ka'anirangko man'adipet komiatani, nanga gitasan cha'a-ringani, rakbate aro bimchipbate kam ka'aniko dakna an'ching jotton-ka'na nanga. Man'kalmiting-dongkalmiting sal-somoirango an'chingni agrepile cha'a-ringani aro jaksramanikoba komiatna nanga. Janggi tangani cholrangko sandirikkigipa sakantinan namnamgipa dingtang; dingtang cholrang nabaa. Indagipa cholrangko rajaengani giminsa an'ching duko ga'ake janggi tangna nangengode,arang gipin mandeba ong'ja. chugimik dosan an'ching an'tangtangnin.

## GIT ARO DOKA-DAM·ANI

Mandeni kusi ong'aniko uni mikkang-bimangosan nika ong'ja indiba uni ku'rangchi ring'anio aro kamoba nika. Uandaken an'tangni kusi ong'ani aro katchaa-ka'srokanina agreba gipin kam ba ong'a a'selrangko mande ring'achi ba seachi sakgipinrangna paraka. Gitrangoniko manderang dingtang dingtang skianirangko an'tangtangna basee ra'na, nam-gijagipa kamrangoni gelna, namaona re'mikkangbana, an'tangko ba mandeskako kusi ong'ate rona aro Isolko de'mittel-anio an'tangko mangrakatna man'a.

Kusi ong'miting ba katchamiting somoio mande gitko ring'na namnika. Sinteani ba mainaba gisiko duk-ong'beanioba ning'tua chanchianirangko ong'ate mandeko git ring'na ba gitrangko sena draata. Mande maina gitko ring'a, bang'a changon git ring'enggipa mande an'tangan uko chanchigijasa ring'na ga'aka, maina gisiko katchaani aro kusi ong'ani dongon uko git ring'na draata.

Gitko ring'na mande skia-man'gipa ba lekka-pora donggipa ong'na nangade ong'ja. Skia-man'gijagipa an'chingni ma'gitcham-pagitchamrangba uamangni itihasko de-su'drangtangna katta ring'achi aganrikrikbaaha. Uamangni ring'aniranga. mongsongbate, a'songchiga, pagitcham-ma'gitchamrangni dagrik-dingrikani, ka'dongani, cheani aro saa-sianrangni gimin ring'ani gitrang ong'bata. Uamangni ring'a gitrangoniko knaskaesa skangni chasongrango an'chingni pagitcham-ma'gitchamrang maikai janggi tangbaaha, baoni re'bachengaha, maikai bobil dinggrikbaaha ba mainai ong'baaha, uarang pilakko an'chingni chasongo u'ina man'aha. Uamangni chasongrango maming see-jote rakkianirang dongjani gimin, uamangni ring'a gitranonikosa knarikrike skangni chasongrango janggi tangbaani itihasko an'ching u'ina man'aha. Da'ororoba knana man'kuenggipa A'chik katta-ring'a, rere-ring'a, doro-ring'a ba uandakgipa ring'anirangan skangni A'chikrangni itihasko ring'achi agane on'skaani ong'a.

## 98 NAMBATA JANGGI TANGGNINA SKIE-RA'ANIRANG

Skia-man'gipa aro lekka-pora donggipa ia chasongo tangenggipa manderangde ma'gitcham-pagitchamrangni skang-rango dakbaaha gita ong'gija sengiminonikosa ba an'tang-tangni banaigimin gitrangkosa ring'skaa. Da'ororoni gitrang, mongsongbate, toromni ring'mittelani gitrang, katchae kusi ong'e ring'ramramani gitrang, a'song-chigani gimin ring'ani gitrang, jatni ring'ani gitrang, pante-nomil balsalani gitrang, ettale roani gitrang, ba uandakgipa ring'anirang ong'a.

Lekka-porako on'dilenggipa an'chingni dilgiparang git ring'ani aro doka-dam'anirangko da'ororo gamchatbate ra'rorobaenga. Kusi ong'o aro katchao ring'anirangnasan gitko jakkalaigija, a'gilsakni gipin poraigni bakranggitan git aro dokadam'anioba gamchatani bang'a ine manderang ma'siaha. Bang'bata skul aro chukala gadangrango poraigni bakrangoba iako mingsa nangchongmotgipa skigni bak dake da'ororo ra'enga.

Git ring'aniba mingsa poraigni bak ong'a ine uko da'ororo ra'engani mongsonggipa ja'pangranga iarang ong'a :—

1. Gisik sokpagijagipa bi sarangko uamangni gisik chubanda ong'aoniko git ring'atachi de'doatna man'a ;
2. Gipinrang baksa git ring'rimachi ja'manchakenggipa bi'sako gipinrangni apsan gadango donatpana man'a ;
3. Gipin bi'sarang baksa git ring'rimachi kusi ong'ani aro katchaaniko bariatna ama ; aro
4. Gipinrang gita git ring'na man'a ine an'tangko u'iani-chi gipin kamrangnaba bi'sani ka'donganiko bariata.

Jatna aro a'songna ka'saaniko ring'anirangchi manderangna skie-on'na man'a. Uandake, jatni ba a'songni ring'ani git, tom'ao-melaa ring'ani git, ba uandakgipa ring'anirangko an'ching nikna man'a. Gitko ring'na namnikachiba mandeni toromo janggi tanganiko mangrakbatata, maina nammamgipa gitrangko badita ning'tue chanchiroroe ring'a, inditan Isolni ka'saa aro pattianirangni gimin mandena gisiko chanchianiko naatrora. *Gitrangko ring'e, aro, mitte ring'anirangko ring'e, aro gisikni gitrangko ring'e saksa sakgipin baksa agangrikbo, an'tangtangni ka'tongo Gitelna ring'bo aro dokbo ine Sastrooba agana. Ning'tubegipa kattarangko chanchia gnang gitko ring'mitingo gitko ring'enggipa mandena maimai*

dakgipa ning'tubegipa chanchianirang uni gisiko nabaa, ring'enggipa mandesan uko ma'sina amaa. Uandaken toromni aro Isolni ka'saa kamrangni gimin git segiparang ning'tubee chanchichengesa aro gisiko nabaa gitasa seaha. Gitni nama, knatoa aro kattani su'uaniko ja'kora, kana, gisik chubanda aro je rokomni mandeba knana namnika. Ning'tubegipa kattarang gnanggipa gitrang mandeko gisik nom'ata, mitamko ka'srokata, mitamko duk ong'ata aro mitamkoa ka'dimeata.

Gitni gamchatani aro namgnirangni gimin manderang dingtang dingtang dake aganaha :

*Isolni mandena'aiao inmanbatgipa aro nambatgipa pattigimin gunrangoni mingsa git ong'a, jenan Satan kena aro bobil ong'a. Mandeni baljringipa dukko gitchi ritchengatna man'a aro namgijagipa chanchianirangkoba iachin chel'atna ama.*

*Je mandean gitko namnikja aro git ring'giparangko mitchia, uan mande so'otrakgipa, denggu aro mangnamgijagipa ong'a. Uandakgipa mandeo darangba ka'dongna nangja.*

Gitni gamchatani aro ning'tuanini gimin Alfred E. Roland indake agana :

*Manderangna aro jatrangna gitni gamchatani namen ning'tua. Git katchaaniko bariata, dukko chel'ata, ring'mittelaniko ka'srokata aro namnamgipa chanchianirangko naata. Gitni kama kusi ong'anina aro ka'srokatnasan ong'ja, indiba jatko de'doatna aro silroroatnaba. Ning'tuaniko kattachi talatna angijanirangkoba ring'achi talatna ama.*

Mingsingbegipa Daud raja uni kusi ong'ani salrango ring'achi Isolko de'mittelaha. Bil, rasong, gam, janggi, simsakani, ka'saani aro pilak nirok-sandianirangko una on'ahaninaba gitchi ua Isolko ring'mittelaha. Duk man'bemiting aro gisikni baljringipa sinjetanirangko man'bemiting somoio uni nambegipa ring'anirangchi aro knatobegipa knalni ku'rangchi Saul rajako ua ka'dimeataha aro ka'srokataha. Bang'gija manderangna agre, an'chingoni bang'bata manderangnan namgipa gisik, ka'tong, ku'rang aro be'en-bimangko Isol pattiaha. Rasong dongpagijagipa manderangsa ku'sik boba, mikron kana, nachil nagok ba uandake be'enni ong'sianirango atchiaha ; uamangba namgipa manderang gitan ku'rangtangchi knatobee git ring'pana aro knatobegipa gitrangko nachikkoltangchi knapana sikpa-beenggenchim !

## 100 NAMBATA JANGGI TANGGNINA SKIE-RA'ANIRANG

Chanchirakgipa manderang an'tangtangni chanchiatangko mandeskarangna ring'achi parakna gitrangko seaha. Ua gitrangan skie-on'ani, manengani, kuši ong'atangko parakani, ettalani, mikrakatani, maiba kamrangko dakchina didiani, ge'etani, Isolo bi'ani, ba Isolni dal'aniko gipinrangba ma-sipachina segimin gitrang ong'a. Jatni ring'ani, Isolko mittelpilani aro kusi ong'ramramanina ba uandakgipa kamrangna segimin gitrangko ring'achi mandeskako aro an'tangko gisiko katchaatna, ka'sugrikatna, de'mesagrikna, Isolna on'kanganio mangrakbatatna aro jatna chanchibatataniko bariatna man'a. Git mandeni mingsa cha'ani ong'a

---



## AN CHINGNI KRAGIJAGIPA BEWALRANG

Mande sakantion dingtang dingtang bewalrang gnan. Ia bewalrangoni mitam mandeskani nikanio kraa aro mikchangni ong'a, indiba mitam kragijagipa aro nidikgni bewalrang ong'a. Mandeskarangni nikanio maidakgipa bewalrang namgipa aro maidakgipa bewalrang kragijagipa bewalrang ong'a, mikasalgipa aro gisik gnanggipa mande sakantian uarangko ma'sia. Namgija bewalo janggi tangenggipa mande-rangoni bang'batan ia kragijagipa bewalrangko watna man-jaha, mitama jokna jotton-ka'e nian dongja, mitamni jotton-ka'ania chu'ongan chu'ongsaja.

An'chingni bewal aro kam-cholon chonaonin an'ching baksa dal'drororopaa ; uni gimin an'chingko ong'atgipa namgipa aro namgijagipa bewalrang Isolni ong'atanisa ong'a ; chong'motan, mitan mandede cha'urakgipa ong'e janggi tangchina, mitam mandede toromibegipa ong'e janggi tangchina Isolni mangsongani ong'a ine an'chingoni bang'an chanchia. Indake chanchiani baditana kingking tik ong'a, bebera'na neng'anirangba gnan. Badiaba ma'kringo cha'urakgipa ba mande so'otrakgipa mande dongode, uni de-su'drangoni saoba saksade uni bewalko man'rika ; badiaba ma'kringo gisik seng'begipa ba changa-sapbegipa mande dongde, de-su'drangoni saoba saksasikde uni kamko man'rikpaa ine agananiko an'ching knaronga. Ian ong'jasrangde ong'bebeja. An'chingni ma'gitcham-pagitchamrang mande so'otrakgipa aro bobil dingrakgipa manderang ong'achim ineba gitcham itihasrangoniko an'ching u'ina man'a, indiba uamangni de-su'drang, an'chinga, baditana kingking uamangni kamko da'o dakparikenga ? Nambegipa manderangni namgijagipa kam aro kragijagipa bewalona an'pilanganiko, aro namjabegipa manderangni nama kamrangona an'pilbaanikoba an'ching nikna man'skaa. Indide ia bang'bata ong'angani aro ong'baani kamranga mandeni an'tangko ranta ong'atanio ba rakkianiosa pangchaka.

## 102 NAMBATA JANGGI TANGGNINA SKIE-RA'ANIRANG

Churing-chupekgiparang pekmitingo an'tangtango darangna seng'bate nika. Ringpa-cha'pagijagipa pilak gipin manderangde uamangni nikanio mamingnaba chologijagipa, mamingkoba u'igijagipa aro gisik seng'gijagipa manderang onga. Uandaken, biri-sigaret ringgiparanga an'tangtango mikkim gnange mesokna, ripeng man'rorona aro songsarni niamko ja'rikpana uarangko jakkalna nanga ine uamang agana.

Chu ringgiparang aro biri-sigaret ringrakgiparang uarangko jakkalani namgni aro jakkalna nangani ja'pang a'selangko dingtang dingtang dake agana : Nama gadang ba kamo dongahaon, an'tangni gadangko rakkina chu ringna nanga ; chu ringjaode ripeng-man'ja ; chu ringjaode an'tangni seng'aniko ma'sija ; chu ringode duk-jajrengarangko chel'atna man'a ; chu ringode be'en mangraka aro saa-ding'anirang komia ; chu ringode mi-chi cha'nap-ringnapa. Iarangan chuko jakkalani namgnirang ine chu ringgiparang agana. Indiba, On'tisamang chu ringgronge *peka-dakmike* sakoba doke wataha, sakoba kal'akaha, *wija-dakmike* sakoba maiba ong'ataha ingipa manderanga mai nama kamkosa ka'skaa ? Ia mingsa chuan pilak nama-namja kamrangna cholina amode, mandeari uko maidake nama-namja kamrangna krae jakkalna amgen ? Biri-sigaret ringgipa manderangba uandaken apsan. Poraina ba maikoba ning'tue chanchina skang biri-sigaret pongsa suk ong'e ringatchengode gisik gital dakbataia ; neng'bemitingo tugrange biri-sigaret pongsa suk ong'e opatode neng'arangba pang'sang dake namanga ; tusina skang biri-sigaret pongsa suk ong'e ringatode dipjrip dake suk ong'e mikgilsikangaia ine ringronggipa manderang iarangko jakkalani namgnirangni gimin aganronga.

Indide, uamangni agana gita, chu aro biri-sigaretko jakkalani namgni bang'a. Indiba iarangko jakkalani koros-ranga ? Chu ringgipa aro biri-sigaret ringgipa sakantian iarangko gisep giseposan jakkalari suk ong'e rona man'aigenchimode namaigenchim. Mi pattisakode jentende nimna man'naba donga indiba biri-sigaretkode nimna man'chongmotja ingipa manderangni agana katto knae, ian mandeni

galna man'gijagipa aro ranta-ong'atgimin jakkaljringna nanggipa bewal mingsa ong'a ine an'ching ma'sina man'a. Da'ororoni sal-somoirango maming bostuni damrangan bilong-beengani gimin, ringgipa-cha'gipa sakantinaba apsan neng-nikanirang tikangpaaha. Indiao tarienggipa sigaret bikroko niamchi indake mikrakatna beng'e seani gnang :

**Wal'ku-ringani an'seng-baljokaniko nosto-ka'ani ong'a.** Biri-sigaretko tarienggipa manderanga manderang uamangni tarigimin biri-sigaretrango brejachina indake sena namnik-genchimma ? Iako seani gimin manderang da'o baditana kingking kenenga ?

Be'enni an'seng-baljokanina peggipa ringa-cha'ani bosturango jakkalna nangja ine be'enni an'seng-baljokanini gimin u'gipa doctorrang champengani dintang dintang cholrangko mesoke mikrakattaitaianirango manderangna on'enga. Iarangko jakkalanichi namgijagipa sabisirango, jekai *cancer*, *emphyma*, *cirrhosis*, ba uandagipa sabisirango ong'atani sakkirangkoba uamang on'chape mesokronga. Indiba iarangko jakkalronggipa bang'bata manderang gelna sikja aro jotton-ka'ja. Iarangko dakode namgni ong'a ine saoba saoba manderangni aganengmitingon, iako jakkalania be'en aro gisikna sabisi ong'a ine dake-nike u'gipa manderangoni mitamde maikai ia ringa-cha'ani namgijagipa bewalko watna man'gen, watna man'jae jajrengbee ma'manti cholrangko am'rikkite uarangko dake nienga. Gisik gnangbegipa Solomon raja indake agana : *Chu ka'lingstekgipa aro pekeipani ringani aganwatgipa, Aro uchi pekatako man'gipa pilakan gisik gnanggipa ong'ja.*

Badiaba ki'tap kingsao nambatsranggipa, a'gilsakni darang biapoba ugitachacha dongkugijagipa, sigaretko ringe kusi ong'china manderangna see parakataniko nikna man'a ; kinggipin ki'tapni badiaba jako, sigaret-biri ringania be'enna aro gisikna bisi ong'a, uni gimin biri-sigaret ringaoniko maikai an'tangko champengna man'gen, cholrangko mesoke on'aniko nikna man'skaa. Mingsa aganprakatani kusi ong'ani katta, minggipin aganprakatania duk ong'ani ba jajreng-aoniko naljokatna didiani. Indagipa parakatani kattarang manderangni gisikko bringbrangata. Churing-chupeke duko

## 104 NAMBATA JANGGI TANGGNINA SKIE-RA'ANIRANG

ga'akenggipa manderangni chu ringgijagipa nangipa, tom'tomgipa nokdangni manderangna 'kusi ong'chaka' ingipa kattarangko aganakoba an'ching knana man'ronga. Da'asalo badiaba biapo chu ringe jegrikahana, badiaba biaponiko chu ringe golmal-kajia ka'beani gimin uko hajotona rim'angahana, badiaba nokode chu ringe jikgipako ga'tingdate dokahana, chu peke saleming badiaba biapo gari ga'ake ba chatinge mande sitokahana ba bilonge mata-bu'ako man'ahana ina kattarangko jringjring knana an'chingni nachikkolna knadikpila. Churing-chupekkamaigipa nokdangrango gisik ka'tong katchae, jikming-deming melie-nangrime, tom'tome aro ka'sagrike toromo ba songsaro janggi tangenga ina kattako an'ching knana man'ja. Indide iarang pilakan maikaisa indake ong'pila ? Maiko dakon nama, maiko dakoni namja ong'pila ?

Gisik gnanggipa aro mikasalgipa darang mandeba detangko uni ja'man salrango namgija bewalrango ga'akatna sikchongmotja ; uni gimin indaka cha'a-ringaragoniko pilak cholrangchin champengsona jotton-ka'a. Biri-sigaret ringrakgipa manderangko basakoni dipet ringna-cha'na a'bachenga ine sing'ode. *Anga an'tangde chonaonin ringpaja-cha'pajachim, ringnaba sikpajachim, indiba angni ripengskurangsua drae on'e angko indaka namgijagipa bewalko ong'ataha* ine duk man'e bang'an aganchakronga. An'chingni namgijagipa ripengskurang an'tangtangni namgijagipa bewalrango an'chingna skia aro indake ong'atna man'ahaon uamang kusi ong'bea. An'chingoni mitamde an'tangtangan gisiko sike uarango dake nia, maina *on'tisamangmang* dake niade mamingha namgijani ba kenani ong'ja ine an'ching chanchia. Adita chang dake niahaon namnikna a'bachenga ; unon uko ranta-ka'ronge watna man'gijagipa bewal-ong'baa ; unikosa an'ching uarangni nokkol ong'baa.

Pekgipa ringa-cha'anirangko jakkalachisan mande namgija bewalrango ga'akaia, iade ong'ja. Iako jakkalsranggijagipa manderangni gisepoba namjabatsranggipa rokomni manderang gnang. Uarangoni mitam iarang ong'a : An'tangko u'inika aro sapnika-dakgipa manderang gnang. Uamang sakgipinrangko mikchepe nika. Uni gimin indakgipa manderangde mandeskana kragipa aro mande-ra'ani

kattarangko aganna sikja aro aganna nangnikja. Uamangni gisiko sakgipinrangko onia-ka'na sikani gnan. Joa-kal'a aro ugita dakgipa majoanirango bewal ong'gipa manderangkoba niate nibo. Man'daprорona miksonge uamang joako kal'a. Joa kal'enggipa sakantian tangka man'dapsimsiine nokmachae kusi ong'na man'bebegenode, ian nambegipa kam ong'genchim, indiba changsa maibakai man'gakode man'daprорonaba donga ine gisiko didiataniko man'a; changsaba man'srangjaoba maibakai changsade man'gакpanaba donga ine mandeko jotton-ka'na sikata. Iarang pilakan gimaanionasa mandeko salangaia. Uandake kam-cholon olgroka aro gipin kragijagipa bewalranga namgipa manderangni nikanio nitoani aro mikchaani kam ong'ja, aro mandena gamchatja.

Namgijagipa manderanga ia namgijagipa kamrangko *namja* inen ma'sia. Ia kamrang namgijagipa, kragijagipa ong'a aro iarang mandeko duko ga'akatgipa ong'a ine uamanga u'ia, indiba iarang mandeo ka'sine dal'roroe, ja'mano dal'pripahaon mandesa uarangni nokkol ong'baskaa. Namjana a'bachengaienggipa mandede jotton-ka'bebeode an'tangko namatsrangna man'genchim; namjabatsranggipa mandeba jotton-ka'bebeode ka'sinede namangparoronaba dongachim. Nama-namja kamkoba cha'tote niosa u'ia; uni gimin uarangko dake niania namgijagipa kam ong'ja, indiba ma'sie ra'anisa ine an'chingni namgijagipa ripengrang an'chingko majoa. An'chingoni bang'an uamangni ja'gao nangpaa, unikode uoni jokna changjaha. Bisigrak bostuko cha'ode mande siana ine aganana uko cha'e nio sibebeigenma ine cha'e niode, ua mandede sibebeaignok, indiba uko dake niani biteko ua mande maikai u'ikugen? G. D. Boardman indake agana : *Kamni bitchilko satbo, unon na'a rantani biteko ragen; rantani bitchilko satbo, unon na'a cholonni biteko ragen; cholonni bitchilko satbo, unon na'a nang'ni janggini biteko ragen.*

Chonchongipa bi'sarang dal'gimin manderangni daka kamrangko daksninge nina sikbea. Uarangko dakachi uamangna mai namgijagipa kamko ja'mano ong'atgen, uko uamang niksamsoja. Namakoba namjakoba bang'akon an'ching sakgipinrangonikosa skie-ra'a, ong'jaoba an'tangtangni namgijagipa aro kragijagipa bewalrangko an'tangtangon bon'ataigija sakgipinrangna satskaa. An'ching uarangko

## 106 NAMBATA JANGGI TANGGNINA SKIE-RA'ANIRANG

jakkalna ranta-ka'chenga. Ranta-ka'rongachi an'chingni bewal ong'baa. An'chingni bewalrang an'chingni kam-cholonko ong'ata. An'ching maidakgipa manderang ong'a, an'chingni kam-cholon manderangna ua kamrangchi paraka. An'chingni bewal aro cholonko ong'siatgipa mongsongbatgipa minggit-tam bosturanga iarang ong'a : *gaora de'ani, gisik namgijani aro sakgipinrangni gimin ma'sina sikkijani.*

---

## NAMGIPA NOKDANG

Gisik gnuanggipa aro niksamsogipa mande an'tangna namgipa nokdangko rika, gisik grigipa aro mamingnaba simsakgijagipa mande rikgimin nokdangko rupila. Namgipa nokdango donggipa manderang uamangni nama kam aro cholonchi mandeskarangna dakmesoka. Uamangni nama janggi tangani bewalrang sakgipinrangna skiani ong'skaa. Uamang an'tangtangni nama kamrangko sakgipinrangna rasong dakja. Gaora-de'gipa aro rasong daggipa manderangde namgipa nokdangko dakna man'rongja.

Dingtang dingtang nokdangrangni gisepo kusi ong'gipa nokdang, duk ong'gipa nokdang aro ong'sigipa nokdangrang gnuang. Ua nokdangrango janggi tangani rokom aro bewal ge'sa ge'gipin baksa namen dintanggrika. Indake ong'na nangani a'selrangko sandie niode iani ja'pang-a'selko altuen nikna man'gen.

Je daggipa nokdangba ong'bo, nokdang ge'antion komibeoba jik aro sede dongna nangchongmota. Uni gimin nokdangko rikna a'bachengaoni sulsul sandiange nina.

Me'asa aro me'chik sakantian namgipa nokdangko rike kusi ong'gipa ong'na sika. Jik-se ong'e nokdangko dakna skang pante aro me'tra kusi ong'sobea aro nambatsranggipa salrangko uamangni mikkangchi janggi tangao man'na ka'dongsoa, indiba indake chanchisogipa bang'bata manderangan chanchiatangko kamchi chu'sokatnade man'rongbreja. Chu'sokna man'gijani a'selrangba gnuang.

Me'a ba me'chik ong'bo, uamangko mikcha-namnikgrikatna a'bachengatgipa mongsonggipa bakara mandeni mikkang-bimang, ong'jaode ripeng melie rorimani, ba u'i-ma'sigrikani a'sel ong'a. Mikchagrik-namnikgrike romiting somoio me'tra aro pante a'gilsakni pilak duk-sukkon guala gita ong'pila. Indakmiting somoio rakbegipa champenganirang aro kenbegnigipa bobilrang uamangko ka'mikkenatgenoba,

## 108 NAMBATA JANGGI TANGGNINA SKIE-RA'ANIRANG

uamangko maming cholchiba ekgrikatna man'jawasusu nik-pila. Indiba an'chingni chasongo banga nokdangrango indakgipa manderangni gisepon jik-se galgrika, nokdang golmal ong'a, ba indakgipa ong'sianirango ga'akenganiko ramram-samsam dakpile knana aro nikna man'enga. Un baksana, indakgipa kamranga skia-man'gijagipa aro cholgrigipa nokdangrangosan ong'jaenga, indiba skia-man'begipa aro cholgnangbegipa nokdangrangoba. Toromo janggi tangenga ine an'tangtango chanchigipa mitam nokdangrangomangba indakgipa ong'sianirang da'ororo ong'enga ine nikna man'enga.

Da'o bilsil ritchagittam sotbonganaba batangaha, gisik gri aro mikgri ka'sagrikgipa manderangni gimun William Shakespeare indake aganaha : *Ka'sagrikama mikgri. Mikkangchi maldakgipa a'selrangko an'tangtangna ong'atgen, ka'sagrikkiparang uarangko niksamsoja.* Ia kattarangni miksonga mingantian manderangna chu sokbebeenga ine an'ching sakantian nikna man'enga.

Kristian toromni bewalo me'a aro me'chikko jik aro se ong'atna "Janggini Katta"-oniko poraiate indake parak-atronga : *Mande an'tangni pako aro ma'ako wate jiktang baksa dongrimgen, aro uamang be'ensan ong'gen.* Nangrimatmanahao, mandeni aro Isolni nikao, uamang jik aro se ong'e be'ensan ong'aha. Kristian toromni bewalo ong'gija gipin bewalo bia-ka'giminrangba niamchi jik aro se inako man'aha; uamangba nangrimatako man'aha.

Be'ensan nangrimatgimin mitam jik-serang pako-ma'ako wate apsan dongrimjaenga ine da'ororo an'ching nikna man'enga. Badiaba nokdango jik aro se dokgrik-satgrikenga; badiaba nokdangoa jegrik-gisegrikenga; badiaba nokdangoa amit-mitakgrikenga; badiaba nokdangnia meligrikjae jik aro se ekgrikna nangaha. Me'tra-pante ong'mitingo uamangni kingkot ka'sagrike mikcha-namnikgrikani namnambegipa aro ning'tubee chanchisogipa kattarang aro kamranga indinsa ong'gramaijok. Ka'sagrikbeginin mitam jik aro serang uandake be'entango gale mitchigrikbatsranggipa bobilranga ong'na nangskaaha !

Setangni gale katangmano bang'bata jikan duk aro jajengao sikkime janggi tanga gimiko an'tangko aro dadrangko nang'begipa aro rakbegipa cholrangko am'rikke



aldumittangna ga'aka. Duko ga'akasan ong'ja, indiba krat-  
cha'aniko man'a baksanaba mandeskarangni chonnikani,  
rangkoba uamang man'a. Janggi tangani cholrang chu'ong-  
pajani gimin je rokom ong'sia cholrangkoba uamang sandia.  
Nirok-sandidilgipa dongjae uni dedrang joa-kal'na, chu  
ringna, denggu dakna, namgijagipa manderang baksa rorimna,  
sikatang dakna aro namgijagipa bewalrango ga'akna a'ba-  
chenga. Ma'giparang uamangko sason-ka'na amja, uamangba  
ma'gipatangtangna bamna sikja aro kenja. Uandaken, jegrik-  
dolgriksimsimaigipa nokdangianroba. Uamangni bi'sarang  
noktanganiko nama skianiko man'ja. Uamang ong'sia bewalo  
janggi tanggiparang ong'baa. Uamangni ripengskarangba  
namjabegipa aro denggugipa bi'sarang ong'a. Degipa bano  
maiko dakenga, uni ma'gipa-pagipa nikja aro u'ija. Ma'a-pa  
detangko sandija aro sandina nangnikja. Nokdangko aldu-  
mittangna chu'onga gita chol dongjae aro jik-de baksa  
melina man'jae, antangni duk-jajrengnirangko chel'atna  
nokni pagipa chu ringna aro joa kal'e somoiko bon'atna  
a'bachenga. Uni ong'sigipa ripengrang uni nokona re'baronge  
ringe-cha'e ma'manti golmarangko ong'ata. Ia kamrangko  
dakpagijagipa nokdangrangomangba nokdangko ong'siatani  
gipin bang'a a'selrang gnang. Nokni skotonggipa pagipa  
gisik namgipa aro toromibegipa ong'a, indiba uni jikgipa  
ku'sik rakbegipa aro seko-pako mande-ra'gijagipasa ong'skaa.  
Toromo gisik nangbee segipani giljarangchi jringjring re'ang-  
mitingo uni jikgipade bachibasa roamangskaa, ong'jaoba  
banoba tamasa dakachi ba sinemachisa attamrikkit re'angksaa.  
Jikgipa namen sontolbegipa aro gisik namgipa ong'a, indiba  
uni segipa gisik-ka'tong namgijagipa aro jikgipako amit-  
mitakrakgipa ong'skaa. Uamangni kam aro bewalo meli-  
grikjae dedrangba sikatang dakna a'bachenga. Ma'a-pa  
uamangko manengna aro champenge skina bil dongja.

Jik-se meligrikjae nokdango jegrik-ingrika aro saigrika-  
dogrikana agreba, saniba jikko sekjoja. saniba se baksa  
roa, ba uandakgipa kam-cholon olgrokani kamrangkoba  
an'ching nikna man'a. Uandaken, sakoba depatchi ba'ate  
katchipa, jiktangko gale katchipa ingipa manderangkoba  
an'ching nikna ba knana man'a. An'chingni samtangtang-  
chin pagri janggi tangenggipa galchipa aro chonnika man'  
gipa bi'sarangkoba nika.

## 110 NAMBATA JANGGI TANGGNINA SKIE-RA'ANIRANG

Bi'sa sakantini janggi tanganikon uni ma'gipasa uni ka'saani aro nama kamrangchi re'dilchengna nanga. Ma'gipani ja'pingo asonge ku'aganna a'bachengbaaonian ma'gipani kragija mitaka aro ku'atogija saiani kattarangko knaronggipa bi'sa ong'sigipa kamrangko ma'atonganikon skie-ra'chenga. Chonmitingon nama kamrang aro kattarangchi bi'sako dal'droatna man'jahaoe, uni dal'ahao ua bi'sa namgijagipa bewalo janggi tangna draatako man'a. Nama, kakket aro bebeni kamrangko bi'sa ma'atonganiko skie-ra'chengna man'na gita, detangko nama bewalo janggi tangatna ma'gipani jakon ong'a ine ma'gipa sakantian ma'sie-ra'na hangchongmota.

*Sason grigipa nokdang nokking grigipa nok gita ong'a, jean balwa-mikkako chelchaksone amja ine Horace Bushnell agana. Indaka nokdangni manderang balwa-mikka aro sin'a-ding'ako warachakna amjae pilak rokomni sinjetanirangko man'a. Indakgipa nokdango so'sojengjeng ong'kamaia. Indiba namgipa nokdangode ka'sagrikan, kusi ong'ani, tom'tomani aro pilakon chu'ongnikani gnan. Uamangni ripengrangba uamangko namnika aro mande-ra'a, aro uamangni nama kamrangko uamang baksa katchapaa.*

Me'asa aro me'chik sakantian namgipa nokdango dakna chanchisoe nama kamo, bewalo, cholono, gisiko an'tangtang gita dake chanchipagipa apsan rokomni mandeko jora-ripengna sandigrikgenchimode, dukni salo, kusini salo, neng'ani salo, chu'ongnikani salo, ba pilak kamon dukni aro kusini balrangko apsan chilrimna amchongmotgenchim. Jik aro se ong'ania uamangna kusini salrang a'bachenganide ong'chongmotja, indiba duk ba kusini salrangko apsan chilrimna kang'kare kaanisa ong'na nanga. Jikgipa maikoba aganon uni segipa ga'nangjae uko dakna sikjaode, segipa maikoba dakna chanchion uni jikgipa jetojae un'baksa ku'mongrimpajaode, segipani kusi ong'o jikgipa duk man'skaode, ba jikgipani kusi ong'o segipa duk man'skaode, indakgipa nokdango katchaani aro kusi ong'ani dongna man'chongmotja. Beben, changsana baten, nambe-gipa nokdangrangoba nokdangni kamrangni bidingo jegrik-tanenngrikani kamrangba dongna nangchongmota, dongna bangbaba aro iako gelna man'bebeja.

Gam, bida, chol gnanga, gisik seng'a aro mikkang-bimang daknangachisan namgipa aro kusi ong-gipa nokdang-ko ong-etna man'ja, indiba nakdangko rikgipa jik aro seni ka-sagrika, ma-sigrika aro pilak balrangko chilrimna kang-kare kaa aro kamchiba uarangko dakaniosa. Mikkang-bimang daknangania bang'a changon dakpnikgipasa ong'a, maina gun gri daknangania similgijagipa nitobegipa pul bibal gitachacha ong'a ine agana. Mikkang-bimang nitoa-daknanganina bate ka'tongni sontol ong'a, gisikni nama, aro mandeskana ka'sachakanisa gamchatbata. Indiomangba iarangni kosakoba Isolna kenaniko nangkua, maina pilak ka'saanian Uonisa ong'baa. Namgijagipa mandede ka'mikken-atanasa bama, indiba namgipa mandede ka'saanasa bama. Me'a aro me'chik sakantian namgipa nokdongko rikna iarangchi an'tangtangko tarisona man'genchimode, uamangni nokdang baditan katchabegipa aro nambegipa nokdang ong'chongmotgenchim.

---

## KUSI ONG-BATSRANGGIPA MANDE

A'gilsako rokom rokom manderang gnang. Ia rokom-ari manderang dingtang dingtang kamrangko ka'e janggi tanggiparang on'ga. Janggi tangna gita mande maiba ming-sasik kamkode an'tangna ka na nangchongmota. Ua kama chonbegipa ba dal'begipa kam ong'naba donga, indiba kam ka'srangjaode mande maming cholchiba cha'aniko mari'na amja. Chol gnangbegipa aro gam gnangbegipa mande chol gnangani gimin mariing kamkoba ka'na nanggija roafi cha'na-ringna man'aia ine rasong daknaba donga, indiba, uaba, uni cha'a-ringanina, uni janggi tanganina, uni an'seng-baljokanina aro kusi ong'gnina an'tangni ning'o kam ka-gipa manderangna dingtang dingtang kamrangko mesoke ge'etna nanga. Uandake, uarangko dakna uaba kamko ka'na nangtelaia.

An'chingni ia chasong skia-man'gipa chasong on'ga. Scienceni bilchi aiao inmanpilgipa kamrangko dakna man'aiahani gimin, skangni chasongrango jaktangchi aro biltingtingchi dakna nanggipa bang'a kamrangkoba kolrangchian dakna man'aiaha. A'a gamna mande tractor gario suk on'ge asongari uachin a'ao salmikmikangna nangaia. Mibitchilkoba kolchisa ge'e donangaia, mi jo'ong cha'anaba aeroplanerangchisa sam satdape donangaia; uandake, mi rata, mi naka, mi su'a aro choakoba, pilakkon, kolchi dakna man'aiaha. Song'na-channaba am'bolko wa'alchi so'gijan electricni chan-kolrango song'na-channa man'aiaha. Cha'chak-ringchakani aro song'a-chanani sam'dik-me'dikrangkoba jakdangdikna nangjaha gita ong'pile da'ode electric kolchi su'srangna man'aiaha. Maikoba dakna nik'changkuengama? Gama-ge'a, song'a-chana, ringa-chaja, tua-neng'takana agreba, nika-nia, re'a-doa, gana-china, sea-jota, daka-rika, doka-dam'a, aro dongtoa, gisik katchaa, kusi on'ga, altue kam-ka'a ba uandaka namnamgipa cholrangkoba gimikkon gitan ong'pile altudapatna manderang am'rikkite bikotaha.

Indakpilgipa namgipa aro altugipa cholrang mandena ong'katahaoba aro chol gngangiparang iarang pilakkon man'tokna amgenchimoba, mandeo mamingsaloba chu'ongnik-ani dongja. Manderangni bang'a duk aro baljrimanirangkon scienceni bilchi chel'angataha, indiba iarango chu'ongnikani dongjani gimin mande kusi ong'gipa ong'na man'ja. Uandaken, gamo, u'ianio ba changa-sapao ong'chong, mande badita man'daprora, unaba batesa man'na jotton-ka'a.

Kusi ong'na cholrangko sandianioba uandaken apsan. Manderang pilak rokom kusi ong'anirangko man'a, indiba unaba kusi ong'dapna jotton ka'kua. Man'e-cha'oba gamtango chu'ongnikja, rasong gngangoba ukoba chu'ongnikja, pilak cholrangko man'oba uarangkoba man'nikja. Uandake, kusi ong'anikon chu'onge man'jaenga ine bang'a manderang chanchia. Kusi ong'anirangko bariatna manderang dingtang dingtang cholrangko am'rikkite nienga. "Indakgipa biriko, indakgipa sigaretko ringode, na'a kusi ong'batsranggipa mande ong'gen"; "Indakgipa namgipa chuko ringode na'a kusi ong'batsranggipa mande ong'gen"; "Indakgipa ganding-chindingko gano-chinode na'a kusi ong'batsranggipa mande ong'gen" .....ba uandaken, iako dakode, uako dakode. na'a kusi ong'batsranggipa mande ong'gen ine bading-chiwal-giparang aro gipin dolrang lekka-ki'taprago, songbadrango, ramram lekka bichitrango, pakmarango aro bosturango pa'dapgipa lekka bigilrango aganprakani kattarangko seronga.

Sigaret bikroko pa'dapgipa bigilo, chisam a'rikingo an'sengriri niwate roenggipa pante aro me'trako silprete tarigimin noksako nika; chu hotolo tapgipa lekka kusi ong'bee roenggipa nomil saksako silprete noks tariako nika. Ua sigaretko, ua chuko ringode, uano mesokgipa noksarango donggipa manderang gita kusi ong'begiparang ong'gen ine manderang chanchichina dake dona gngang. Biri-sigaret ringgiparang aro chu ringgiparang ua noksarangko nika uarango brena mikbokbeaha, indiba da'nang! ua biri-sigaretko ringe nion, ua chuko ringe nion, uano mesokgipa noksarango donggipa kusi ong'gipa manderang gitade kusi ong'aniko man'na ampajaha. Bebeko aganode, ua bosturanga uano dakgimin noksarang baksa maming bakoba on'timinti nangrimgrikanian dongsrangja! Uandake, mande

## 114 NAMBATA JANGGI TANGGNINA SKIE-RA'ANIRANG

maina duk ong'na nanga, darangan kusi ong'gipa ong'na nanga ingipa manderang Kusi Ong'gipa Manderangni Dol ingipako bikotaha. Uandakgipa dolrangoni *Hippie Dol* dolsa ong'a. A'gilsako duk aro jajrenganirangko mandeni man'engania dakgrik-dinggrikengani a'sel, jatko-a'songko dileng-gipa manderangni dilsretengani a'sel, toromko dilenggipa-rangni gisik-ka'tong namgijani aro bebegijani a'sel, janggi tanganio mandeni jakgitel ong'gnirangko mandeskarang champengengani a'sel, ba uandakgiparangni a'selsa ong'a ine uamang agana. Uamang, uni gimin, doka-dam'a, chrok-mesaa, git ring'a, cha'e-ringe kusi ong'a, me'a-mechik apsan rorim-dongrima, knirangko ro'e brana, niksenggipa rong-rangni ganding-chindingrangko ganc-chine sal-somoiko re'ata, ba indakgipa *jakgitelani* rangko daka. Ganding-chinding-rangchi an'tangtangko niksenggipa ong'atna nanga ine chik-begipa rongrangni ba'ra-kanchako aro ganronggijagipa rokom-ni ganding-chindingrangko uamang ganachina. Kusi ong'aniko bariatna ganja, \* *L. S. D.*, *hashish*, *marijuana* aro uandakgipa bilakbegipa ringanirangko uamang ringa. Indak-gipa pekkipa ringanirangko ringe pilak duk-jajrenganirangko gualna man'a; uandake kusi ong'batsranggipa gadangona sokaha ine uamang chanchia. Uamangoni mitam sko ba gisik tik ong'jae an'tangtangko siaona sokataniko an'ching knaronga. Isolan mandeko dakaha; Pilak kusi ong'a aro katchaanikon mandena Isol pattiaha; Mandeni duk man'engania iarangko chu'gimik *jakgitelc* jakkaljani a'selsa; Iarang pilakko dakanio mande mandeskana kratcha'na nangja, ba uandake chanchigipa me'a-me'chik, pante-me'tra, bi'sa-disa nagande rogiparangni dolrang aro uamangni roram ingipa a'damrangba a'gilsakni badiaba badiaba biaprango ong'kataha.

Churing-chupekani maiba namgniko ba man'dapaniko uamangoniko an'ching nikna man'ahama? Uamangan a'gilsako kusi ong'batsranggipa manderang ong'na man'bebeaha ine uamang an'chingna namgipa sakkiko on'ahama?

Peksimsim-ringsimsim dake sianggipa manderangoni bang'an uamangni bon'kamgipa salrango duk man'beani aro sintebeani kattarangko aganchote siangronga. Ja'man

salrango uamang gita ong'pajachina dambekalgipa mande-rangna ku'pattie-agane uamang siangronga. Uamangni duk-sitengtoa aro aganangani katarangan an'chingko mikrakat-sona chu'onga.

*L.S.D., marijuana* aro uandakgipa pekgipa ringanirang mandeko pekatasan ong'ja, indiba uandakgipa ringanirangko ringachi mandeni taning aro gisikko nosto ong'kamatna man'a. United States of Americao ua bosturangko jakkale bang'bea manderang peke, gisik tik ong'jae ba uni bilchi draataniko man'e bang'bea manderangko so'otaha aro so'otenga ine sandigipa dol rim'a man'aha. Sakgipin mande-rangkosan uamang so'otjaenga, uamangoni bang'an an'tang-tangkoba so'otenga. Marijuanako jakkalachi tangakrip mandeni taningko nosto ong'atna man'a.

Gam ba rasong ong'bo, gisik seng'a ba changa-sapa ong'bo, an'tango je dongakon chu'ongnikgipa ong'gijagipa kusi ong'chongmotgipa mande ong'na man'ja. Chu'ongnik-jani giminsa man'e-cha'ani kosako aro rasong gnangani kosako gamko aro rasongko man'dapna mande jotton-ka'a, seng'ani kosako seng'dapna sika ; iarangni kosakoba rasong chaaniko mande am'kua. Indakgipa mande kusi ong'gipa ong'na man'ja.

Gun gnangbegipa, tangka-sona bang'begipa, ong'jaoba chua gadangona soke lekka-pora donggipa, bida chua gnanggipa manderangsa a'gilsako kusi ong'batsranggipa mande ong'a ine an'chingoni bang'an chanchia. Indiba pangnan indakesrangde ong'na man'ja ine altue sandie nikna man'ani bang'bea sakkirang gnang. Mitam manderang alaksi dakbeachi ba sakgipinrangni gamko kragijagipa kamrangchi ra'sekachi an'tangtangna gamko chimonga. Mitam man'e-cha'giparanga rasong gnange nama cholrangchi gamko an'tangtangna chimonga. Indiba ia dolgnini manderangba jajrenge aro kene dongkamna nangao ga'aka : cha'u-ra-sekgipa aro namgijagipa manderang uamangni chimonggimin gamko je somoioba cha'u-ra'seknaba donga. Lekka-porani chua bidako man'giparangba pilakande name aro kusi ong'e janggi tangani cholrangko dakna man'engade ong'ja. Mitam manderang an'tangtangni lekka-pora bidao gaora de'a, indiba ua bidani kri an'tangtangna janggi tangani nama cholrangko

## 116 NAMBATA JANGGI TANGGNINA SKIE-RA'ANIRANG

dake ra'na changja. Mitama an'tangtango indakgipa bida dongani gimin kusi ong'a, indiba ua bidana kragipa gadangni kamko man'paja, onkala gadangni kamko ka'e janggi tangnara kratcha'nika. Indide gammangmang ba lekka-pora bida dongamangmangde mandeko kusi ong'atgipa ong'na man'ja.

A'gilsako janggi tangangman'gimin kusi ong'batsranggipa man'lerang an'tangtangni gamko mandeskarangni namgnina jakkalaha, changa-sapatangko sakgipinrangna skie on'angskaha aro je gipin dongsparangkoba gipinrang baksa suale-ra'rone cha'angaha. Gam aro rasong uamango bang'beoba, simano uarang uamangna mamingba gamchatjawaha ine uamang ma'sia. A'gilsako an'tangtangnasan gam chimonggipa manderangna mikrakatna Sastroo indake sea gnang: *O goka, da'awalo nang'oniko nang'ni janggiko dabigen; unon ia chimong-giminrang sani ong'gen?* Uni gimin kusi ong'chongmotgipa manderanga indakgiparang ong'a, jemangan an'tangtango je gnang ukon chu'ongnika, je u'ia ba changa-sapanirang gnang, uko sakgipinrangna skie donangna sigkipa ong'a, an'tango je gam gnang, ukon sakgipinrangna namgnina jakkalna sigkipa ong'a, aro ua mande Isolna kengipa ong'a.

Mande an'tangko badita onata, sakgipinrangna uni ka'saaniba inditan bariroroa. Sakgipinrangna badita dakchake aro dangdike on'a, inditan manderangba una ka'saroroskae uni namgipa ripengrang ongrorobaa. Un kosako darangba bobil dakgipa dongjaode, pilakan uni ripengrang ong'tokode pilakan uni jong-adarang ong'a ine ua chanchiode, uni biltang-jaktangchi je man'aon chu'ongnike dongna man'aon chu'ongnike dongna man'engode, iarang pilakan Isol-onisa ong'a ine ua ma'sibebeode, indide ua mandean a'gilsako kusi ong'batsranggipa mande ong'a. Indakgipa manderang a'gilsako bang'jasrang.

---



## MIKSONGA GNANG JANGGI TANGANI

Mande sakantian nambate aro dongtobate janggi tangna sika. Pilak janggi tangenggipa manderangni gisepo kusi ong'been janggi tangenggiparang aro duk ong'bee janggi tangenggipa manderang gnang. Ona gadango aro duko janggi tangenggipa manderangni nikanio, man'e-cha'giparang bate bate man'e-cha'roroangengo, indiba kangalgipa manderangde bate batesa kangal ong'roroangskaenga. Man'e-cha'giparang maina man'e cha'roroangna aro kangalrang maina kangal ong'roroangna nanga ? Kangalrangba namkala gadango janggi tangna man'pana gita man'e-cha'giparang maina antangtangni man'a agitchaoniko mitam bakko uamangna suale-ra'rone cha'pajaenga ? Ian kangalgipa manderangni chanchiani ong'a. A'chikrangoniba bang'an indake chanchia, maina bang'batan nama gadango janggi tangenggiparangde ong'paja.

Iarang maikai indake ong'na nanga ? An'chingni ma'apa an'ching sakantikon aldumittange simsake dal'ataha. Isolni on'gimin bil aro pattigimin gisikko jakkale, a'gilsako an'chingni janggi tangchengmiting salrango an'chingni ma'apaan a'gilsakni Isol gitachacha ong'a. Uamangni simsaka aro nirokao dal'roroe gisik u'ibaahaon pilakna skang noktangni kamrangko an'ching nikchenga. Namgipa nokdango atchigipa bi'sa noktangni kamrangko nikchenga ; namgijagipa nokdango atchigipa bi'saba noktangni namgijagipa kamrangko nikchenga. Dal'ahaon mitakrakhgipa nokdango atchigipa bi'saba uni ma'a-pa gitan mitakrakhgipa ong'bapaani chol gnang, indiba toromigipa aro tom'tomgipa nokdango atchigipa bi'sa dal'ahaon ma'a-patangoniko namgipa gunrangko man'rikani aro namgipa kamrangko skie-ra'ani chol gnang. Uandake, nama-namgija kamrangko pilakna skang bi'sa noktanganikon skie-ra'chenga.

Simsakhgipa aro ka'saghpa ma'a-pa sakantian detangko nama dal'roroanio dal'atna aro nama janggi tanganiq

## 118 NAMBATA JANGGI TANGGNINA SKIE-RA'ANIRANG

tangatna sika. An'tangtangni nama kamrangchi dakmesokana agreba detangtangni re'gni ramako uamang ski-mesoke on'a. Simsakgijagipa aro gisik grigipa ma'a-parangni kamrangde bikpilskaa. Uamang an'tangtangni kragijagipa bewalrangchi dakmesokana agreba namgijagipa kamrangko dakna detangtangna skia.

Chanchininggipa aro gisik gnanggipa ma'a-parang detangtangko namgipa aro chu'sokgipa janggi tanganio tangatna sika, indiba uamangni dedrang mai namgipa kamo janggi tangna man'gen, uko uamangoni bang'batan agane on'sona ba didisona saprongja aro bang'an agansorongja. Beben, an'ching sakantian mingsinggipa scientist, doctor, gam gnangbegipa, dal'a kamko ka'gipa ba niksen;begipa manderang ong'na sikbegenchim, indiba gisiko sikmangmangaiachi iarang pilakko man'na amtokade ong'ja. An'tangna janggi tanganiko dakahaon an'chingoni bang'batan chubata gadangkosa nangnikgenchim. Ia chu'sokgijanirangna, bang'a changon, an'chingoni bang'batan ma'a-patangkosa kragija matnangronga.

Bilsok-jaksokahao aro gisik sokahao mikkangchi janggi tanganiko an'tangna dakna lekka-porako ra'engmiting somoio *Nang'ni janggi tanganina mikkangchi mai kamko ka'na miksongoenga?* ine saoba an'chingko sing'genchimode, haida, sak ritchasaoni sak sotskuchet ba una baten, maming miksongoanian gri inesa aganna drana ga'akaigenchim. Lekka-porako dakanio maibakai chu'sokna man'paode, maiba namkala kamkode mikkangchi man'panaba donga inesa an'chingoni bang'batan onbee chanchisoa. Nama-namgijako an'tangtangan an'tangtangna basee ra'na changahaomangba an'chingni janggi tanggnina an'chingni ma'a-paan an'chingko miksongdilsoja ine uamangko an'ching matnang-jachakugenma? Gisik gnanggipa ma'a-parang namgipa kamrangko ka'e janggi tangpachina detangtangko didironga, indiba dedrang an'tangtanga uandakgipa gadangona sokangna tikkelbena nanggen. An'chingoni badita sak indake chu'sokna man'a ba mikkangchina miksongoani dongbebea?

Tikkela-jotton ka'ani gri mande a'gilsako namkala gadango janggi tangna amja. Chubegipa gadangona sokna

jotton-ka-beoba unona soknade man'rongja, indiba jotton-ka-sranggijagipa mandede maming gadangonaba soksrangja. Nama gadangona sokna miksongania mandeko chu'sokatata aro gadangko tang'doata, indiba mandeskarangko onia-ka-nasa chua gadangona sokangna miksongani ong'ode, indakgipa mande Isolni saoko man'skagen. Gisik gnanggipa aro seng'gipa manderangde an'tangtangni dakna man'ana baten chubata kamrangna jotton-ka'a. Englisho mingsa indake aganani gnang: *Askirangona sokangnasa pangnan chue nisan ka'bo ; na'a uarangona sokangna'je man'jawa, indiba nokhing kambeonosan nisan ka'aigipa mandenade chubatangchongmotgen*. Mande mamingsaloba an'tangni janggi tangenggipa gadangko chu'ongnikja, indiba chubata kamrangna uo miksongani dongjaode, uni chanchiani kammangmang mamingsaloba uko de'doatjawa. Gaora-de'begipa mandeba mandeskarangni mandera'aniko man'na sikipabegenchim ; mikbokraggipa mandeba gam aro chu'ongnikaniko man'na sikipabegenchim ; mikburaggipa mandeba bobiltangni kosako a'jak-sokna sikipabegenchim ; ringgipa-peggipa mandeba kusi ong'kamaigipa sal-somoi aro tangbanggipa janggiko man'na sikipabegenchim ; kangalgipa mandeba gam gnangbegipa ong'na sikipabegenchim. Indiba tikkelani gri gisikni sikhangmangaiachi iarang pilakan chu'sokna amja.

An'ching sakantian an'chingni janggi tanganio maiba mingsasik nama kamna miksongani dongna nangchongmota. Nama janggi tanganiko man'na miksonga gnang tikkelani aro jotton-ka'anichisan an'ching sakantiko chu'sokgipa ong'atna man'a.

## TIKKELANI ARO CHU·SOKANI

Mandena nambata janggi tanganiko ong'atgipa, uko kusi ong'atgipa, an'sengatgipa aro bilakatgipara uni bimchipani, jotton-ka'ani aro kam gong'ani a'sel ong'a. Mande badita bimchipa aro kam gong'a, inditan uni kusi aro katchaani ong'a; badita alsia aro kam-ka'na aratgipa ong'a, inditan una duk aro cha'asianiba sokbaa. Bimchipgipa aro kam gong'gipa sakantinan janggi tangani nambata cholrang nakatrorobaa; aratgipa aro kamna nisigipa sakan-tinan janggi tangani namgipa cholrang gimaroroangskaa.

"Sikani gnangode cholba gnang" ingipa kattani gimin an'ching knaronga. Ia kattako an'chingni poraibagipa ki-tapranoniko, an'chingna skie-on'baaoniko aro u'ibatgipa manderangni an'chingna ku'pattiani kattarangoniko knaronga. Indiba an'ching ia kattako kamchi dake niana bate knanasan namnikbata aro an'chingoni bang'gija manderangsan iani gamchata aro mangsonga chong'motko ma'sina man'aia.

Ia kattako kamchi dake nina man'genma man'jawa, an'ching ning'tue chanchidape nirongja. Ki'tapranango indakgipa katta sea dongani giminsa poraimitingoba an'ching uarangko poraibaaha, indiba poraibaana agre an'chingoni bang'bata manderangan chanchidape nina sikani gri. Indakgipa kattarangko kamchi dake nina man'ama man'ja an'ching niange nina.

Bang'a cholgrigipa nokdangrangni manderango tikkelani aro jotton-ka'ani gisik bang'a, indiba cholgriani a'selan uamangni tikkelanirang bang'a changon chu'sokrongja. Nama ba namkala gadango janggi tangenggipa manderang cholde dongani gimin tikkelmanian komiskaa aro uamangoni bang'an tikkeln a sikja. Uni gimin, nigimike niode, an'chingoni bang'batan gisikode sika indiba jotton-ka'ani aro tikkelmanian dongja ba chu'ongja. Tikkelani dongja ba komiani gimin an'chingna oe dongenggipa bang'bea cholrangkoba an'ching gimaata. Sikani gnangode cholba gnang ingipa kattako

knakujani giminsa mitam manderang cholrangko nikjaenga ine an'ching chanchinade man'jawa. Chanchirakgipa aro gisik gnanggipa mande sakantian indakgipa kattako knagijamangba tikkelede nia. Tikkele nianichin cholrangkoba uamang nikna a'bachenga. Bang'an tekkiachi skiako man'e uoni jokna cholrangko sandia aro bang'a changon jokani cholkoba nikbebea.

Bimchipani aro kam gong'anichi namgipa biteko man'na ama ine gipin manderangoniko an'ching bang'en nikna man'aha aro mikkangchiba nikangkugen. Bilsi gimikon simsakgija sal-somoiko arate re'ate duk-man'e dongna uanggipa manderangkoba an'ching nikna man'a. Aratanichi aro simsakgijanichi namgipa biteko rana man'jaode, ua mandena duk-man'chakna krajawachim; batesa duk-man'chaka aro ka'sachakani pal ua mandena kratcha'chaknasa krabata. Rakbee aro jotton-ka'bee kam-ka'oba uni jotton-ka'anichi chu'sokna man'chongmotjaosa una duk-man'chakna aro ka'sachakna krabatbebea.


An'ching A'chikrangoba gong'e kam ka'china aro bimchipchina namnambegipa didiani kattarang gnang, indiba ia didiani kattarang da'ororo knae roani kattarang gitasa ong'rorobaenga. A'chik jatni gadang onkuenganiko ma'sie A'chik sakantian an'tangtangni changa-sapa aro bimchipanichi krenge kam ka'achisan jat aro a'song gimikkoba de'dona man'gen. Man'oba man'jaoba an'ching jotton-ka'chekcheke krengode, bang'a kamrangan chu'sokna man'pagenchim. Arata aro kam gong'jani giminsa inamingon an'ching chu'sokna man'pajaengode aro darang gipinba an'chingko gisik nangatna man'jaengode, indide chu'gimik dosan an'ching an'tangtangnin. Isol an'tangba indakgipa manderangna dakchakna sikja, maina an'tangtangko dakchakgipakosa Uaba dakchakskana sika.

Matburingrangko nolo ba do'orangko gringo chipkete donode uarang jokna tikkelbea, indiba bang'a changon uarang joknade man'rongbreja. An'chingde matburingrang aro do'orangnade gisik seng'bata aro u'ibata. An'chingde uarang gita nolo ba gringo chipchange donanikoba man'jaenga. Indiomangba an'chingde nambata aro dongtobata

## 122 NAMBATA JANGGI TANGGNINA SKIE-RA'ANIRANG

janggi tanganiko man'namangba tikkelasan gristrang gita ong'pila. Changa-sapa aro gisik seng'a chu'ongpajani gimin an'tangtangni gisikko jakkalna sappajaoba sakgipinrangni changa-sapaoniko ja'rikpanade man'genchim. Je an'tangtangni on'tisa changa-sapa ba u'ianiko jakkaljaode aro sakgipinrangni gisik seng'e dakmesoka kamrangkoba daksningna sikjaode, indide an'chinga gokarangsang on'na nangaingnok.

Aratani gimin agandapangode, an'chingni kamrang indake ong'a. An'ching agrepile roaniko aro kusi ong'aniko namnika. Mandeskarang baksa rooba agre roa, tusioba agre tusia, cha'o-ringoba agre cha'a-ringa; gamchatbegipa sal-somoirangko an'ching agrepile indin koros-ka'e roa. Ia agreaniko kam gong'anina, bimchipanina, jotton-ka'anina aro nama kamrangna jakkalskagenchimode an'ching mairongpile aiao inmanpilgipa manderang ong'genchim. Agre nama aro agre kam gong'anichl an'ching sakoba gisik saatgenma? Aratgipa aro gisik-ka'tong namgijagipa manderangsa mikbue iana an'chingko gisik sanaba donga. Uar-dakgipa manderang a'gilsako atchijasrangon nambatgenchim. Bang'a kamrangon u'nika aro changnik-sapnika dake an'ching an'tangtangkon togia; uandake indaka kamrangchin an'tangtangko ja'pea. An'ching tusinaba aratgenchimode, cha'na-ringnaba nanga aro kraa gitasan cha'na-ringna sikai-genchimode, an'chingni kamranga mairongpilgipa aro aiao inmanpilgipa ong'genchim!



# SEDAPANI

Ia ki'tapo adita gualanirang gnang. Uarangko ka'mao gita namate poraipabo :—

Jak	Riting	Namatgnigipa Katta	Namatanirang
4	6	warachaknasiengipa	warachaknasienggipa
7	27	songjinumako	songjinmako
10	16	an'tangtrng	an'tangtang
15	—	BAR	BAK
19	22	u'ipljawaha	u'ipiljawaha
22	31	toromrangko	toromrangko
23	—	BHK	BAK
24	6	kamkrangko	kamrangko
24	20	bakban	bakbakan
24	26	Gouhatichi	Gauhatichi
24	35	ong'aiaccim	ong'aiachim
29	1	Ramku	Rangku
30	38	aganprakako	aganprakaniko
31	1	lakka-pora	lekka-pora
32	12	a'bachengaka	a'bachengaha
36	33	badiaga	badiaba
49	6	ong'piltaina	ong'atpiltaina
57	18	uamangi	uamangni
58	15	ong'aniranko	ong'anirangko
59	27	giri	gri
61	—	RISMAS	KRISMAS
65	—	MANA	MAINA
81	21,22	Keeler	Keller
96	20	kattarrangko	kattarangko
98	3	sengiminonikosa	segiminonikosa
101	2	mikchagani	mikchagni
101	14	mitan	mitam
101	22	dongde	dongode
111	3	nakdangko	nokdangko
111	14	nokdongko	nokdangko
119	3	chu'sokatata	chu'sokbatata







---

*Printed and Published by D.N. Sangma at Kamala Art Press,  
Munaram Shahu Lane, Shillong-793002.*